

Esayi Mucc a ngi ci Emanuwel

(Saar 1—12)

¹ Lii moo di peeñum Esayi doomu Amocc, di lu mu gis ci mbirum Yuda ak Yerusalem ci janti buuri Yuda yi ñuy wax Osiyas* ak Yotam ak Axas ak Esekiya.

Aji Sax ji sikk na ñoñam

² Asamaan, déglul; suuf, teewlul,
Aji Sax jeey àddu:

«Ay gone laa yar, màggloo leen,
ñoom, ñu gàntal ma.

³ Aw yëkk xam na boroomam,
mbaam-sëf xam gàmb,

 bi ko boroomam di xonte,
waaye Israyil xamul,
sama ñoñ ñii xàmmeewuñu.»

⁴ Wóoy wii xeetu moykat,
wii askan wu diisu ñaawtéef,
mii njurum defkati mbon,
yii doomi yàqute!

Noo wacc Aji Sax ji,
ñoo teddadil Aji Sell ju Israyil,
dëddu ko.

⁵ Xanaa dungeen wéye fippu,
ñu gën leena duma,
te bopp di góomi neen,
xol jeex tàkk?

* **1:1** 1.1 Osiyas mooy Asaryaa ba tey.

- ⁶ Bopp ba téstën, fenn jagul.
 Xanaa gaañu-gaañu aki dagg-dagg rekk,
 ak góom yuy nàcc,
 fajeesu ko, takkeesu ko,
 gajfaleesu kook ag diw.
- ⁷ Seenum réew gental,
 seeni dëkk xoyomu,
 seen suuf, doxandéem yi lekk fi seen kanam,
 muy gent bu doxandéem tas.
- ⁸ Siyon, dëkk bu taaru baa ngi wéet
 ni mbaarum tóokér mbaa dalub toolu xaal.
 Mbete dëkk bu ñu gaw!
- ⁹ Bu nu Aji Sax ji Boroom gàngoor yi
 waccalul woon li nu deseek as néew,
 ni Sodom[†] lanuy mel,
 Gomor lanuy neexool.

Aji Sax ji bañ na ngistal

- ¹⁰ Dégłuleen kàddug Aji Sax ji, yeen njiti Sodom,
 teewluleen sunu yoonu Yàlla, yeen askanu Go-
 mor.
- ¹¹ «Lu may doye seen sarax yu bare?» la Aji Sax
 ji wax.
 «Damaa suur seen saraxi rendi-dóomali kuuy,
 suur nebbonu juru yar gi,
 deretu yékk ak xar ak sikket it, safu ma.
- ¹² Bu ngeen dikkee, teewsi fi sama kanam,
 ana ku leen sant ñu joggat-joggatee nii
 sama éttru kér?
- ¹³ Buleen fi indeeti saraxi caaxaan,
 seen saraxu cuuraay, lu ma seexlu la.
 Terutel weer ak bésub Noflaay
 ak wooteb ndajee ci yem!

[†] **1:9** 1.9 Seetal ci *Njàlbéen ga* 19.23-29.

Duma mana dékku ndajem diine mu rax njubadi.

¹⁴ Seeni Terutel weer ak seen bési màggal
laa bañ ci sama xol;

yooyu màggal a ma diis ba àttanatuma ko.

¹⁵ Bu ngeen ma tällaleey loxo,
ma fuuyu.

Bu ngeen doon ñaan-ñaanee it,
du maa leen di déglu:
seeni loxo, deret la taq ripp.

¹⁶ Raxasuleen ba set wecc,
jëleleen seeni jëf ju bon fi sama kanam,
te ngeen ba lu bon.

¹⁷ Jàngleen di def lu baax,
sàkku njub,
waññi ab notkat,
àtte dëgg, ab jirim,
sàmm àqu jëtun.

¹⁸ «Kaayleen, nu waxtaan ba juboo,» la Aji Sax
ji wax.

«Li seeni bákkaar di xonq lépp,
tall lay weexeji.

Li tuy xonq curr lépp,
weex furr lay mujje.

¹⁹ Su ngeen ma nangoo déggal,
ngëneelu réew mi ngeen di xéewloo.

²⁰ Waaye su ngeen lánkee, fippu,
saamar a leen di xéewloo.»
Aji Sax ji déy a ko wax ci gémmiñam.

Mbugal mooy setal Yerusalem

²¹ Ana nu biib dëkk yàqoo, mbeteb gànc,
te nekkoon dëkkub kólliére,
njubte mate fa,

njekk lal fa panaan,
tey ñu diy bóomkat!

²² Sa xaalis doon na raxit,
sa biiñ xormbet.

²³ Seeni njiit tē,
xejjoo ay sàcc,
ñoom ñépp sopp ger,
di dàq ay neexal,
ab jirim, sàmmuñu àtteem,
àqu jétun soxalu leen.

²⁴ Moo tax, kàddug Boroom bee,
Aji Sax ju gàngoor yi,
Jàmbaaru Israyil:

«Maay lijjanti samay bañ, ngalla ñoom!
Maay fey samay noon!

²⁵ Yerusalem, maa lay teg loxo,
maay seeyal sa raxit ni xeme,
ba dindi sa mbuubit mépp.

²⁶ Maay wañni say àttekat, ñu mel na woon,
say doglekat it dellu mel ni bu jékkoon.
Su boobaa ñu wooye la Dëkkub Njekk,
ak Dëkkub Kóllére.»

²⁷ Siyon déppook yoon, mucc,
ay tuubkatam wormaal njekk, raw;

²⁸ moykat ak bàkkaarkat yàqoondoo,
dëddukati Aji Sax ji sànkoondoo.

²⁹ Yeenay rus moos ci garab yu mag,
yi ngeen soppoona daje, di xérëmtu.

Yeenay am gàcce ci tóokér,
yi ngeen taamu woona daje, di bokkaale.

³⁰ Yeenay meli ni garab gu mag gu xob ya lax,
mbaa tóokér bu amul siütu ndox.

³¹ Boroom doole mel ni boob,

la mu liggéey di ferñent,
ànd ak moom ne jéppét,
te kenn du fey sawara wa.

2

Kilifteef gu bees taxaw na

¹ Mbir mii la Yàlla won Esayi doomu Amocc ci mbirum Yuda ak Yerusalem.

² Fan yu mujj ya, dees na taxawal
tundu kér Aji Sax ji,

Aji Sax ji mooy gëna kawe ci tund yi,
tiim tund yu ndaw yi,
xeet yépp riirandoo, wutsi ko.

³ Ay askan yu bareey dikk, naan:
«Dikkleen nu yéegi tundu Aji Sax ji,
fa kér Yàllay Yanqóoba,
mu xamal nuy yoonam,
ba nu doxe yooyu ñallam.»

Siyon kat la ndigalu yoon di bawoo,
Yerusalem googu la kàddug Aji Sax ji di jóge.

⁴ Mooy àtte diggante xeet yi,
mooy dogalal ay askani askan,
ñu tègg seeni saamar ay illéer,
def seeni xeej ay sàrt;
aw xeet dootu xàccil moroom ma saamar,
te dootuñu jàngati xare.

⁵ Yeen waa kér Yanqóoba,
kaayleen nu doxe leeru Aji Sax ji!

Bew, yàqule

⁶ Boroom bi, bàyyi nga waa kér Yanqóoba, sa
ñoñ,
ndax jëfi waa penku lañu feese,

aki gisaanekat, ba mel ni waa Filisti,
 te ñoo y tappante pasook doomi doxandéem yi.
7 Seen réew maa ngi ne gàññ ak xaalis ak wurus,
 alal du jeex,
 fas ne xas,
 watiiri xare du jeex.

8 Seen réew maa ngi fees aki yàllantu;
 ñuy sujjóotal seen liggéeyu loxo yooyu,
 te ñoo ko sàkkal seen bopp.

9 Doom aadama torox na, ku ne detteelu,
 waaye bu leen yékkati!

10 Ayca ca xunti ma,
 làqujileen biiri pax,
 ba sore tiitaange ji Aji Sax ji sabab,
 sore darajay màggayam.

11 Bésub keroog booba,
 ku bew bay regeju mooy detteelu,
 sagub nit sàggiku,
 Aji Sax ji doñj mooy jagoo kawe.

12 Bés déy ñeel na Aji Sax ju gàngoor yi,
 ca lay xaare képp ku bew ak ku reew,
 ba kuy danñiiral, detteelu.

13 Ca lay xaare garabi seedari Libañ
 yi ne coleet, ba kawe,
 ak garab yu mag ya fa Basan.

14 Ca lay xaare wépp tund wu mag wu ne coleet,
 ak bépp jànj bu kawe,

15 ak jépp tata ju gudd,
 ak bépp miir bu ñu dàbbli,

16 ak gaalu Tarsis gu mag gu mu doon,
 ak gépp gaal gu taaru.

17 Bésub keroog booba,

kuy dañjiiral, detteelu,
sagub nit sàggiku,
Aji Sax ji doñj mooy jagoo kawe.

- ¹⁸ Yàllantu yépp a naan mes,
¹⁹ nit ñi làquji biir xuntiy DOJ,
 ruuruji biiri pax,
 ba sore tiitaange ji Aji Sax ji sabab,
 sore darajay màggayam,
 kera buy taxaw, ba suuf di lox.
²⁰ Bésub keroog booba,
 yàllantuy xaalis ak wurus
 ya nit sàkkal boppam, di leen sujjóotal,
 ñoom lay sànni ca jaar yaak njugub ya,
²¹ ba mana làquji ca xunti ya
 ak xarantey DOJ ya,
 ba sore tiitaange ji Aji Sax ji sabab,
 sore darajay màggayam,
 kera buy taxaw, ba suuf di lox.
²² Baleen nit,
 noowal bakkan kese la!
 Ana lees koy nawe?

3

Yuda salfaañoō na

- ¹ Aji Sax ji Boroom bi, Aji Sax ju gàngoor yi kat,
 mu ngi nii di jéle Yerusalem ak Yuda,
 lu doon wéeruwaay, di cëslaay,
 muy dugub ju ñu yaakaaroon,
 di ndox mu ñu yaakaaroon,
² ak jàmbaar ak ñeyu xare,
 akub àttekat akub yonent,

ak gisaanekat ak magum pénc,
³ ak njiitu juróom fukki dag, akub kàngam,
 ak diglekatu buur, ak ndaanaanu liggéeykat,
 ak jatkat bu xareñ.

⁴ «Maay def ay gone jiite leen,
 di ñu yaroo seen sago, yilif leen.

⁵ Nit ñiy soxorante,
 ku nekk ak moroomam, ku nekk ak
 dëkkandoom,
 ndaw di ñàkke mag kersa,
 sagaru nit sofental boroom daraja.

⁶ Nit dina ne nikki mbokk ma,
 ca biir kér baayam, ne ko:
 "Yaw mi dese mbubb, jiite nu,
 ba lu bokk ci sunu gent bii, di sa kilifteef."

⁷ Keroog kooka àddu ne ko:
 "Duma leen mana fajal dara!
 Du dugub, du mbubb fa sama kér,
 dungeon ma def njiit!"»

⁸ Yerusalem day téqtalu,
 Yuda félëñu.
 Ñooy wax ak a jéf lu neexul Aji Sax ji,
 di gántal leeram gi teew.

⁹ Seen dëgér bét tuumaal na leen,
 ñuy bàkkaar ni waa Sodom,
 làquwuñu sax.
 Wóoy, ngalla ñoom!
 nde ñoo lor seen bopp.

¹⁰ Neleen aji jub ji mooy baaxle,
 mooy yooloo añam.

¹¹ Waaye wóoy ku bon, nde mooy bonle;
 la mu def rekk lees koy def.

¹² Bokk yi, ñu xalele ñoo leen di not,

ay jigéen yilif leen.

Bokk yi, seeni njiit a ngi leen di sànk,
lëndëmal nañu seeni yoon.

¹³ Aji Sax jaa ngi ci jataayu layoo,
moo jóg di àtte ay xeet.

¹⁴ Aji Sax jeey yékkati kàddug sikkaange,
jëme ci magi ñoñam ak seeni kàngam.

«Yeena sëxëtoo tóokëru reseñ bi,
la ñu foqatee ci néew-ji-doolee nga seeni kér.

¹⁵ Lu waral ngeen di dëggaate sama ñoñ,
nappaaje néew-doole yi?»

Kàddug Boroom bee, Aji Sax ju gangoor yi.

Puukare sànk na jigéeni Siyon

¹⁶ Aji Sax ji da ne:

«Jigéeni Siyon a ngi danjiiral,
di gojeet-gojeeti,
di regejook a rékk-rékkal,
samp um ndaag,
keleñal lami wëq.»

¹⁷ Moo tax Boroom beey wat jigéeni Siyon nel,
Aji Sax jeey muri seen jé.

¹⁸ Bésub keroog Boroom bi xañ leen gànjari
tank, ak takkaay yu bindoo ni jant, ak yu bindoo
ni weer wu feeñ; ¹⁹ aki lonj-lonj aki caq aki
muuraay. ²⁰ Moo leen di xañ ay tañlaay ak lami
përëg aki ngañaay ak téere yu xeeñ aki gallaaj,
²¹ xañ leen jaaroy torlu ak jaaroy bakkán, ²² ak
mbubbi xew, aki mëlfë, ak séri càngaay, ak saagi
loxo, ²³ ba ci yérey sooy ak yérey lëe aki musóor
aki kol.

²⁴ Su boobaa lu xasaw wuutu lu xeeñ,
buum wuutu ngañaay,

nel bu set wuutuy létt,
yérey saaku wuutu ndoket bu rafet,
toroxte wuutub taar.

²⁵ Yerusalem, say góor ay fàddoo saamar,
say jàmbaar des xare.

²⁶ Su boobaa sa bunti dëkk sax di ñaawlook a
jooy,
mel ni ndaw su ñu futti,
mu ne dett fi suuf.

4

¹ Su bés baa juróom yaari jigéen ñoyaalu genn
góor, ne ko:
«Sunub dund, nun a,
sunu kodaay, nun a!
Jox nu sag buum rekk,
teggil nu gàcce.»

Aji Sax ji aar na ndesu Yerusalem

² Su bés baa njebbitum Aji Sax ji
doon lu yànj, darajawu,
meññeefum réew mi di teraanga, dib sag,
ñeel ñii dese bakkan fi Israyil.

³ Su boobaa ku mucc fa Siyon
ak ku des fa Yerusalem,
ku sell ki lees lay wooye,
muy képp ku ñu bind turam,
te mu wara dese bakkan ci Yerusalem.

⁴ Boroom beey wal noowal mbugal,
noo guy lakk, sellal,
fóote ko jonkani jigéeni Siyon,
fetee ko deret ji ci Yerusalem, ba mu set.

⁵ Su boobaa tundu Siyon bépp,
fépp fu ñuy dajee,

Aji Sax ji sàkk fa niiru saxar bëccëg,
 guddi mu def tàkk-tàkk bu ne ràññ;
 leeru Aji Sax ji di kiiraay, tiim lépp,
⁶ di mbaar mu ñuy serloo tàngooru bëccëg,
 di ko seeloob taw ak waame.

5

Woyu cofeel rax na

¹ Naa woy sama soppe
 woyu cofeel wu solowoo tóokëram.
 Sama soppee fi amoon tóokér,
 kaw tund wu suuf sa nangu lool.
² Mu gabb ko, dindi doj ya,
 jëmbat ca ngëneeli reseñ,
 tabax tóojub doj fa digg ba,
 ba yett ca mbalkam nalukaayu reseñ,
 tey yaakaar reseñ ju neex,
 mu meññ, wex.

³ Léegi yeen waa Yerusalem
 ak yeen waa Yuda,
 ngalla àtteleen maak sama tóokér.
⁴ Lu may defalati sama tóokér bi,
 lu ma ca defulloon?
 Lu waral ma di ko yaakaare reseñ ju neex,
 mu meññ, wex xàtt?

⁵ Ma xamal leen nag
 li ma naral sama tóokér bi.
 Ñaggib ñagam, mu dim parlu;
 màbb miiram, ñu dëggaate ko, jàll.
⁶ Dama koy gental,
 mu saxi dég aki dagg,
 deesu ko tenqi, deesu ko bey;

niir yeet, ma sant leen
 ñu bañ koo tawal.

⁷ Tóokëru Aji Sax ji Boroom gàngoor yi kat,
 mooy waa kér Israyil.
 Niti Yuda it
 ñooy njëmbat li mu safoo.
 Mu di ko yaakaare njub,
 njubadi ne jaas.
 Mu yaakaar njekk,
 yuuxi njekkar ne jaas.

Alkànde ñeel na kàngami Yuda

⁸ Wóoy ngalla ñii di dajale kér ak kér,
 tool akub tool,
 aakimoo fépp,
 ba des ñoomu neen ci réew mi.

⁹ Maa dégg Aji Sax ji Boroom gàngoor yi,
 mu ne: «Giñ naa ne
 kér yu bareey gental déy,
 kér yu yaa, rafet, kenn dëkku ca.

¹⁰ Tóokérub ñetti egtaar déy
 du meññ juróom fukki liitari biiñ,
 te jiwum téeméeri kiloy bele it,
 fukki kilo doñj a cay génne.»

¹¹ Wóoy ngalla ñiy teela xëy,
 daw wutiw ñoll,
 gonloo biiñ ba tanggal jérr.

¹² Xalam yaak tabala yaak toxoro ya jolli,
 biiñ xelli ca xawaare ja.
 Seetluwuñu sax li Aji Sax ji def,
 xooluñu li mu jo loxoom.

¹³ Moo tax ñoñi Aji Sax ji di duggi ngàllo
 ndax ñàkk xam-xam.
 Seen kàngam ay deeye xiif,

seen baadoolo deeye mar.

14 Moo tax njaniiw di yàkkli ag bòli,
gémymiñ ga ne ñafeet, amul kersa,
boroom darajaak baadoolay Yerusalem
doon xaxaloo, far tàbbi ca.

15 Doom aadama torox na,
nit detteelu na,
ku doon regeju, detteelu.

16 Aji Sax ji Boroom gàngoor yi, ab àtteem lay
fésale màggayam,
Yàlla ju sell ji, ag njekkam lay firndeele sell-
ngaam.

17 Am xar a nara fore biir dëkk bi, mbetem parlu,
màngaan lekke gentub boroom alal.

18 Wóoy ngalla ñiy ràngooy buum,
di diri ñaawtéefi neen,
ràngooy goj di diri seeni tooñ.

19 Ña nga naa: «Na Aji Sax ji gaaw!
Na baral liggéeyam, nu gis.
Na Aji Sell ju Israyil sottal mébétam,
mu sotti, nu xam.»

20 Wóoy ngalla ñiy gis lu bon, ne lu baax la;
gis lu baax, ne lu bon la;
lëndëm, ñu tudde leer,
leer, ñu tudde lëndëm;
lu wex, ñu ne neex na
lu neex, ñu ne wex na.

21 Wóoy ngalla ñii defe ne ñoo xam,
yaakaar ne ñoo muus.

22 Wóoy ngalla ñiy jàmbaari naan biiñ,
diy ndaanaan ci njafaanu ñoll,

23 di dëggal ku sikk ndax ab ger,
tey xañ boroom njekkam.

24 Moo tax ni boob di jeexe ci sawara,
 ngooñ xoyomoo ko cib taal,
 ni la seenub reen di seeye ni lu maxe,
 seeni tóor-tóor naaw ni pënd.

Noo gàntal yoonu Aji Sax ji ci gàngoor yi,
 ñoo sofental kàddug Aji Sell ju Israyil.

25 Moo tax merum Aji Sax ji tàkkal ñoñam,
 mu xàcci loxoom, duma leen,
 ba tund yi jaayu,
 seeni néew wetar ni mbalit fi mbedd yi.
 Loolu yépp taxul mu meddi,
 loxoom baa ngi mu xàcci ba tey.

26 Aji Sax jeey yékkatil raaya, xeet wu sore,
 wal ug liit, wooye leen fa cati àddina,
 ñu jekki ne jaas, dikkal leen.

27 Kenn sonnu ci, kenn térëfu ci,
 kenn dajjantul mbaa muy nelaw;
 ngañaay yolomul, waruw dàll dogul.

28 Seeni fitt ñaw na,
 seen xala yépp noppi na,
 seen wewi tànki fas ni xeer.
 Bu tànki watiir ya dawee,
 nga defe ne callweer a.

29 Dañuy ñar ni gaynde,
 ñarati ni gaynde gu mat;
 yëmmu, ñank um rëbbam,
 yóbbu te kenn du wallu.

30 Bésub keroog ñu ñaral Yuda,
 ñar yu mel ni géej gu sàmbaraax!
 Foo geesu ci réew mi, xool,
 doo gis lu moy lëndëm ak njàqare,
 xàmbaar maase, ba leer giim.

6*Aji Sax ji setal na Esayi, yebal ko*

¹ At ma Buur Osiyas saayee, damaa gis Boroom bi toog kaw ngàngune mu kawee kawe, lafi mbubbam fees néeg bu sell bi. ² Ay malaakay seraf ñoo taxaw, tiim ko, ku ci nekk am juróom benni laaf: ñaar yu muur seen kanam, ñaar yu muur seeni tànk, ak ñaar yu ñuy naawe. ³ Ku ci nekk di àddu, naan moroom ma:

«Kee sell te sell te sell,
keey Aji Sax ji Boroom gàangoori xare yi,
àddina sépp a feese ag leeram!»

⁴ Ku ci àddu, kenuy bunt yay riir, néeg Aji Sax ji fees ak saxar. ⁵ Ma ne: «Wóoy man, sàñku naa! Man miy nit ku làmmiñam sobewu, xeetoo ci ñu seen làmmiñ sobewu, te samay gët tegu ci kaw Buur Aji Sax ji Boroom gàangoori xare yi.»

⁶ Kenn ci malaakay seraf ya naaw wutsi ma, yor aw xal wu mu keppe ag ñiim, jële ko fa sarxalukaay ba. ⁷ Mu laalale xal wi sama gémmiñ, ne ma:
«Mu ngoog, ndegam lii laal na sa gémmiñ,
sag tooñ wàcc na, sa bakkhaar faru na.»

⁸ Ma dégg baatu Boroom bi, mu naan: «Ana ku may yebal, ana ku nuy demal boog?» Ma ne: «Xanaa man, yebal ma!» ⁹ Mu neeti: «Demal, wax askan wii, ne leen:
“Dégluleena déglu te buleen dégg,
xool-leena xool te buleen gis.”

¹⁰ Nanga dërkiisal xoli askan wii,
fatt seeni nopp,
taf seeni gët;

lu ko moy seeni gët gis,
seeni nopp dégg,
seen xol yég,
ñu dëpp, wér.»

¹¹ Ma ne: «Boroom bi, foo àppal loolu?» Mu ne: «Xanaa fii ba seeni dëkk gental, ba kenn dëkkatu ca, ba nit dootu nekk biir kér ya, suuf sa yàqu yaxeet, di ndànd-foyfoy. ¹² Aji Sax jeey yebal waa réew mi fu sore, tool yu bare booy. ¹³ Bu ca fukkeelu nit ña desoon, ñoom it dees na leen dellu taal. Waaye dañuy mel ni wenn ci xeeti garab yu mag yi ñuy gor, èkk ba dellu jebbi, èkku xeet wii, jiwu mu sell lay doon.»

7

Yaakaar Yàlla war na Buur Axas

¹ Janti buurub Yuda, Axas doomu Yotam miy doomu Osiyas, Reccin buurub Siri moo dal ci kaw Yerusalem, ànd ak buurub Israyil, Peka doomu Remalya. Waaye manalu leen dara. ² Ba ñu yégalee Buur Axas sëtub Daawuda, ak waa kéräm, ne ko waa Siri, Efrayim* lañu lëngool, mbir ma yëngal na Buur Axas ak waa réew ma, ba mel ni garabi gott bu ngelaw li gësëm. ³ Aji Sax ji wax Esayi ne ko: «Génnal gaaw, dajeek Axas, yaak sa doom Seyar Yasub, ma nga ca catal solomu mbànd ma féete kaw, ca yoonu toolu fóotkat ya. ⁴ Nga wax ko ne ko:
“Defal ndànk te ne cell.
Bul tiit, bul xàddi

* **7:2** 7.2 Efrayim moo gëna yaatu ci fukki giir ya féete woon réewum Israyil ga ca bëj-gànnar, te moo taxawe taxawaayu Israyil.

ndax merum Reccin ak Siri,
 ak doomu Remalya ji.
 Duñu dara lu moy ñaari gil yuy saxar!
⁵ Waa Siri ñoo ànd ak Efrayim ak doomu Re-
 malya,
 di la fexeel naan:
⁶ 'Nan songi Yuda,
 tiital leen, nangu ko,
 fal fa doomu Tabeel buur.'
⁷ Waaye Boroom bi Aji Sax ji dafa wax ne:
 'Loolu du sotti, du am.
⁸ Damaas a yilif Siri,
 te Reccin yiliful lu moy Damaas.
 Fii ak juróom benn fukki at ak juróom
 Efrayim tas, ba xeet wa réer.'
⁹ Samaree yilif Efrayim,
 te doomu Remalya ji yiliful lu moy Samari.
 Dungeen mana saxoo dëgér nag,
 ndare ngeen sax ci Aji Sax ji."»

Juddub Emanuwel firnde la

¹⁰ Aji Sax ji teg ca ne Axas: ¹¹ «Ñaanal sa
 Yàlla Aji Sax ji firnde. Ñaan ko ko, ak fu mu
 mana bawoo, fa suufa suuf, mbaa fa kawa kaw.»
¹² Axas ne: «Duma ko ñaan, ndax duma nattu
 Aji Sax ji.» ¹³ Esayi nag ne:
 «Yeen waa kér Daawuda, dégluleen!
 Tàyyiloo ngeen nit,
 di tàyyiloo sama Yàlla itam.
¹⁴ Kon nag Boroom bi ci boppam moo leen di jox
 firnde:
 janq bi mooy ëmb, jur doom ju góor,
 tudde ko Emanuwel (mu firi Yàllaa ngeek nun).
¹⁵ Soow ak lem lay lekk,

ba keroog muy mana taamu lu baax,
ba lu bon.

¹⁶ Bala xale bee ràññee lu baax ak lu bon,
dees na gental réew mii nga ragal seen ñaari
buur.

¹⁷ Aji Sax jee lay dikke,
yaak saw xeet ak sa waa kér baay,
ay bés yu tar yu masula am,
ba Efrayim dëddoo Yuda ba tey,
te buurub Asiri la koy sababe.»

¹⁸ Bésub keroog Aji Sax ji ootal weñ,
ya fa catal wali ndoxi Misra,
ak yamb ya fa réewum Asiri,

¹⁹ ñu dikk, bokk tagesi mbartali xunti yi,
ba ci xar-xari doj yi,
ak gajjoo gajj, ak déegoo déeg.

²⁰ Bésub keroog saatu la Boroom biy wate,
te saatu ba moo di buurub Asiri,
mu àbbe ko ca wàllaa dex,
wat la nel,
wat say yeel,
xuuf sab sikkim.

²¹ Bésub keroog nit du fa dundle
lu dul wenn nag ak ñaari gàtt,

²² meew ne gàññ, ndax nit ñu néew,
di dunde am soow,
nde soow ak lem la képp ku des ci réew ma di
dundeji.

²³ Fu junniy reseñ taxaw tey,
di jar junniy donji xaalisu lëmm,
bésub keroog ay dég aki dagg nangu ko.

²⁴ Xalaaku fitt lees fay deme,
ndaxi dég aki dagg yu fees réew mi.

²⁵ Mépp mbartal mu ñu daan gàbb,
deesu fa demati,
ndax ragali dég aki dagg,
aw nag a cay fore,
am xar curpee ca.

8

Asiri workat la, matul wéeruwaay

¹ Gannaaw gi Aji Sax ji ne ma: «Jélal àlluwa ju mag, ak xalima gu jàppandi, nga bind ci lii: "Maxer Salal Xas Bas", (mu firi Sëxétoo këfit foqet).» ² Ma wut ci seede, won àlluwa ja ñaar ñu mat seede: ñuy Uri sarxalkat ba, ak Sàkkaryaa doomu Yeberekiya. ³ Ba loolu weesee ma jaxasoo ak sama soxna, yonent bu jigéen ba, mu èmb, gannaaw gi mu am ca doom ju góor. Aji Sax ji ne ma: «Tudde ko "Maxer Salal Xas Bas." ⁴ Bala xale bee man ne "Baay" mbaa "Yaay" déy, dees na yóbbul buurub Asiri alal ju ñu foqatee Damaas, ak lël ju ñu këfe Samari, nangu ko.»

⁵ Aji Sax ji dellu ne ma:

⁶ «Gannaaw askan wee teddadil ndoxum Silowe, mi ci wal mu teey mi,
di bége Reccin ak doomu Remalya,
⁷ Boroom baa ngii di leen sottisi
dexu Efraat gi ne xéew ak dooleem,
te mooy buurub Asiri ak mboolem darajaam.
Dex gi mooy génn xuram,
fees fépp fu dig tàkkam,
⁸ wal-wali jàll Yuda,
mbënn ma wal, taañaañal,
yéeg ba tollu ko ci put,

firiku niy laaf ba dajal sam réew, yaw
Emanuwel.»

⁹ Yeen xeet yi, xaaculeen, dees na leen rajaxe.

Yeen waa cati àddina, teewluleen!

Gañoo gañu, ñu rajaxe leen!

Ma ne: Gañoo gañu, ñu rajaxe leen!

¹⁰ Ngeen mébét, dara!

Ngeen diisoo, diisoo, tus!

Yàllaa ànd ak nun!

Aji Sax jee jara ragal

¹¹ Aji Sax ji moo wax ak man,
ba mu ma nee nikk, àrtu ma,
ngir ma baña roy askan wii. Mu ne ma:

¹² «Bul tudde wor,
lenn lu askan wii tudde wor;
lu ñu ragal it, bu ko ragal,
bu ko tiit.

¹³ Aji Sax ji Boroom gàngoor yi daal ngay sellal,
moom ngay ragal,
moom ngay tiit.

¹⁴ Mu doon seen bérab bu sell,
di doj wuy fakktale,
xeer wuy féle, ci ñaari kéri Israyil,
te dim yeer, dig fiir,
ñeel ku dékk Yerusalem.

¹⁵ Ñu baree cay térëf,
daanoo njaaxaanaay, damm,
mbaa ñu sérëx, keppu.»

¹⁶ Dencal seede bii,
jëlal lii ndigal, tay cib tayu,
dénk ko samay dongo.

¹⁷ Maa ngi séentu Aji Sax ji,

mu ngi won waa kér Yanqóoba gannaaw,
waaye maa ngi koy yaakaar.

¹⁸ Man de, maa ngii, maak xale yi ma Aji Sax ji
may,
nu diy firnde fi Israyil te diy tegtal
yu bàyyikoo fa Aji Sax ji Boroom gàngoor yi,
ki dëkke tundu Siyon.

¹⁹ Am na ñu naan:
«Laaajleen ñiy gisaanee nit ñu dee,
ak boroom rawaan yiy kebetook a ñun-ñuni.
Aw xeet sañ nañoo gisaanee seeni tuur,
tey diis ñi dee mbiri ñiy dund.»

²⁰ Kon waxleen ne leen: «Ayca, ca ndigali yoon
ya,
ak seedey kàdduy waxyu ya.

Kuy wax googu kàddu, ag leer fenkalu la.»

²¹ Nit ñi dinañu taxawaalu ci réew mi,
boole njàqareek ub xiif,
te bu ñu xiifee, ñéññ,
téen, xool kaw,

saaga seen buur, saaga Yàlla,

²² dellu xool fi suuf,
yem ciw tiis, ak lëndëmu njàqare,
sóoboo guddi gu fatt taraj.

²³ Waaye lëndëm googu du sax
ci réew mii jàq tey.

Démb Aji Sax ji torxal na
réewum Sabulon ak mu Neftali,
waaye ëllëg mu teral waa foofa,
dale ko diiwaanu tefesu géej,
ba ca wàllaa dexu Yurdan,
boole ca sax Galile ga ca doxandéem ya.

9

Doom juddul na nu

¹ Askan wiyo doxe lëndëm nii,
ñoooy gis leer gu mag.

Ñooñu dëkke réewum ndee mu ne këruus,
ñoom la leer di fenkal.

² Aji Sax ji, yaay yokk xeet wi,
fulal leen bânnexx,
ñuy bége fi sa kanam, mbégtem ngóob,
mel ni ñuy bânnexxoo fa ñuy séddoo alalu xare.

³ Yaa leen di sippil seen sëf,
damm bant ba ñu leen galloon,
ak yetu ña leen notoon,
na nga leen defaloon rekk ca xareb Majan.

⁴ Mboolem dàll wu ab noon dukkate ba dikk,
ak turki bu mändi deretu xare,
sawara lees koy leel.

⁵ Nde gonee juddu, ñeel nu,
di doom ju góor ju ñu nu may,
mu yenu kilifteef gi,
ñu di ko wooye Diglekat bu yéeme bi,
ak Yalla jàmbaar ji,
ak Baay bi sax dàkk,
ak Buuru jàmm bi.

⁶ Dooley kilifteefam ak jàmm ja du am kemu,
fa jalub Daawuda ak nguoram,
ga muy samp, saxale ko njekk ak yoon,
tey jii, ba fàww.

Lii la Aji Sax ji Boroom gàngoor yi def ci
xéraangeem.

Aji Sax ji yokk na mbugalam

⁷ Boroom bee yónnee kàddu

gu dal Israyil, askanu Yanqóoba,
⁸ xeet wépp jot ca,
 ba ca Efrayim ak waa Samari,
 ñay damook a sagu naan:
⁹ «Ay móol màbb,
 nu yett ponkali doj, tabaxaat,
 xàンqi garab yu ndaw daanoo ca,
 nu wuutal ca garabi seedar yu mag.»
¹⁰ Aji Sax ji yékkati nooní Buur Reccin, fi seen
 kaw,
 gemb seeni bañ,
¹¹ Siri songe penku; Filisteen ña, sowu,
 ñu sëxëtoo Israyil, wonn.

Teewul Aji Sax ji xàcci loxoom,
 meddiwul ba tey.

¹² Waaye xeet wi delluwuñu ca ka leen duma,
 sàkkuwuñu Aji Sax ji Boroom gàngoor yi.
¹³ Moo tax Aji Sax ji doge Israyil bopp ak geen,
 boole tiir ak barax fóom ci benn bés.
¹⁴ Mag meek kèngam li ñooy bopp bi,
 yonent bi mokkal naaféq dib geen.
¹⁵ Ñi jiite askan wii ñoo leen di sànk,
 ña ñuy jiite loru.
¹⁶ Moo tax Boroom bi du bége seeni xale yu góor,
 du yérém seeni jirim ak seeni jétun.
 Ñoom ñépp a gëmadi, di def lu bon,
 ku ci nekk di wax lu amul bopp.

Teewul Aji Sax ji xàcci loxoom,
 meddiwul ba tey.

17 Mbon a ngi tàkk moos
ni sawara, xoyom dég aki dagg,
jafal gajji gott bi,
mu ne jippét, saxar, naaw.

18 Merum Aji Sax ji Boroom gàngoor yi taal na
réew mi,
xoyom waa réew mi,
kenn yérémul sa mbokk.

19 Nit ñaa ngi màtte ndijoor, te doyaluñu,
di xàmpe càmmoñ te suuruñu,
ku nekk di yàpp sa mbokk:

20 Manase song Efrayim,
Efrayim song Manase,
ñu mènkoo, noonoo Yuda.

Teewul Aji Sax ji xàcci loxoom,
meddiwul ba tey.

10

Mbugal ñeel na kàngami Yuda

1 Wóoy ngalla boroom dogal yi y dogal njubadi,
bind ko, te muy jur coono,

2 di ko àttee ñàkkal ku ñàkk,
di xañ àq sama néew-ji-dooley ñoñ,
bay lekk ab jétun,
di sëxëtoo ab jirim.

3 Ana nu ngeen di def keroog bésub mbugal ba,
kerood ba safaan di bawoo fu sore?
Ana ku ngeen di daw wuti wallam?

Ana fu ngeen di denci seen teraanga?

4 Xanaa ànd ak ña ñu jàpp, ne yogg;
mbaa tèddandook ña ñu bóom, ne lareet.

Teewul Aji Sax ji xàcci loxoom,
meddiwul ba tey.

Asiri muccul ci mbugal

⁵ Wóoy ngalla Asiri miy sama yetu mer,
bolde bi ñu ñàbb di samam sànj,

⁶ ma xabtal ko fi kaw xeet wu gëmadi,
yebal ko ca askan woowu ma merloo,
ngir ñu sëxëtoo leen, nangu seen alal,
note leen ni banu mbedd.

⁷ Waaye Asiri gisewu ko noonu,
xalaatewul noonu;
bóome la xintewoo,
ba fakkas xeeti xeet.

⁸ Mu ngi naan: «Xanaa du sama jawriñ yépp a
diy buur?

⁹ Kalne daa gën Karkemis gee ma nangu?

Am Amat daa gën Arpàdd*?

Am Samari daa gën Damaas?

¹⁰ Maa duma réew yu seeni yàllantu,
seeni tuur sut tuuri Yerusalem ak Samari.

¹¹ Na ma tege loxo Samari aki yàllantoom,
duma ni tege loxo Yerusalem aki tuuram?»

¹² Boroom bi nee:

«Bu ma sottalee liggéey fa kaw tundu Siyon ak
fa Yerusalem,
maay mbugale buurub Asiri réy-réyloom gi,
ak gëti xeebaateem..»

¹³ Moom moo ne: «Sama dooley pérëg laa defe
lii,
maa xelu, ràññee;
ba randal kemi suufi xeet yi,

* **10:9** 10.9 Kalne ak Karkemis ak Amat ak Arpàdd ay dëkki Siri lañu.

foqati seeni alal,
dañ boroom jal ya niw yëkk, wàcce leen.

¹⁴ Maa teg alali xeet yi loxo,
ni ku gis am tàgg.

Maa tonneendoo réewi àddina
ni ku for ay nen, tonni lépp,
laaf tëf-tëfluwul, sàll newul ciib!»

¹⁵ Sémmiñ dina diir mbagg ka koy gore?
Am dogukaay dina réy-réylu ba sut ka koy doge?
Mbete yet wuy xàcci ka ko ñàbb;
mbaa bolde bu walbatiku ñàbb boroom!

¹⁶ Moo tax Boroom bi,

Aji Sax ji Boroom gàngoori xare yi,
di yebal woppi ràgg fi kaw mbuxreem yi,
seen daraja tàkk, sawara xoyom ko.

¹⁷ Aji Sax ji, leeru Israyil mooy doon sawara,
ku Sellam kooku mooy doon tàkk-tàkku sawara,
xoyom taxasi Asiri aki dégam ci benn bés.

¹⁸ Gott bu naat ak tool bu meññ, mu ne faraas
fóom,

ba mu mel ni ku wopp, yaram way seey,

¹⁹ gott ba dese garab yu néew
yu gone mana lim, bind ko.

Ndesu Israyil dina ñibbi

²⁰ Keroog bés booba

li des fi Israyil ak li rëcce kér Yanqóoba
duñu wéerooti ña leen duma.

Aji Sax ji lañuy wóolu, wéeroo ko,
Aji Sell ju Israyil.

²¹ Aw ndes ay délsi,
di ndesu askanu Yanqóoba,
ñeel Yalla Jàmbaar ji.

22 Seen xeet wi ni feppi suufas géej lay tollu,
te as ndes a ciy délsi.

Àttes sànkute mooy taxaw,
yoon toppe ba mat sëkk.

23 Sànkute déy mooy taxaw,
Boroom bi, Aji Sax ji Boroom gàangoor yi
di ko sottal fi réew mi mépp.

24 Moo tax Boroom bi,
Aji Sax ji Boroom gàangoor yi
dafa wax ne:
«Yeen sama ñoñ ñi dëkke Siyon,
buleen ragal waa Asiri yi leen di dóor yet,
ñàbbal leen bolde ni waa Misra daa def ak yeen.

25 Waaye fi leek lu néewa néew
mbugal jeex fi seen biir,
am sànj sippil Asiri seen sànkute.»

26 Aji Sax ji Boroom gàangoor yee leen di ñàbbal
kàccri,
na mu defoon waa Majan fa doju Oreb.
Mooy xàcciw yetam, mu dal géej,
na mu defoon fa Misra.

27 Bésub keroog sëf bu ñu leen sëfoon wàcc leen,
ngeen tàggook yet wu ñu leen ténke woon,
nde seen yaram ay naat, ba yet wa damm.

Noon yi songsi nañu

28 Noon yeey songsi Ayat, jérggi Migron,
dem ba Migmas, teg fa seeni jumtukaay,

29 jaare ca xunti ma
te naan: «Geba lanuy fanaani!»

Waa Raama tiit, waa Gibeya gu Sóol daw.

30 Yeen waa Galim, yuuxuleen,

yeen waa Laysa, dégluleen,
yeen waa Anatot, feeluleen.

³¹ Waa Madmena ñooy félxoo,
waa Gebim wuti rawtu.

³² Tey jii noon yaa ngay taxaw fa Noob,
di sànni loxo waa tundu Siyoñ,
di ko tèkkoo waa Yerusalem googu.

³³ Boroom baa ngoog, Aji Sax ji Boroom gàngoor
yi,
mu ngi gor garab yi, di rajaxe car yi,
njobbaxtal ya gëna kawe dog,
la ca gënoona siggi, wàcc.

³⁴ Mooy jël sémmiñ, goraale gajji gott bi,
Liban̄ loroo loxol boroom doole, ba jóoru.

11

Daawuda am na kuutaay

¹ Aw njebbit mooy saxe fa ëkkub Yese*,
ab car soqekoo fa reen ya,

² xelum Aji Sax ji tegu fi kawam,
xelum rafet xalaat ak ràññee,
xelum digle ak njàmbar,
xelum xam Aji Sax ji, ragal ko.

³ Ragal Aji Sax ji lay safoo,
du lu ko bëtam may rekk lay àttee,
du lu ko noppam may rekk lay dogale,

⁴ xanaa di àtte ku ñàkk ci njekk,
di dogalal njub, néew-ji-dooley àddina.
Mooy dóore àddina, bantub kàddoom,
mooy reye ñu bon ñi, ngelawal gémmiñam.

⁵ Njekk lay gañoo,

* **11:1** 11.1 Yese mooy baayu Daawuda.

takkoo kóllére.

⁶ Till ay bokk ak mbote ab dal,
segg bokk akub tef ab téraay,
wéllu ànd ak gaynde gu mat, ak juru yar,
tuut-tànk jiite leen.

⁷ Nag ak rab wu aay di forandoo,
seeni doom goorandoo,

gaynde di lekk um ngooñ niw yëkk,

⁸ luy nàmp di foye paxum ndox-suuf,
perantal di laal tostanum ñàngóor.

⁹ Deesatul gaañe mbaa di lore,
fi mboolem sama kaw tund wu sell wi,
ndax ni ndox di feese ba muur géej,
ni la àddina di feese nit ñu xam Aji Sax ji.

¹⁰ Bésub keroog car bawoo ca Yese, reen ba,
taxaw di raaya buy gindi xeet yi,
xeet yi di ko sàkku,
dal-lukaayam ba jagoo teddnga.

¹¹ Bésub keroog Boroom bi jooti loxoom
 ñnaareel bi yoon,
ngir iotaat ndesu ñoñam,
wa des Asiri ak Misra, ak Pattros ak réewum
 Kuus,
ak Elam ak Sineyaar,
 ak Amat ak biir duni géej ya.

¹² Mooy yékkatil xeet yi raaya,
dajale góor ña ñu dàqe Israyil,
ak jigéen ña ñu jèle Yuda, tasaare leen,
ñu jöge ñeenti weti àddina, booloo.

¹³ Fiiraangey Efrayim day jeex,
njéefoy Yuda dakk,
Efrayim dootu fiire Yuda,

Yuda dootu jéppi Efrayim.

¹⁴ Xanaa ñu ne coww ba sowu,
ne jàyy céppandoo
fa kaw waggi Filisteen ña,
waa penku, ñu sëxëtoondoo;
Edom ak Mowab, ñu teg loxo;
Amoneen ña nangul leen.

¹⁵ Aji Sax jeey wowal walum ndox,
ma séle géeji Misra.

Mooy tållal loxoom, tiimale dexu Efraat,
wal kook doole,
dóor ko, mu séddlikoo juróom yaari wal,
mu jaarale ca nit ñu caraxu,

¹⁶ def kow yoon, ñeel ndesu ñoñam,
 ña dese fa Asiri,
mu mel ni yoon wa ñeeloon Israyil,
bésub keroog ba ñuy génn réewum Misra.

12

Cant jib na

¹ Bésub keroog dees na ne:

«Aji Sax ji, sant naa la;
yaa ma mere woon, meddi, dëfal ma.»

² Ma ne: «Yàllaa may wallu,
ma dal-lu, duma tiit.

Sama dooleek sama kaaraange mooy Ki sax,
di Aji Sax ji,

te mooy sama wall.»

³ Mbégte ngeen di rooteji
fa wali mucc ya.

⁴ Bésub keroog ngeen ne:
«Santleen Aji Sax ji, tudd turam,

xamley jalooreem ci biir xeet yi,
fàttli màggayu turam.

⁵ Woyleen Aji Sax ji,
moo kawey jëf!
Na lii siiw biir àddina sépp.

⁶ Yeen waa Siyon, serleen te sarkolleel
ku màgg ki fi seen biir,
Aji Sell ju Israyil.»

Yàllaa moom xeet yi

13

(Saar 13—23)

Yéeneb waxyu dal na Babilon

¹ Yéeneb bii ñeel na Babilon*,
muy peeñum Esayi doomu Amocc.

² Yéegeleen ab raaya kaw tund wu ne duñj,
joorleen ñii,
tàllal-leen loxo,
ñu jàlle bunti kàngam yi.

³ Maa jox ndigal ñi ma beral sama bopp,
maa woo sama jàmbaar ñiy réy-réylu,
ne leen ñu sottal mbugal mi samam sànj laaj.

⁴ Coowal mbooloo ngoog ca tund ya,
mel ni ñu baree bare!

Riirum nguuri nguuri yu daje, di xeeti xeet!
Aji Sax ji Boroom gàngoor yi
mooy dajale gàngooru xare.

⁵ Mooy bawoo fu sore,
fa asamaan digalook suuf.
Aji Sax ji laak gàngoor gi muy mbugale,

* **13:1** 13.1 Babilon tollu na ay jant yu mu mujj di puukarey xeet yi, ngir dooleem, te moo mujj yóbbu Yuda ngàollo.

ngir yàqtesi réew mi mépp.

⁶ Yuuxuleen! Bésub Aji Sax ji moo dëgmal,
te ni sànkute gu bawoo fa ci Aji Man ji lay dikke.

⁷ Moo tax yoxoo yoxo yoqi, xoloo xol jeex,

⁸ ñiu tiita tiit,

yaram di fuddook a metti,
ñuy baddaañu ni kuy matu;
ku ne jàq, di xulli sa moroom,
kanam ya sël-sëleendoo.

⁹ Bésub Aji Sax jaa ngii di ñëw,
bés bu néeg, bésüb mer ak sànj muy tàkk,
nara gental suuf,
te bàkkaarkat ya la fay fàkkas.

¹⁰ Biddiiw mbaa dëllooñ dootu leeral;
jant ay fenke lëndëm,
weer dakkal leeram.

¹¹ Maay delloo àddina mbonam,
yool ku bon tooñam,
maay sàggi sagub ku reew,
detteel puukarey ku néeg.

¹² Maay def nit gëna jafee gis wurus,
ba doom aadama raw wurusu Ofir.

¹³ Moo tax maay gësëm asamaan,
suuf yëngoo fa mu tege
ndax sànjum Aji Sax ji
Boroom gàangoori xare yi,
keroog ba meram di tàkk.

¹⁴ Ku nekk ay fekkiy bokkam,
rawi cam réewam,
mbete kewedé gu ñuy rëbb,
mbaa xar mu amul sàmm.

¹⁵ Ku ñu ci gis, jam la,
ku ñu jàpp, saamar rey la;

16 seeni doom, ñu moxoñe fi seen kanam,
seeni kér, ñu sëxëtoo,
seeni jabar, ñu tëdde.

17 Maa ngii di xabtal fi seen kaw waa Medd,
ñi xintewoowul xaalis,
faalewuñu wurus.

18 Seeni fitt lañuy rajaxee xalelu góor,
duñu ñieewante gone,
duñu xool tuut-tànk gëti yërmande.

19 Babilon nag, mooy gànjaru réew yi ko wër,
di teraanga ji Kaldeen ñiy sagoo,
waaye Yällaa koy tas,
mu ne tasar ni Sodom ak Gomor.

20 Deesatu fa dëkk,
xanaa gental ba fåww.

Màngaan dootu fa samp xayma,
sàmm dootu fa gooral.

21 Ay rabi àll a fay goore,
kér ya fees aki looy,
bànjóoli dëkke fa,
kéwél di fa curpee.

22 Bukki mooy sabe fa tata ya,
till nangu kér yu bakkane ya.

Appu Babilon jege na, ay fanam du fi wees.

14

1 Aji Sax ji kay mooy yérëm askanu Yanqóoba,
dellu taamu xeetu Israyil wii. Moo leen di
sancaatal fa seen suuf, doxandéem yi fekki leen;
boole seen bopp ci askanu Yanqóoba. **2** Yeneen
xeet yeey delloo bànni Israyil ba seen réew,

mooma Aji Sax ji séddoo, bànni Israyil jàpp ca
 ñoom njaam, góor ak jigéen, ba teg loxo ña leen
 tegoon loxo, moom ña leen moomoon. ³ Bés bu
 leen Aji Sax ji teggilee seeni coonook seeni fitna,
 ba ngeen tàggook njaam gu metti, gi ñu leen
 doon jaamloo, ⁴ su boobaa nangeen woyal buuru
 Babilon léeb wii, ne ko:

«Moo nu ki daan note mujje?
 Nu mu mujjeek reewandee?

⁵ Aji Sax jee damm bant,
 bi ñu bon ñi daan dóoree!
 Moo damm seen yetu nguur,
⁶ wi ñu daan xadaruy dóor askan yi,
 dóor yu dakkul,
 di joggatee xeet yi xol bu tàng,
 topp leen, tëë ba.

⁷ Àddina yépp a féex, am jàmm,
 sarxolle jolleendoo.

⁸ Garab yi dul ruus, ak seedari Libaŋ sax
 di bége sab jéll,
 naan: “Ba nga daanoo ba tey,
 ab gorkat jógalu nu.”

⁹ Njaniiw ga fa suufa suuf yàkkamti na la,
 di la waaja gatandu,
 ba yeel la ndem-si-yàlla yi doon njiiti àddina
 yépp.

Moo yékkatee buuri xeet yépp seeni jal,
¹⁰ ñoom ñépp àddu, ne la:

“Yaw it mujj nga néew doole ni nun a?
 yaak nun de a mujj yem kepp!”

¹¹ Sa puukare gee tàbbisi nii njaniiw,
 yaak sa buumi xalam?
 Ay duusu di sa laltan,

ay sax di sa càngaay!

¹² Moo yaw biddiiwu njël, bi noon ràññ,
tey nga xàwwikoo asamaan ba fii!
Yaw mi daa daan xeet yi,
tey ñu gor la, nga goor.

¹³ Xanaa du yaa doon wax ci sam xel, naa:
“Maay yéeg kaw asamaan,
maay aj sama jal kaw biddiiwi Yàlla,
maay toogi kaw tundu ndaje ma,
fa catal bëj-gànnhaar.

¹⁴ Maay yéeg fa kaw niir ya,
ba mel ni Yàlla Aji Kawe ji!”

¹⁵ Teewul nga tàbbi njaniiw,
àkki ba ca xóotey pax ma.

¹⁶ Ku la gis ne la jàkk,
xel ma ne ci yaw, mu naa:
“Xanaa du kii a doon loxloo àddina,
yëngal réewi réew,

¹⁷ def àddina wérngal köpp ndànd-foyfoy,
tas dëkk ya,
te du jàpp nit ba yiwi ko?”

¹⁸ Buuri àddina yépp, ba ñu daj,
ñépp a tèdd tèraayu teraanga,
ku ci nekk ak bàmmelam.

¹⁹ Yaw, ñu xañ la bàmmel, sànni la,
nga mel ni car bu ñu foñ.

Yaa ngi ne lareet ci biir néew yu saamar bóom,
ñu tàbbal leen ci xeeri biir kèmb.

Yaa ngi mel ni médd mu ñuy joggati.

²⁰ Deesu la robaaleek yooyu buur,
yaa yàq sam réew,
faagaagal saw xeet.

«Deesul tuddati mukk askanu lorkat wii.
21 Waajal-leen fi ñuy rendi doom yi,
 feye leen seen ñaawtéefi baay,
 bala ñoo jógati, teg àddina loxo,
 ba tabax fu ne ay dëkk*.»

22 «Maa leen di jógal.»
 Kàddug Aji Sax jee, Boroom gàngoor yi.
 Mu ne: «Maay tenqi turu Babilon, tenqim
 ndesam
 ba ca seeni doom ak seen askan.»
 Kàddug Aji Sax jee.
23 Mu ne: «Maa koy def kérug siññéel,
 def ko ab tan,
 ba buube ko buubub rajaxe.»
 Kàddug Aji Sax jee, Boroom gàngoor yi.

Mbugal ñeel na Asiri

24 Aji Sax ji Boroom gàngoor yee giñ ne:
 «Lu ma nar déy mooy am,
 lii ma mébét, mooy sotti.
25 Maay joggati Asiri fi samam réew,
 dëggaate leen fi sama kaw tund yi,
 ba sama ràngi ñoñ rengiku,
 seenub sëf sippiku.»

26 Mii mébét lañu mébétal àddina sépp,
 bii loxo lañu xàccil xeet yépp.
27 Bu Aji Sax ji Boroom gàngoori xare yi dogalee
 dény,
 ana ku koy dogale?
 Bu xàccee loxoom,

* **14:21** 14.21 Manees na koo tekkee nii it: bay feesal suuf aku ay.

ana ku koy fommal?

Ab yéeneb waxyu ñeel na Filisti

²⁸ At ma Buur Axas saayee,
bii yéene jib na:

²⁹ Filistee, seen yetu gannaaw wi damm,
bu ko kenn ci yeen bége,
nde ci èkku jaan ji, la ñàngóor di génne,
am tostanam mujj di céebi.

³⁰ Su boobaa ñi gëna walaakaana am lu ñu for,
néew-doole ya goor, ànd ak dal.

Waaye yeen, maa leen di xiifal, ngeen dee ba
raaf,
xiif ba fàkkas ñi ngeen dese.

³¹ Yeen magi pénc mi, ñaawluleen!
Yeen waa dëkk bee, yuuxuleen!
Na Filisti gépp ne yàcc!

Bëj-gànnhaar déy la saxar jollee,
kenn du wuute gàngooru noon ya.

³² Lees di tontu xeet wi yónnee di laaj,
xanaa ne leen Aji Sax jee sanc Siyoñ,
te fa la baadooloy ñoñam di rawe.

15

Ab yéeneb waxyu ñeel na Mowab

¹ Yéene bii ñeel na Mowab:
Genn guddi déy la Ar Mowab, dëkk ba tas, ne
mes!

Genn guddi déy la Kir Mowab tas, ne mes!

² Nit ñaa ngi yéeg jëm kérug jaamookaay ga ca
Dibon,
ngir jooyi ca bérabi jaamookaay ya,

Mowab a ngay yuuxoo kaw tundu Nebo ak
 Medeba,
 boppoo bopp dib nel,
 sikkimoo sikkim xuufu,
³ nit ña sol saaku, di ñaawlu fa mbedd ya,
 ak kaw taax yaak pénc ya,
 ku ne di jooy ba say rongooñ wale.
⁴ Waa Esbon ak Elalee ngi yuuxu,
 seen baat àkki ba Yaxacc,
 xarekati Mowab dégg ca, yuuxoo,
 ne yàcc ne yasar!
⁵ Maay jooy Mowab jooyi xol,
 nit ñaa nga fay dawe ba Sowar,
 àkki ba Eglat Selisiya.
 Ña ngay yéeg jém Luwit, di jooyoo,
 awe yoonu Oronayim, di jalu.
⁶ Dexu Nimrim wow na,
 ñax wow, gàncax lax,
 dara naatatul.
⁷ Jél nañu lu ñu deseek lu ñu dencoon,
 yóbbu, jàll ca wàllaa xuru Garab ya.
⁸ Yuux déy maase na réewum Mowab,
 jooyoo ya ba Eglayim,
 jooyoo ya ba Beer Elim.
⁹ Dexu Dimon déy fees na ak deret,
 te ma nara wàcceel Dimon lu ko raw,
 ba ku r̀écce Mowab,
 ak ku des ci réew mi, ma booleek gaynde!

16

¹ Waa Mowab a nga naa:
 «Yónneelen boroom réew mi yóbbalu kuuy yu
 ndaw,

jële ko Sela, jaare mändiq ma,
yóti ko buurub Yuda fa tundu Siyon mu taaru.»

² Jigéeni Mowab a nga ca jéggikaayu dexu
Arnon,
mel ni picc yu tasaaroo fa seeni tàgg,
di fét-fétluy, naaw.

³ Ña nga naa njiiti Yuda:
«Xelal-leen nu, àtte nu,
lalal nu bëccëg ndarakàmm ker gu mel ni guddi,
yiire ko daw-làqu, yi nu doon;
buleen nu wor te nuy wuta raw!

⁴ Mayleen nu nun ñi rëcce Mowab, nu dal ak
yeen,
te ngeen làq nu bóomkat.»
Kiy note déy day jeexal, sëxëtoo dakk,
kiy lore ci réew mi jóge fi,
⁵ ab jal sampe fi ci ngor,
ki ci tooge jikko ju dëggü di askanu Daawuda
te di njiit luy sàkku yoon, yàkkamti njekk.

⁶ Noo dégg ni Mowab réye,
réya réy, reew te bew,
seeni kañu di waxi neen.

⁷ Moo tax Mowab di jooy ba ñéppi Mowab
jooyoo,
ndax namm reseñ ja woon ca Kir Eres,
ba ne yàcc, di binni.

⁸ Tool ya fa Esbon day wow,
njiiti xeet yee dëggaaate ngëneelu reseñ gu
Sibma,
te cabb ya laloon ba Yaser,
ba àkki déndu mändiq ma,
car ya law ba wàllaa géej.

⁹ Jooyi waa Yaser laay jooy reseñ ga fa Sibma,
yeen waa Esbon ak Elale, ma sange leeni ron-
goon̄,

nde fa ngeen di dajaleek fa ngeen di góobe,
coowal mbégtee fay dakke.

¹⁰ Mbégtæk bànnex ay toxoo seeni tool,
ay woy aki sarxolle noppee jibe seeni tóokér,
te nalkatu reseñ naltil fa mbànd ya!

Aji Sax jee dakkal coow li.

¹¹ Maa ngi yérém Mowab, bay binni ni buumu
riiti,
sama yaram daw ci Kir Eres.

¹² Mowab a ngoog ak coonoom,
ba muy deme fa bérab yu kawe ya,
dugg jaamookaayam di ñaan te du am.

¹³ Lii la Aji Sax ji waxoon bu yàgg ci mbirum
Mowab,

¹⁴ tey Aji Sax ji wax ne:
«Fileek ñetti at yu surga bu ñu bind waññ,
dees na sàggi sagub Mowab,
te li ñuy bare tey lépp,
seenum ndes ay néew lool te tekkeedi.»

17

Ab yéeneb waxyu ñeel na péeyub Siri

¹ Yéene bii ñeel na Damaas*: Damaas a ngii, léegi mu noppee doon ab dëkk,
xanaa ab jalu tojit;

² dëkki Arower gental,
gàtt yi jagoo,

* **17:1** 17.1 Damaas mooy péeyub Siri.

goore fa, kenn du leen dàq.

³ Tata dina tukkee diiwaanu Efrayim,
nguur foqe dëkk ba ñuy wooye Damaas,
te ndesu Siri du ëpp bànni Israyil daraja.
Kàddug Aji Sax jee, Boroom gàngoori xare yi.

⁴ Bésub keroog sagub Yanqóoba sàggiku,
yaram wa réer ko, mu jeex tàkk.

⁵ Day mel nim ngóob
mu loxol góobkat bay dal, di dajale gub ya.
Day mel ni ngóob ma ca xuru Refayeen,
⁶ fa dara dul des lu moy am poraat;
mu mel ni wittum oliw,
bu noppee ñaari doom ak ñett ay des ca kaw,
mbaa ñeent ba juróom ci car yi meññ.
Kàddug Aji Sax jee, Yàllay Israyil.

⁷ Bésub keroog nit sàkku Ki ko sàkk,
ba ne jàkk Aji Sell ju Israyil.

⁸ Dootu sàkkooti lenn ci sarxalukaay
yi mu sàkkal boppam.
Dootu sàkkooti yooyu mu defare loxoom,
du xer yi ñuy jaamoo Asera,
du yeneen sarxalukaayi cuuraay.

⁹ Bésub keroog seen dëkk yi tata wér,
dees na leen won gannaaw
ni dëkki Eween ñaak Amoreen ña[†],
ba leen bànni Israyil dàqee,
lépp ay doon ab gent.

¹⁰ Yeena fàtte Yalla ji leen di musal,

† **17:9** 17.9 Mbaa: ni gott yaak njobbaxtali tund ya,

bawuleen xel seen cëslaay jiy seen rawtu,
 xanaa di jëmbatal seeni tuur ay tooli ngëneel,
 di ji jiwu mu bawoo feneen.

11 Bés ba ngeen ko jëmbatee, ngeen gis mu sax,
 ëllëg ba bët setee, mu tóor,
 te ngóob réer bésüb wopp,
 ci biir mitit wu amul paj.

12 Ndeysaan, mii riirum gàngoor yu mag!
 Xeet yu bareey riir ni riirum géej,
 ànd ñarandoo ni géej gu sàmbaraax,
 gannax ya ñarandoo.

13 Xeet yaa ngi ñarandoo
 ni ndox mu baawaan,
 Yàlla gëdd leen, ñu daw ba sore;
 ngelaw yëngu, ñu naaw,
 ni boob, ba ca kaw tund ya,
 mbete pënd bu ngëlén wal, mu def callweer.

14 Ngoon a ngay jot, tiitaange ne jaas,
 balaa bët a set lépp jeex.

Lii mooy añub ñuy sëxëtoo,
 lii mooy deminu ñiy nangu sunu alal.

18

Waxyu jib na, ñeel réewum Kuus

1 Wóoy ngalla réew ma gunóor yay riire,
 ca tàkkal dexi réewum Kuus.

2 Yeen ñiy yónni biir géej, ay ndaw,
 ci gaali barax yu war mbeex mi;
 yeen ndaw yu gaaw yi, demleen,
 fekki xeet wu siggi, rattax yaram,
 askan wu ñu ragale fu jegeek fu sore,

xeet wu am doole, di falaxee,
te seenum réew defi wal.

³ Yeen waa àddina wérngal këpp,
yeen ñi dëkke suuf si,
séentuleen raaya ba sampe fa tund ya,
déglyleen liit ga ñuy wali.

⁴ Aji Sax ji kat da maa wax ne:
«Maa ngi fi ma tollu di xool, ne tekk,
ni tàngooru jant bu ne ràññ,
mbaa lay bu defu niir ci tàngooru ngóob.»

⁵ Bala ngóob di jot, te fekk lépp tóor,
ba tóor-tóor def reseñ ju xaay,
mu jël ab sàrt, dog car yu ndaw yi,
tenqi car yu mag ya, sànni;

⁶ ñu boole waccal njanaawi tund ya
ak rabi àll yi,
tan yi nawetoo ko,
rabi àll yépp nooroo ko.

⁷ Su boobaa ñu indil Aji Sax ji Boroom gàngoor
yi,
galag bu bawoo ci xeet wu siggi, rattax
yaram,
askan wu ñu ragale fu jegeek fu sore,
xeet wu am doole, di falaxee,
te seenum réew defi wal,
galag ba agsi ba tundu Siyoŋ,
fa Aji Sax ji Boroom gàngoori xare yi dëël turam.

19

Ab yéeneb waxyu ñeel na Misra

¹ Yéene bii ñeel na Misra:
Aji Sax jaa ngii war niir wu gaaw,

jëm réewum Misra.

Yàllantuy Misra yég ko, di lox,
fitu waa Misra rëcc.

² Maay xiir Misra ci kaw Misra,
kii song mbokkam, kii song xaritam,
ab dëkk jögal ab dëkk, diiwaan jögal diiwaan.

³ Waa Misra jànnaxe,
ma dëpp seen pexe.

Ñu seeti yàllantu yeek njuuma yi,
ak gisaanekat yeek boroom rawaan yi.

⁴ Maay teg Misra ci loxol sang bu néeg,
buur bu dëgér xol jiite ko.

Kàddug Boroom bee, Aji Sax ji ci gàngoor yi.

⁵ Ndoxum Niil ma day fer;
dex gaay ñiis, wow koñj,

⁶ solom ya xasaw,
wali Misra diib ba far ñiis,
barax ak lu mu xeetool lax,

⁷ gàncax ga leru dexu Niil
ak ga saxe fa dex ga dabe géej,
ak lu ñu jiwoon ca wet ga,
lépp ay wow, naaw, ba jeex.

⁸ Nappkat di jàmbat,
kuy sànnib oos dexu Niil di jooy,
kuy mbaal waaru,

⁹ kuy liggéey lëe am mbetteel,
kuy jàrt ak a ràbb poqe jommi.

¹⁰ Ñi yor réew mi dañuy sëngéem,
kuy liggéey di feyu am naqaru xol.

- 11** Kàngam ya fa Cowan* dañuy teqlikook seen sago,
 dinglekati Firawna yu xelu ya di digle ag ndof.
 Ma ne: «Yeen dinglekat yi, nu ngeen mana waxe Firawna naan:
 “Nun ay boroom xel lanu,
 sosoo ca buur ya woon”?»
- 12** Firawnaa, ana say boroom xel?
 Nañ la waxal boog, ba xamle li Aji Sax ji Boroom gàngoor yi naral Misra.
- 13** Kàngami Cowan a ngi def yëfi dof,
 kàngam ya fa Memfis, ñu nax leen,
 te njiiti giiri Misra lajjal seen waa réew.
- 14** Aji Sax jee miirloo Misra,
 gëlëmal ko ci lépp lu muy def,
 ni mändikat buy jang ba tarxiis cim waccoom.
- 15** Du lenn lu kenn manatee defal Misra,
 bopp akub geen du ci am pexe,
 te bantub tiir ak barax a ci yem.

Lu jëm ci muju Misra

- 16** Su bés baa waa Misra mel niy jigéen,
 di lox ndax tiit loxo bi jóg,
 te Aji Sax ji Boroom gàngoor yi xàccil-leen ko.
- 17** Yuday doon tiitaangey waa Misra,
 ba ku ñu ci tudd Yuda, nga tiit,
 ngir la leen Aji Sax ji Boroom gàngoor yi naral.
- 18** Su keroogee mu am juróomi dëkki réewum Misra
 yu nit ñay waxe làmmiñu ebrë,
 di fa giñe Aji Sax ji Boroom gàngoor yi,
 benn dëkk ba lañuy wooye Ir Ayeres,

* **19:11** 19.11 Cowan ak Memfis ay dëkki Misra lañu.

dëkkub yàqute.

19 Bésub keroog ab sarxalukaay ñeel Aji Sax ji,
fa digg réewum Misra,
aw xer it ñeel Aji Sax ji fa kemu réew ma,
20 loolu di firnde, ñeel Aji Sax ji Boroom gàngoor
yi,

di lu ko seedeel fa biir réewum Misra.
Bu ñu leen sonalee ba ñu woo Aji Sax ji,
mu yónnee leen ku leen wallu,
taxawu leen ba xettli leen.

21 Bésub keroog Aji Sax ji ci boppam mooy xamal
Misra mooy kan,

ba waa Misra xam Aji Sax ji,
di jaamoo Aji Sax ji saraxi gàtt ak saraxi pepp,
digook moom tey wàccook seeni dige.

22 Aji Sax jeey duma Misra
duma yu ànd akum paj,
ñu walbatiku ci Aji Sax ji,
mu nangul leen, faj leen.

23 Su keroogee mbedd bawoo Misra ba Asiri,
waa Asiri di dikk ba Misra,
waa Misra di dem ba Asiri
te Misra di jaamoondook Asiri.

24 Bésub keroog Israyil ñetteel Misraak Asiri,
di barke fi digg àddina.

25 Aji Sax ji barkeel leen, ne:
«Barke ñeel na Misra, sama ñoñ,
ak Asiri mi ma sàkke samay loxo,
ak Israyil sama séddoo.»

20

Kàddug waxyu ñeel na Misra ak Kuus

¹ At ma bummib Asiri demee ca ndigalal Sargon buurub Asiri, ba songi dëkk ba ñuy wax Asdodd ca Filisti, ba mujj ko nangu, ² fekk na Aji Sax ji wax, Esayi doomu Amocc jottli. Mu ne ko: «Demal summi tubéyu saaku ji nga sol, te summi say dàll.» Mu def noona, di doxe yaramu neen, tànki neen. ³ Gannaaw gi Aji Sax ji ne: «Esayi sama jaam bi def na yaramu neen, tànki neen lu mat ñetti at, muy firnde, di tegtal ci mbirum Misra ak réewum Kuus. ⁴ Te noonu la buurub Asiri di yóbboo ngàllo Misra, toxal waa Kuus, ñuy ay ndaw aki màggat. Yaramu neen, tànki neen lañuy def, seen taat ne fàñj, muy gácceg Misra. ⁵ Dañuy boole njàqareek gácce ndax réewum Kuus mi ñu yaakaaroon, ak Misra gi ñu doon sagoo.» ⁶ Bu keroogee ku dékke tefes googu dina ne: «Xanaa kay du ñii lanu yaakaaroon! Te nu dawoon di wuti ndimbal ci ñoom, ngir rëcc buurub Asiri! Léegi nag nu nuy mucce?»

21

Ab yéeneb waxyu ñeel na Babilon

¹ Yéene bii moo wàccal màndinj ma feggook géej ga:

Ni ag ngëlén di riddee jaare Negew
ni la noon di bawoo màndinj ma,
jóge réew mu raglu.

² Peeñu mu ñàng lañu ma ci wax.
Workat biy wor, yàqkat biy yàq.

Yeen waa Elam*, songleen; yeen waa Medd,
gawleen leen.

Dakkal naa mboolem onk yu ñu sabab.

³ Lii a waral sama njàqareg xol,
mitit jàpp ma, mel ni mititu mat,
ma jaaxle ba déggatuma,
jàq ba gisatuma.

⁴ Bopp ubu, tiitaange jàpp ma;
sama ngoonug bànnex
soppiku guddi gu raglu.

⁵ Ndab taaje, laltan lale,
ñuy lekk ak a naan.

Ñu jekki ne: «Yeen kilifa yi, jógleen!
Diwleen pakk yi!»

⁶ Boroom bi kat da maa wax, ne ma:
«Doxal taxawal ab jongrukat,
lu mu gis, wax ko.

⁷ Bu gisee gawar ci watiru ñaari fas,
ak ñu wari mbaam ak ñu wari giléem,
na teewloo teewlu bu baax.»

⁸ Jongrukat ba àddu ca kaw ne:
«Sang bi, maa ngii yendoo séentu,
fanaane wattu fii ma taxaw.

⁹ Ma ne gawar a ngii,
war watiru ñaari fas.

Nee: “Daanu nañoo, Babilon daanu na,
jëmmi tuuram yépp tasaaroo fi suuf!”»

¹⁰ Yeen bokk yi ñu bàcc ni pepp ca sama dàggga
ja,

* **21:2** 21.2 Elam am réew la mu bokkoon ci nguurug Pers, te di
ab diiwaan ci réewum Iraan mu jamonoy tey.

la ma dégge ci Aji Sax ji Yàllay Israyil Boroom
gàngoor yi,
wax naa leen ko.

Ab yéeneb waxyu ñeel na Duuma

¹¹ Yéene bii moo wàccal Duuma[†]:
Nit a ngi may wooye tundu Seyir, naan:
Jongrukat bi, lu des ci guddi gi?
Éy jongrukat bi, lu desati ci guddi gi?
¹² jongrukat bi ne:
«Bët set, mu guddeeti rekk,
Boo amee looy laaj, délsil laajaat ko.»

Ab yéeneb waxyu ñeel na Arabi

¹³ Yéene bii moo wàccal Arabi:
yeen cëggi askanu Dedan[‡],
mbooyum Arabi ngeen di fanaane.
¹⁴ Yeen waa Tema, dajejileen ak ña mar,
yóbbul leen am ndox.
Dogileen ñay daw,
may leen ñu lekk.
¹⁵ Ay saamar de lañuy daw;
saamar bu ñu leen xàccil
ak fitt gu ñu leen diir
ak tàngooru xare.

¹⁶ Aji Sax ji de da maa wax ne ma: «Fileek
menn at mu surga bu ñu bind waññ, sagub dëkk
bii di Kedar dina sàggiku, ¹⁷ li des ci jàmbaari
fittkati Kedar di lu néew.» Aji Sax ji Yàllay Israyil
wax na ko.

[†] **21:11** 21.11 Duuma ci Arabi la féete, feggook Seyir mbaa Edom.
Baat la itam buy tekki selaw, ci làkku yawut. [‡] **21:13** 21.13
Dedan ak Teman ak Kedar ay xur la yu waa Arabi dëkke.

22

Ab yéeneb waxyu ñeel na Yerusalem

¹ Yéene bii ñeel na xuru Peeñu ma:

Ana lu ngeen di yéege,

yeen ñépp seen kawi taax?

² Lu waral coow li ak xaxaloo bi,
ba dëkk biy riir?

Ñi ngeen deele, saamar reyu leen,
bóomuñu leen ci xare.

³ Seen njiiti xare yépp a bokk daw,
ñu jàpp leen te taluñoo fitte.

Seen njiit yi ñu gis yépp lañu jàpp,
te ñu dawoon ba sore.

⁴ Moo ma tax ne: «Buleen ma xool,
damay naqarlu, jooy.

Tàyyileen maa dëfal ci sama bokk yi sàngku.»

⁵ Lii kat bésüb njommite laak coonook toroxte,
bésu Boroom bi Aji Sax ji ci gàangoor yi,
ci biir xuru Peeñu mi.

Tata ja, ñu rëkka rëkk, mu màbb,
yuux jolli, àkki tund ya.

⁶ Waa Elam gàllooy fitt,
ñenn ña war watiir, gawar ya war,
waa Kir ñàbb pakk ya.

⁷ Seen xur yu nangu yaa fees aki watiir,
gawar taxaw temm buntu Yerusalem,

⁸ te Yuda ne duñj, dara wëru ko.

Su keroogee ngeen yaakaar ngànnayaay,
ya ca kér ga ñuy wooye Gott ba,

⁹ far gis ni ñu bëtt-bëttee tatay Yerusalem,
ji wér gox bi ñu naan Kér Daawuda.

Ngeen rooti ndox ca solom bu suufe ba, denc ko,

10 boole ca waññ këri Yerusalem,
màbb lenn, sàkk ca lu ngeen aare tata ya.

11 Da leen di fekk sàkk mbànd diggante ñaari tata
yi,
ngir denc ca ndoxum déeg bu yàgg ba.
Waaye xooluleen ki dogal lii,
xalaatuleen ki nasoon lii bu yàgg.

12 Bésub keroog Boroom bi,
Aji Sax ji ci gàangoor yi moo leen di woo
ci jooyoo ak ñaawlu
ak wateefu nel, ak colu saaku ngir ñaawlu.

13 Te yeena ngii ci mbég ak bànnex,
di rendi nag ak xar,
di yàpp ak a naan,
naan: «Nan lekk, naan, nde èllèg, nu dee!»

14 Aji Sax ji Boroom gàangoor yi dégtal na ma lii:
«Gii ñaawtéef déy deesu leen ko jéggal,
ba keroog ngeen di dee.»
Boroom bee ko giñ,
moom Aji Sax ji Boroom gàangoor yi.

Kàddug àrtu ñeel na Sebna

15 Boroom bi Aji Sax ji ci gàangoor yi dafa wax ne:
«Ayca, demal ba ca Sebna,
bëkk-néegu buur sii, nga ne ko:

16 Ana loo fi am, ak koo fi am?
Nga di fi yettu bàmmel, yett ko ca kawte ya,
di gaslu kér gooy mujje?

17 Jàmbaar, dama ne Aji Sax jee lay xalab;
da la naa nik,

18 fodonk la, rattax,
nga xalangoo àll bu ne màww.

Fa ngay dee,
 te fa la watiir yi ngay puukarewoo di des,
 muy sa gàccay waa kér sang.»
19 Aji Sax ji nee: «Maa lay jéle sa liggeey,
 foqatee la sa péete mu kawe.

20 «Bésub keroog ma woo sama jaam bi,
 Elyakim doomu Ilkiya, **21** solal ko sa mbubb,
 dooleele ko sa ngañaay, teg kilifteefu réew mi ci
 loxoom, ba mu féete wàllu baay, waa Yerusalem,
 ak waa kér Yuda. **22** Maa koy ràng caabiy kér
 Daawuda, muy ubbi te kenn du tøj; di tøj te
 kenn du ubbi. **23** Maa koy samp fu dëgér ni ab
 wékkukaay, mu doon sagu kér baayam. **24** Waa
 kér baayam ak seen daraja, ñépp ay wékku ci
 moom, car yaak caraat ya. Ndab yu ndaw yépp
 ca la, kopp ya ba ca njaq ya. **25** Bésub keroog,»
 kàddug Aji Sax jee, Boroom gàngoor yi, mu ne:
 «bant ba sampe woon fu wóor day simpiku. Dees
 koy gor, mu fàq, la ca sëfe woon dog.» Aji Sax ji
 déy wax na ko.

23

Ab yéeneb waxyu ñeel na Tir

1 Yéene bii ñeel na dëkk ba ñuy wax Tir*:
 Yeen waa gaali Tarsis ñi deeble, jooyleen!
 Lépp a yàqu!
 Du kér, du teeruwaay.
 Fa dunu Sippar[†] lañu leen ko waxe.
2 Yeen waa tefes,

* **23:1** 23.1 Tir ak Sidonay dëkk yu am solo la woon ca Fenisi, ci
 réew mi ñuy wax Liban tey. † **23:1** 23.1 Mbaa: dunu Kitim.

yaw Sidon laa ne, na say jula ñaawlu,
 yaw miy yónni nit ñu jaare géej,
³ war ndox ya ne xéew,
 peppum Sixor[‡] di sa tono,
 ak ngóobum Niil,
 ma xeet yi daan jula.

⁴ Yaw Sidon, gàcce ñeel na la,
 géej moo wax, tatay géej a ne:
 «Masumaa matu, masumaa jur,
 yaruma gone gu góor, yarumab janq.»

⁵ Bu xibaar ba àggee Misra de,
 ñu naqarlu deminu Tir.

⁶ Jàllal ba Tarsis§,
 yeen waa tefes ga fa ne, jooyleen jooyi dëj.

⁷ Xanaa lii du seen dëkk bu xumb ba,
 te cosaanam di janti démb,
 nit ña di fa jógey sancaani fu sore?

⁸ Ana ku fexeel lii Tir ma daan fale,
 ay julaam diy kàngam,
 di jaaykat yi àddina teral?

⁹ Aji Sax ji Boroom gàangoor yee ko fexe,
 ngir sàggi sagub képp ku fiy damu,
 ba teddadil képp ku àddina teral.

¹⁰ Yeen waa Tir, defleen ni dexu Niil, walal seen
 réew;
 kenn tereetu leen.

¹¹ Aji Sax ji tållal na loxoom, tiimale géej,
 yëngal réew yi,
 ba santaane ñu màbb tatay Kanaan.

¹² Nee yeen waa Sidon ñi mel ni janq bu ñu
 tédde,

‡ 23:3 23.3 Mooy dexu Niil. § 23:6 23.6 Ab sanc la bu bokkoon
 ci Tir, ca wàllu Espaañ.

dootuleen xaxaloo.

Ayca, dawleen jàlli ba dunu Sippar,
te du tax ngeen am fa noflaay.

¹³ Xool-leen li dal réewum Kaldeen ñi.
Dootuñu sax aw xeet.

Asiri wacce na leen rabi mändinj mi.

Tabax nañu, gaw ko, màbb këri buur ya, gental
ko.

¹⁴ Yeen boroom gaali Tarsis, yuuxuleen ni ñu
deeble,

seen tata màbb na!

¹⁵ Bu keroogee ñu fàtte Tir juróom ñaar fukki
at, ni àppu benn buur. Bu juróom ñaar fukki at
yi matee, Tir xewle la ñu woyal gànc ba, ne ko:

¹⁶ «Yaw gànc bi ñu wacc, fabal sa xalam, wér
dëkk bi,

xalamala xalam te gëna woy,
ndax ñu geesu la.»

¹⁷ Bu juróom ñaar fukki at yi matee, Aji Sax ji
dikkal Tir, ñu delluy liggéey, di feyu, di gànctook
mboolem réewi àddina fi kaw suuf ¹⁸ Waaye
seen ñaq ak seen peyoor, dees koy sellalal Aji Sax
ji, deesu ko dajaleek a denc. Ñi dëkk fi kanam Aji
Sax jeey jagoo njariñ la, mu di leen dundal ba ñu
regg, di leen solal col gu jekk.

Waxyu ñeel na mujug jamono

24

(Saar 24—27)

Mbugal daj na àddina

¹ Aji Sax jaa ngii di tas àddina,
tasaare ko,
salfaane li fi dénd bi,

wasaare ñi ko dëkke:
² sarxalkat beek baadoolo bi,
 sang akub jaam,
 njaatige lu jigéen ak ab janqam,
 jaaykat ak jëndkat,
 ablekat ak àbbkat,
 leblekat ak lebkat.

³ Àddinaa ne dunj̄ duñjaaral,
 dees koo futti ba mu ne furaas!
 Aji Sax ji kat wax na kàddu gii!
⁴ Suuf a ngi wowa wow, ne seren̄,
 àddina ne làcc, ne seren̄,
 kàngami xeeti àddina ne làcc.
⁵ Suuf si la ñi ko dëkke sobeel,
 ñoo wàcc yoon yi,
 xëtt ndigal,
 fecci kóllère gi sax dàkk.

⁶ Moo tax alkànde yàq suuf,
 ñi ko dëkke gàddu àq ji.
 Moo tax waa àddina raaf,
 ba ñi des di lu néew.

⁷ Biiñ ñàkk na,
 garabu reseñ lax,
 bépp xol bu tooyoon, binni.

⁸ Tabala ju xumb selaw na,
 ña daa xaxaloo dal,
 mbégtem buumi xalam dakk.

⁹ Kenn naanatul, di woy,
 ñoll wex na ka koy naan.

¹⁰ Dëkk bu gental tasaaroo na,
 kér yépp téje, kenn duggul.

¹¹ Mbedd maa ngi soowaloo,
 ndax biiñ bu ñàkk,
 gépp mbégte fey,

bànnexu àddina dëddu.
 12 Tojiti neen a des ci dëkk bi,
 bunt ba rajaxoo.

13 Noonu lay deme ci àddina,
 ci biir xeet yi,
 mbete benn-benni doomi oliw gu ñu gësëm,
 mbaa doomi reseñ yu des ca ndey ja,
 gannaaw bu ñu wittee ba sottal.

Ndes wi rëcc mbugal a ngi sant

14 Ña ngay xaacu di sarxolle,
 waa sowu di sàbbaal ci màggug Aji Sax ji.
 15 Yeen waa penku, sargal-leen Aji Sax ji boog,
 yeen waa duni géej, teral-leen Aji Sax ji Yàllay
 Israyil.

16 Cati àddina lay woy di jibe, nu dégg ñu naa:
 «Teddnga ñeel na Aji Jub ji!»

Coono jeexul

Waaye man dama ne: «Jeexle naa!

Jeeple naa, wóoy man!

Workat yaa ngi wora wor,
 ba far làaggi ci wor.»

17 Yeen waa àddina,
 kat-kat, pax akub caax dëgmal na leen.

18 Nga déggi yuux, daw,
 tàbbi biir pax,

génne pax,
 laawoob caax.

Mbàndi kaw kat ubbi na,
 kenug àddina di reng-rengi.

19 Suuf daa loroo loru,
 fetta fett,
 salfaaño salfaaño.

20 Suuf a ngi janga jang ni màndikat,
ba joy ni mbaar,
moyam diis ko gann,
mu daanu te du jógati.

Aji Sax jeey nguuru fa Siyonj

21 Bu bésub keroogee

Aji Sax ji dikke mbugal
gàngoor ya fa kawa kaw,
ak buuri àddina yi fi suuf.

22 Dees leen di boole denc cim pax,
ne leen ràpp tèj,

ba mu am ay fani fan, ñu mbugal leen.

23 Kersa la weer wiy am,
gàcce ñeel jant bi;

Aji Sax ji Boroom gàngoor yi daal,
mooy nguuru Yerusalem, kaw tundu Siyonj,
leeram ga jollee fa kanam magi ñoñam.

25

Cant jib na

1 Aji Sax ji, yaay sama Yàlla,
dama lay teral, di la sant.

Yaa defi jaloore,
muy dogal yu yàgg, wér te wóor.

2 Yaa def dëkk bi jali doj,
dëkk bii ñu dàbbli nga gental;
taaxu doxandéem yi noppee doon péey ba fàww,
te deesu ko tabaxaat.

3 Moo tax xeet wu am doole di la màggal,
waa péeyu xeet yu néeg di la wormaal.

4 Yaa di rawtub néew-ji-doole,
di rawtub aji ñàkk, biir njàqare,

yaay mbaar mu ñuy yiiroo waame,
di ker gu ñuy serloo ci tàangoor,
nde merum kilifa gu néeg
mooy waame wu ne yureet ci kaw miir.

⁵ Doxandéem yii diy noon,
ni ngay dàqe tàangoor fi bérab bu ne seren,
ni ngay dakkale seen coowal xare.
Ni aw tàangoor di dakke ndax aw niir,
ni la woyu ñu néeg ñi di selawe.

Bernde ñeel na xeet yépp

⁶ Aji Sax ji Boroom gàngoor yi,
mooy berndeel xeet yépp fi kaw tund wii,
bernde ju niin ak ngëneelu biiñ,
yàpp wa duuf, yuq ja ne xéew,
ak tànnéefu biiñ bu teey.

⁷ Fi kaw tund wii lay tukkile càngaay,
li sàng askanoo askan,

ak séru râbal bi ñu râbbal xeetoo xeet.

⁸ Mooy médd ndee ba fàww!

Boroom bi, Aji Sax jeey fompe
gépp kanam rongooñi boroom.

Buumi gâccef ñoñam it,
moo koy doge fépp ci àddina.

Aji Sax ji kat wax na ko.

⁹ Bésub keroog dees na ne:

«Sunu Yàllaa ngii nag!

Moom mii lanu yaakaaroon
te moo nuy wallu.

Aji Sax jii lanu yaakaaroon,
nan bég te bànnexoo wallam.»

Aji Sax ji tas na Mowab

10 Aji Sax ji kat teg na tund wii loxo,
te ni ñuy dëggaatee boobum leeñ,
ni lees fiy dëggaatee Mowab.

11 Mowab dina féqoo féqu,
mel ni kuy jéema féey,
waaye Aji Sax jee leen di torxal,
ñook seen manoore.

12 Seen tata yu kawe, mu fél, màbb;
rattax fi suuf, maasale.

26

Aji Sax jeey may ñoñam ndam

1 Bésub keroog dees na woy
wii woy fi réewum Yuda:
«Dëkk bu dëgér lanu am,
Yàllaa nu may kaarangey tata, biir ak biti!

2 Ubbileen bunt yi,
ba xeet wi jub te sàmm ngëm duggsi!

3 Yaw Aji Sax ji,
ku dogu, pastéefu, wóolu la,
nga may ko jàmm ju mat,
nde moo la wóolu.

4 Wóoluleen Aji Sax ji tey ak ëllëg;
Yalla Aji Sax ji déy,
moo mat cëslaay ba fàww.

5 Moo wàcce ñi dëkke woon fa kaw,
moo detteel waa dëkk ba aju woon,
daaneel leen, ñu xalangu,
ba mëq suuf,

6 baadoola joggi, dëggaate,
néew-ji-doole note leen.»

7 Ku dëggu, yoonam day maase;

ku dëggú, Aji Jub ji jubal xàllam.

⁸ Aji Sax ji, nu ngi lay xaar,
fi sa kaw yoonu santaane yi,
di la sàkku, ba la xel,
lii déy, mooy sunu nammeelu xol.

⁹ Xol laa lay sàkkoo guddi,
sama jëmm jepp di la laaj.
Bu say àtte teewee fi kaw suuf,
waa àddina xame ca njekk.

¹⁰ Ku bon, boo ko yérëmee,
du xam njekk.

Bir réew mu nit ñay jubal
lay xal di luubale,
du faale kawewaayu Aji Sax ji.

¹¹ Aji Sax ji, yaa xàcci sa loxo,
waaye yéguñu ko.

Won leen ni nga nabe ci sa ñoñ, ñu rus,
te sawaraay xoyom sa noon yooyu.

¹² Aji Sax ji, yaa nuy defal jàmm,
te lépp lu nu def, yaa nu ko sottalal.

¹³ Aji Sax ji sunu Yàlla,
yeneen sang yu la moy moom nañu nu,
waaye saw tur rekk lanuy màggal.

¹⁴ Yooyu sang dee nañu, nekkatuñu,
wuute nañu, jógatuñu.

Yaa def nii, faagaagal leen,
ba far sax seen tur.

¹⁵ Aji Sax ji, yaa yokk xeet wi,
yaw mii yaa yokk xeet wi,
yaa fésal sa teddnga,
yaa yokk mboolem kemi réew mi!

¹⁶ Éy Aji Sax ji, ci biir njàqare lañu la sàkkoo;

ba ñu tegoo sa mbugal,
lañu la déey seenug ñaan.

¹⁷ Éy Aji Sax ji, ni kuy matu
 lanu meloon fi sa kanam,
di wañaarook a yuuxu.

¹⁸ Danoo èmb bay matu
te jurunu lu moy ngelaw.
Indiwunu genn mucc ci àddina,
mayunu ci kenn lu ko taxa dund.

¹⁹ Waaye yaw askan wi, ñi nga deele
 ñnooy dellu dundaat,
seeni néew ay dekki,
ku doon nelaw sa biir bàmmeel,
yewwu, sarxolle.
Aji Sax jeej yebal lay bu ànd aki leer,
suuf délloosi ña dëddu.

Mbugal ñeel na géej ak jéeri

²⁰ Yeen samaw askan, ayca duggleen seeni néeg,
tëju ca biir.

Làquleen as lëf, ba sànj mi jàll.

²¹ Aji Sax ji kat a ngii di génne bérabam ba,
nara dikke waa àddina mbugalu ñaawtéef,
ba suuf wone deret ji ñu tuur fi kawam,
te dootu sàng ñi ñu bóom.

27

¹ Bésub keroog Aji Sax ji dikke saamaram
 bu jàmbaare, ñàng te réy,
ba dal ci kaw Lewiyatan, jaan ja ca xél wa,
Lewiyatan jaan jay wañaaruy dem,
ninki-nànkay géej jooju lay rey.

Aji Sax ji juboo naak ñoñam

² Bésub keroog, tóokëru reseñ ju neex am,
nangeen ko woy,

³ te man Aji Sax ji maa koy topptoo,
di ko suuxat saa su ne,
di ko wattu guddeek bëccëg,
bala koo kenn a song.

⁴ Mereetuma tóokér bii,
waaye lu ciy dég aki dagg,
ma dox wuti ko, xareek moom,
boole lépp xoyom.

⁵ Xanaa ku langaamoo sama kiiraay
te jàmmook man,
ba jàmmook man.

⁶ Ay bés a ngi ñew Yanqóoba saxi reen,
Israyil moomooy tóor, law,
ba feesal déndu àddinaak meññeef.

⁷ Defe ngeen ne Aji Sax ji duma na Israyil,
na mu dumaa ña leen duma woon?

Am bóomal na leen lu tollook
la seeni bóomkat bóomoon?

⁸ Ndànk-ndànk la jëflanteek ñoom,
ba mu leen toxalee,
dàqe leen noowam gu mag,
bésu ngelawal penku.

⁹ Nii la Yanqóoba jotoo ñaawtéefam,
nii la mujje am njéggalu bàkkaaram:
Day boole doji sarxalukaay bi yépp,
rajaxe ni doji kew,
xer wu ñuy jaamoo Asera dootu fa sampe,
mbaa sarxalukaayi suurukaay.

¹⁰ Dëkk bu ñu dàbbli mooy wéet,
gental, ne wëyën!
Fa la nag di fore,

fa lay goor, di lekk cari garab ya,
 11 car ya wow, damm,
 jigéen ñi dikk, xambe.
 Dañu di xeet wu dul dégg,
 ba tax ki leen sàkk yérëmu leen,
 moo leen bind te ñeewantewu leen.

12 Bésub keroog Aji Sax ji bàcc,
 dale ca dexu Efraat ba ca walum Misra,
 te yeen bànni Israyil, dees na leen for
 kenn-kenn, ba ngeen daj.

13 Bésub keroog liit gu mag jib,
 ña lañoon réewum Asiri délsi,
 ànd ak ña ñu tasaare woon biir réewum Misra,
 ba sujjóotalsi Aji Sax ji fa Yerusalem,
 fa kaw tund wu sell wa.

Xibaaru mbugal ñeel na ay xeet

28

(Saar 28—33)

Mbugal ñeel na Samari

1 Wóoy ngalla Efrayim*,
 kaala gu yànj ga ay màndikatam di sagoo!
 Taaram bu yéeme baa koy réer,
 ni tóor-tóor yu wow,
 te ma nga tonj ca coll†, wa ña biiñ man dëkke,
 fa tiim xur wu nangu wa.

* **28:1** 28.1 Efrayim mooy giir gu am solo ci fukki giir ya ca
 nguurug bëj-gànnhaar ga ñuy wax Israyil. Leeleeg muy tur wi
 ñuy wooye waa gox boobu. † **28:1** 28.1 coll mooy fa Samari
 nekk, di péeyub nguurug bëj-gànnhaar ga ñuy wax Israyil.

² Dégluleen, jàmbaar ju am doolee ngi dikkal
Boroom bi,
di tawub doji yuur, ngélén luy sàanke,
riddee riddi, sotti waame wu wale!
Loxoom la koy rattaxe fi suuf.

³ Dees na joggati kaala
gii màndikati Efrayim di sagoo.

⁴ Te tóor mu lax mi muy gànjaroo,
mu tege ca coll ya tiim xur wu nangu wa,
day mel ni figg ju ñor te jotul;
ka ko gis a koy gaaw witt, wonn.

⁵ Bésub keroog Aji Sax ji Boroom gàngoor yi
di kaala gu yànj, gànjar gu yéeme,
ñeel ndesu ñoñam,

⁶ mooy sol noowug dëgg kuy toog di àtte,
di jàmbaaral ñiy waññi noon yi song dëkk bi,
xare.

⁷ Nii itam ay naan biiñ bay térëf,
màndiw ñoll, di jang:
sarxalkat akub yonent la aw ñoll di térëfloo,
biiñ jànnaxe leen,
ñu màndiw ñoll, di jang,
bu ñu amee am peeñu, di térëf.

⁸ Seen taabal yépp a ngi taq ripp,
fépp di waccu ak mbalit.

⁹ Ñu naa: «Ana ku Esayi mii di jàngal?
Ana ku muy àgge xibaar?
Xanaa ku yàggula fer,
di doora bàyyi ween?

¹⁰ Ca rëdd wii, ca rëdd wee,
nàngam sii, nàngam see,
as tuut fii, as tuut fee.»

11 Xanaa boog nit ñu seen wax leerul,
 ñu diy làkk-kat,
 la Aji Sax jiy waxeek askan wii?

12 Moo leen waxoon ne leen:
 «Fii moo di nopplukaay bi,
 noppal-leen ku sonn.
 Fii a di dal-lukaay bi!»
 Waaye nanguwuñoo dégg.

13 Moo tax seen kàddug Aji Sax mujj di:
 «Ca rëdd wii, ca rëdd wee,
 nàngam sii, nàngam see,
 as tuut fii, as tuut fee.»
 Moo tax ñuy térëf,
 daanoo njaaxaanaay ba damm,
 di sërëx ak a keppu.

Doju doorukaay wee mat wéeruwaay

14 Kon nag yeen kókkalikat yi yilif
 askanu Yerusalem wii,
 dégluleen kàddug Aji Sax ji!

15 Yeena naay: «Danoo wólléranteek ndee,
 njaniiw lanu digool, ba du nu moom,
 ba bu yaru musiba dikkeek diisaayam, du nu
 laal?

Noo def ay fen sunu rawtu,
 ay wor di sunu làquwaay.»

16 Moo tax Boroom bi Aji Sax ji wax ne:
 «Maa ngii di déj fi Siyon aw doju coll,
 muy doju collu tannéef wu gànjure ngir kenu gi,
 te ku ko wéeroo doo gaawa daw.

17 Dëgg laay def nattukaay,
 njekk di sama buumu beteex,
 tawub doji yuur buub rawtub fen,
 wal ma mëdd làquwaay,

18 seen wólléranteek ndee neen,
seen digook njaniiw toxu,
yaru musiba dikk ak diisaayam,
wulli leen ba ngeen nooy.

19 Saa yu dikkee ne leen céex,
suba su ne mu ne jaas,
guddeek bëccëg, mu teew,
te bu jibee sax fit rëcc.»

20 Lal a gàtt ba deesu ci talli,
malaan cëkk ba matul càngaay[‡].

21 Aji Sax jeey jóg na woon
fa tundu Perasim,
xadaru na woon ca xuru Gabawon
njir jëf jëfam,
jëfam ju yéeme ja!

Moo nara liggéey liggéeyam booba,
liggéeyam bu tumurànke ba!

22 Tee ngeena baña kókkalee
bala ñoo teenjal seeni jéng?
Sànkute kat moo di dogal bi ma dégg,
mu bawoo fa Boroom bi, Aji Sax ji ci gàngoor yi,
di luy dikkal réew mi mépp.

Aji Sax jee xam doxalin

23 Teeyluleen te déglu sama kàddu,
teewluleen ba dégg samay wax.

24 Xool-leen ci lii: Ndax beykat bi day dëkke
gàbb,

di rëdd ak a gabbaat?

25 Bu gabbée ba toolam maase,

[‡] **28:20** 28.20 lal beek malaan mi ñuy wax fii, mooy misaal Misra
mi ñu yaakaaroon te du leen doy kiiraay.

du day sànni jiwum nisel§,
 wasaare jiwum kumin,
 daldi def bele bi ay saawo,
 sànni lors ba fa mu ko rëddal,
 doora suy bele bu dëgér ba ca wet ya?

26 Dees koo xamal yoon wa,
 te Yàllaam a ko ko jängal.

27 Mbàccum nisel watiir amu ca yoon,
 te deesul bàcc kumin itam, ba joggi ca tànki
 watiir.

Mbàccum nisel, yet a koy def;
 mbàccum kumin, bant bu yem.

28 Gubi bele, dees na ca jaare watiir,
 waaye deesu ci dëkk;
 watiir ngay takk, bàcce ko pepp,
 waaye doo ko bàcc ba mu far mokk!

29 Xel moomu it fa Aji Sax ji
 Boroom gàngoor yi la bawoo.
 Ndigalam a ni yéemee,
 pexeem màgge ni!

29

Mbugal ñeel na Aryel

1 Wóoy ngalla Aryelee, Aryel*,
 dëkk ba Daawuda dale.

Dundleen at ak at,
 amal-leen ci màggal ci kaw màggal.

2 Du tee ma wàcceel Aryel musiba,
 ñuy yuuxook a jooyoo.

§ **28:25** 28.25 nisel ak kumin ay xeeti safal la. * **29:1** 29.1
 Tur la wu ñuy wooye Yerusalem. Man naa tekki itam taalub
 sarxalukaay ba woon ca kér Yàlla ga.

Yerusalem ay mel ci man
ni Aryel, taalub sarxalukaay.

³ Maay dal ub dal, wér la,
gawe la ay tata,
jali jal, fuuge la.

⁴ Dinga suufe ba mel ni kuy àddoo biir suuf,
sa baat di ndéey lu dégtoo xóote ya pëndub suuf
lale,
mel ni njuuma lu waxam bawoo biir suuf,
baatam yeloo xóote ya pëndub suuf lale.

⁵ Say noon ay def gàangoor ni feppi suuf,
di naaxu nit ñu néeg, ñu ngelaw liy wal nib cox.
Loolooy jekki am, ca saa sa.

⁶ Aji Sax ji Boroom gàangoori xare yi moo lay
dikke
dénook suuf su yëngu ak riir mu réy,
ngelaw riddi, di ngélén,
ànd ak sawara wuy xoyome.

⁷ Mboolem xeet yu bare yiy xareek Aryel,
di song dëkk beeki tataam,
nar leena torxal,
ñoom ñépp ay mel ni gént mbaa njeneeru guddi!

⁸ Su boobaa mu mel ni ku xiif,
géntul lu moy di lekk,
yewwu rekk, biir ba wéet;
mbaa ku mar, géntul lu moy di naan,
yewwu rekk, loof, put ga wow koñj.
Noonu la gàangooru xeet yépp di nekke,
mboolem xeet yooyuy xaarejí fa Siyon!

⁹ Tendeefal, jommi rekk!
Gëmm, gumba rekk.

Ñiika mändi te du biiñ,
ñuy jang te duw ñoll!

10 Aji Sax ji déy yeen la wal
ngelawal nelaw yu xóot,
taf seeni gët, te ngeen di yonent yi;
muur seeni bopp te ngeen di boroom peeñu yi.

11 Peeñum xew-xew yii yépp ump na leen,
ni leen kàdduy téere bu ñu tay umpe.
Boo ko joxee ku jäng, ne ko mu jäng ko,
mu ne la manu ko, nde dees koo tay;
12 nga jox ko ku jängul, ne ko mu jäng,
mu ne la manula jäng.

13 Boroom bi nee: «Askan wii, làmmiñ lañu ma
jegee,
lori neen lañu may wormaale,
te seen xol sore ma.
Seen ragal ak man it,
njàngum tari kepp la.

14 Moo tax maa ngii di dellu wéyeek askan wii,
ay kéemtaan aki kiraama
yuy tiiñ boroom xel ak xelam,
réer xamkat ak xam-xamam.»

15 Wóoy ngalla ñiy làqu Aji Sax ji,
di loqal seen mébét,
ba lëndëm muur seen jëf,
ñu naan: «Ana ku nu gis?
Ana ku nu yég?»

16 Yeenaka juunum xel!
Dees na jaawale tabaxkatu njaq beek ban bi?
Ndax li ñu sàkk dina ne ki ko sàkk:
«Kii sàkku ma»?
Am njaq leey waxtaane tabaxkat bi naa:
«Kii manula tabax»?

La woon day wonni

¹⁷ Xamuleen ne fi leek lu néewa néew,
àllub Libaŋ sopplikub tóokér,
tóokér bi walbatiku meññ, ba ñu ne ab gott la?
¹⁸ Su bés baa ab têx dégg kàdduy téere,
silmaxa tàggook lëndém, di gis,
¹⁹ néew-doole yi dellu bége Aji Sax ji,
ní gëna ñakk di bànnexoo Aji Sell ju Israyil.
²⁰ Ku néeg déy dina neen,
kuy ñaawle sàngku,
te képp kuy yeeru nu mu defe lu bon,
dees na la dagg.
²¹ Mooy ñiy tuumaal nit,
di fir ab àttekat ca pénc ma,
di àtte ñakkal nit ku jub ci dara.
²² Moo tax Aji Sax, ji jotoon Ibraayma,
wax ak waa kér Yanqóoba, ne leen:
«Léegi Yanqóoba du rusati,
du amati yaraanga.»
²³ Bu am meññeefam gisee
li sama loxo def fi seen biir,
dinañu sellal sama tur,
sellal ma, man Aji Sell ju Yanqóoba.
Dinañu ma wormaal, man Yàllay Israyil,
²⁴ ba ñi réeroon, mujj xam;
ñurumtukat yi dégg ndigal.

30

Misra du mat Israyil cëslaay

¹ Wóoy ngalla doom yii diy fippukat!
Kàddug Aji Sax jee.
Ñu ngi nas mébét yu ma diglewul,

di digoo digoo yu ma leen xelalul,
di tegle bàkkaar ci kaw bàkkaar.

² Noo dox wuti Misra te laajuñu ma,
xanaa di sàkku rawtub Firawna,
di keppaaroо keppaarug Misra*.

³ Rawtub Firawnaay mujj di seen gàcce,
keppaarug Misra di seen toroxte.

⁴ Seeni jawriñ a nga xaat ba Cowan,
seeni ndaw àgg ba Anes[†],

⁵ waaye ñoom ñépp kersa lañuy ame Misra,
googu leen dul amal njariñ.

Du ndimbal, du njariñ,
xanaa gàcceek toroxte.

⁶ Yéeneb waxyu bii ñeel na malay àllub Negew:
Réewum tiis laak njàqare,
kérug gayndeeki segg,
ak saamaan ak céebi,
mbaam lañu sëf seen alal, jaare fa,
giléem lañu sëf seeni denc,
jëme xeet wu leen dul jariñ.

⁷ Ndimbalu Misra, còolóolu neen!
Moo tax ma tudde ko:
Raxab, ponkal mi ne yàcc.

⁸ Aji Sax ji nee:
«Ayca, bind ko ci àlluwa, ñu gis!
Rëdd ko cib téere,
 ngir èllég ak sibbir,
 mu dib seede ba fàww.»

⁹ Wii xeet kat ay fippukat lañu,

* **30:2** 30.2 Misra lañu yaakaaroon mu aar leen ci Asiri. † **30:4**
30.4 Cowan ak Anes ci Misra lañu bokk.

yii doom a diy fen-kat
 te nanguwuñoo sàmm yoonu Aji Sax ji!
¹⁰ Boroom ngis, ñu ne ko: «Bul gis,»
 boroom peeñu, ñu ne ko: «Bu ñu firil peeñuy
 dëgg.
 Wax nu lu neex,
 gisal nu ay nax.»
¹¹ Moyal yoon wi;
 lajj, wàcc xàll wi,
 te may nu jàmm ak Aji Sell ju Israyil.
¹² Moo tax Aji Sell ju Israyil wax ne:
 «Gannaaw yeena xalab kàddu gií,
 yaakaaruleen lu moy doole ak pexey njubadi
 yu ngeen wéeroo,
¹³ googu ñaawtéef ay mujj doon
 seen xar-xaru tata ju kawe,
 funki, tata ja jekki jóoru.
¹⁴ Da naan taras ni njaqal xandeer
 lu ñu naan rajax te ñéebeluweesu ko,
 ba deesul gis ca tojit ya, dog bu tibb xal,
 mbaa mu as ndoxum déeg.»
¹⁵ Ndax Boroom bi Aji Sax ji,
 Aji Sell ju Israyil dafa wax ne:
 «Délsi, dal-lu moo leen di musal.
 Ne tekk te wóolu maa leen di dooleel.
 Waaye yeena buggul!
¹⁶ Yeena ne: “Déedéet, danuy war fas, daw!”
 Dingeen daw moos!
 Ngeen ne: “Daamar yu gaaw lanuy war.”
 Ñi leen di dàq it di war daamar yu gaaw!
¹⁷ Junneey daw fu leen kenn gëdde,
 juróom gëdd, ngeen daw yeen ñépp,

ba ña des mel ni bantub raaya ci kaw tund,
ne cundum ni raaya bu wéet ca coll wa.»

¹⁸ Aji Sax ji déy a leen namma baaxe,
moo ko tax di jóg moos ngir yérëm leen,
nde Aji Sax jeey Yàllay njubte.
Ndokklee képp ku ko yaakaar!

¹⁹ Yeen waa Siyon, yeen waa Yerusalem,
dootuleen jooy mukk!

Bu ngeen jooyee, mu yérëm leen moos;
bu leen di dégg, di leen nangul.

²⁰ Boroom bee leen di leel njàqare,
nàndal leen coono,
waaye moo leen di jàngal, dootu leen làqu;
dingeen gis ki leen di jàngal,

²¹ di dégg kàddu guy jibe seen gannaaw,
naa leen: «Yoon waa ngii, jaareleen fi;»
bu ngeen awee ndijoor, mbaa càmmoñ.

²² Su boobaa ngeen sobeel seen jëmmi tuur yi ñu
xoob xaalis;

ak wurus wu xoob seen tuur yi ñu móol,
ba boole lépp sànni ni sagar yu sobewu,
ne ko: «Sore nu!»

²³ Su boobaa Aji Sax ji tawal lu ngeen ji,
may leen pepp mu suuf meññ,
sakkan te nangu,

seen juri keroog di fore parlu yu yaa,

²⁴ Nag yeek mbaam yi yiji sax,
di xontoo cox bu ñu xorom,
jóge ci mbàccum roq ak ngaska.

²⁵ Te tundoo tund wu kawe,
wu mag ak wu ndaw,
wali ndox a cay wale,

keroog bés ba deret di tuuroo tuuru,
tata ya jóoru.

²⁶ Weer day leer ni jant,
jant gënatee leer,
mel ni juróom yaari bëccëg,
bésüb keroog ba Aji Sax jiy takk damm-dammu
ñóñam,
fajal leen góom yi ay dóoram sabab.

Aji Sax ji song na Asiri

²⁷ Aji Sax jaa ngii, jóge fu sore;
mer ma réy,
mu jógaale kàddug àrtu gu diis,
di waxe xadar ju mat sëkk,
baat ba mel ni sawara wuy xoyome,
²⁸ noo ga di wal mu baawaan,
tollu ci put;
mu nara segge xeet yi ab seggukaayu alkànde,
wewal xeet yi ag laab gu leen di réeral.

²⁹ Teewul, bokk yi, seen woy yay jib;
mel ni guddig màggal,
ànd ak mbégte ni kuy toxoro,
yéeg jém kaw tundu Aji Sax ji,
cëslaayal Israyil.

³⁰ Aji Sax jeey yékkati kàddoom gu màgg,
wone diisaayu loxoom,
ànd ak tàngooru meram,
ak sawara wuy xoyome,
ak waameek ngélén, ak tawub doji yuur.

³¹ Kàddug Aji Sax jeey jib,
Asiri tiit bay lox,
yetu Aji Sax ja dal,
³² te saa yu yet wa Aji Sax ji féetale Asiri dalee,

ngeen jibal am tègg aki xalam.
 Aji Sax jeey xàcci loxoom, xareek Asiri.
³³ Xambees na démb ab taal bu ñuy wax Tofet‡,
 te buur ba lees ko waajalal;
 dees koo xóotal, yaatal ko,
 sawara way tàkk, matt ma ne gàññ,
 noowal Aji Sax ji nar caa tàkke,
 di sël-sëli ni walum tamarax.

31

Musiba ñeel na ku yaakaar Misra

¹ Wóoy ngalla ña wàcci Misra, di wuti wall;
 di sukkandikoo ay fas,
 tey yaakaari watuir ndax bare ga,
 aki gawar ndax lim bu takku ba
 te xooluñu ci Aji Sell ju Israyil,
 sàkkuwñu kooku di Aji Sax ji.

² Moona moom it xareñ na,
 mane na safaan,
 te du fommi digeem.

Kuy def lu bon, mu dal ci waa këram;
 kuy def lu ñaaw, mu song ay wallam.

³ Waa Misra, niti neen, duñu Yàlla;
 seeni fas it, suuxu neen, duñu leneen.
 Aji Sax jeey xàcci loxoom,
 kiy walloo mooy tèrëf,
 ki ñuy wallu daanu,
 ñoom ñépp bokk sàñku.

⁴ Aji Sax ji déy da maa wax ne ma:

‡ **30:33** 30.33 Tofet mooy bérab ba ñu daan lakke ay gone yu ñu def sarax, ñeel tuur ma ñuy wax Moleg.

«Gaynde gu mag ak gu ndaw, bu jàppée bay
 xiiru,
 boo ko wooloon gàngooru sàmm it,
 duñu soowaloo ba xébal ko,
 duñu ñolñoli ba mu dellu gannaaw.
 Noonu la Aji Sax ji Boroom gàngoor yi y wàcce,
 xaresi fi kaw tundu Siyon ak waa tund wa.»

⁵ Ni picc di daayaarloo, aar am tàggam,
 ni la Aji Sax ji Boroom gàngoor yi y yiire
 Yerusalem.
 Mooy aar, di xettli,
 mooy musal, di yiwi.

⁶ Éy bokki Israyil, fippu ngeen Aji Sax ji ba
 sës, waaye walbatikuleen! ⁷ Bésub keroog ku ne
 sànni yàllantuy xaalisam, ak yàllantuy wurusam
 yi mu sàkke woon loxoy bàkkaaram.

⁸ Asiri nag day daanu,
 te saamaru nit du ko daaneel,
 saamar bu doom aadama moomul a koy alag,
 mu daw, won saamar gannaaw,
 ay gone yu góoram dugg liggeeyu sañul-bañ.

⁹ Ñi ñu yaakaar dañuy tiit, ne wëqet,
 seeni kilifa jàq, ba daw wacc raaya ba.
 Kàdug Aji Sax jee,
 Boroom sawara wi ci Siyon,
 Boroom taal bi ci Yerusalem!

32

Dëgg ay mujj

¹ Buur a ngii, njekk lay nguuroo,
 jawriñ ñi it, yoon lañuy yilifee;
² ku ci nekk mel ni seelukaayu ngelaw,
 di kiiraay ci ngëlén,

mel ni wali ndox ci suuf su ne serenj,
 mbaa keppaaru doj wu mag ci àll bu mar.
³ Su boobaa gëti njàccaar yi dootuñu gëmm,
 te noppí ñiy dégg dañuy teewlu,
⁴ ku yàkkamti di ràññee, ba mana xam,
 làmmiñu ku dër gaawa wax lu leer.
⁵ Booba deesatul wooye ab dof, gor si,
 te njublañ dootu dégg «ku tedd ki.»
⁶ Ab dof, waxi dof lay wax,
 xel ma di nas ñaaawtéef,
 mu nar jëf ju teddadi.
 Lu ñaaaw lay wax, jëme ci Aji Sax ji,
 di xiifal ku xiif,
 di xañ ku mar lu mu naan.
⁷ Ab njublañ, ay pexeem musiba la.
 Njekkar lay nas,
 ba bu néew-ji-doole sàkkoo dégg it,
 mu fen ba lor ko.
⁸ Waaye gor si, ngor lay mébét,
 te ngor lay wéye.

⁹ Yeen jigéen ñi dal xel,
 taxawleen temm, déglu ma;
 yeen janq ji féex,
 teewluleen ma.
¹⁰ Yeen jigéen ñi dal xel,
 fi leek at aki fan ngeen jàq;
 witt mi du baax, ngóob du taxaw.
¹¹ Jigéen ñi dal xel, ragal-leen;
 yeen ñi féex laa ne, tiitleen!
 Futtikuleen, ba ne dunñj;
 gembooy saaku, ñaaawloo.
¹² Fëggleen seen dënn,

jooy tooli bànnex ya,
 jooyleen reseñ ju nangu ja,
¹³ ak sama suufas bokk,
 ya ay dég aki dagg nangu.

Jooyleen kay kér ya ca mbégte ma,
 ak dëkk bu xumb ba.

¹⁴ Kér gu rafet sax, dees koy wacc,
 dëkk baak riiram, dees koy dëddu;
 tund ak tóoju doon ay xunti ba fàww,
 mbaamu àll ne ca finaax, jur ga di ca fore,
¹⁵ ba keroog leeru xel sóobale nu fa kaw,
 màndij mi sopplikub tóokér,
 tóokér meññ, ba ñu ne ab gott la.

¹⁶ Su boobaa yoon dékke màndij mi,
 njekk tooge tóokér bi.

¹⁷ Su booba njekk ay jur jàmm,
 njekk ay dalal, di aare ba fàww,
¹⁸ ba sama bokk yi dékke sancub jàmm,
 ci dëkkuwaay yu wóor,
 dal-lukaay yu dal xel.

¹⁹ Gott bi day daanu ci tawub doji yuur,
 dëkk bi detteelu ba ne dett.

²⁰ Waaye ndokkleee yeen ñi tala ji fépp fuy ndox
 te saña afal nag ak mbaam.

33

Ña daan sàanke sàndu nañu

¹ Wóoy ngalla yaw bóomkat bi kenn bóomul,
 yaw workat bi kenn worul.

Boo noppee bóome, ñu bóom la,
 te boo noppee wore, ñu wor la.

² Éy Aji Sax ji, ngalla baaxe nu;

yaw lanu yaakaar!
 Xëyeel a dooleel wii xeet,
 wallu nu ci biir njàqare.

³ Sam riir jib, xeet yi fëx;
 nga jóg, waaso yi félxoo.

⁴ Dees na sëxëtoo sa alal sëxëtoob soccet.
 Dees na ko sam ni njéeréer di samee!

⁵ Aji Sax jee kawe,
 moo dëkke fa kawa kaw,
 te mooy dajal fi Siyon njekk ak yoon.

⁶ Liy dalal seen jamono mooy
 koomu ndam; xel ak xam-xam,
 te ragal Aji Sax ji, loolooy seen alal.

⁷ Xool-leen seen jàmbaar
 ñiy yuuxoo ci mbedd mi,
 ndawi jàmm yaa ngii,
 di jooyoo jooy yu metti.

⁸ Yoon yaa ngi wéet,
 kenn jaareetul ci ñall wi!
 Kóllëre fecciku na,
 xeebees na ay seede,
 te kenn faaleetul doom aadama.

⁹ Suuf a ngi maral, wow konj,
 gottub Liban am gácce, lax,
 àllub Saron doon joor gu wow,
 garabi Basan ak Karmel yëngu, di ruus.

¹⁰ Aji Sax ji nee: «Xaaral rekk ma jóg,
 xaaral rekk ma ne ñokket,
 xaaral rekk ma teewal samag kawe.

¹¹ Seeni mébét di boob,
 bu sottee dim ngoon;
 seen noowug bopp mooy xamb sawara,

wi leen di xoyom.

12 Xeet yeey sàñku
ni doj yu lakk ba doon kew,
mbaa taxas yu ñu buub,
sànni ci sawara, mu tàkk.

13 Yeen ñi sore, dégluleen li ma def;
yeen ñi jege, xamleen ne maa am doole.»

14 Bàkkaarkati Siyonj tiit nañu,
way-gëmadi yaa ngay lox.

Ana kan ci nun moo mana dal ak
sawara suy xoyome*?

Ana kan ci nun moo mana dal ak
taal yu yànj ya dul fey?

15 Xanaa kiy doxe njekk,
di wax njub,
bañ alalu foqati;
loxo bay jalax ab ger,
noppam di tanqamlu waxi bóome,
bëtam di gëmm, ba du gis lu bon.

16 Ku ni mel, bérab bu kawe lay dëkke,
doj yu ñu dàbbli di rawtoom,
dundam doy,
te ndoxam du ñàkk.

Yerusalem mucc na cib noon

17 Yaw mi mel nii, buur bi ci taar bi ngay teg bët;
yaay gis réew mi ne màww.

18 Sam xel dem ca sa tiitaange ja woon,
nga ne: «Moo, ana ka doon waññ?
Ana ka doon natt diisaayu galag?
Ana ka doon waññiy tata?»

* **33:14** 33.14 sawara: seetal ci 30.27 ak 31.9.

19 Su boobaa dootoo gis xeet wii di jaay doole,
xeet wii diisu làkk ba déggeesu ko,
taqu làmmiñ ba xameesul lu ñuy wax.

20 Xoolal Siyon, dëkk ba nuy màggale;
yaay teg bët Yerusalem, dëkkuwaay bu dal ba,
xayma bu deesul sempi,
wewukaay ya deesu ko buddi mukk,
te luy buumu xayma ya it, deesu ko dog.

21 Foofa déy la nu Aji Sax ju màgg ji
di nekkal bérab bu defi dex aki wal,
fu gaalu joow dul dawe,
te gaal gu mag du fa jaare,
22 Aji Sax jee nuy jiite,
Aji Sax jee nuy dogalal yoon.
Aji Sax jeey sunu buur!
Moom moo nuy wallu.

23 Yeen nag seen réew mi gaal la,
gu goj ya yolom,
ponk ba ca digg ba di yëngu,
ba ndimol gaal gi firikuwul.
Dees na séddoo lël ju ne gàññ,
ba làggi ya sax séddu ca.

24 Du kenn ci waa Yerusalem,
ku neeti wopp na.

Waa dëkk bépp ay am njéggalu bàkkaar.

Gannaaw mbugal, mbégte

34

(Saar 34—35)

Mbugal ñeel na Edom

1 Yeen xeet yi, jegesileen te déglu;
yeen askan yi, teewluleen!

Na suuf ak li ci biiram déglu,
muy àddinaak lépp lu mu jur.

² Merum Aji Sax ji ñeel na xeetoo xeet,
am sànj ñeel gàngoori xeet yi.

Aji Sax ji faagaagal leen,
dogal ñu war leena rendi.

³ Seeni néew lees di xalab,
ñu médd, xet ga gilli,
seen deret la tund yiy sangoo.

⁴ Gàngooru asamaan gépp ay tasaaroo,
asamaan taxañe ni lémësub kayit,
gàngooram gépp ruus
ni xobu reseñ mbaa figg gu lax.

⁵ Aji Sax ji nee: «Saab saamar a reye fa asamaan
ba màndi deret,
te mu ngii di wàccal Edom,
xeet wi may faagaagal, ngir àttee leen ko.»

⁶ Aji Sax jee yor saamar bu màndi deret,
yafloo nebbon,
ak deretu kuuy mu ndaw ak bëy,
ak nebbonu dëmbéenu kuuy.

Aji Sax ji kat moo am ab sarax fa Boccra,
muy tér mu réy fa réewum Edom.

⁷ Nagi àll yaay ànd ak ñoom daanu,
ñook yëkk yu ndaw yaak yu mag ya,
seen réew mi màndi deret,
suuf sa niin batt ak nebbon.

⁸ Bésub feyu la, Aji Sax ji di ca feyoo;
mooy at mi Edom di yooloo la mu loroон Siyon.

⁹ Wali Edom di ca soppliku koltaar,
pëndub suufam doon tamarax,
suufam mel ni koltaar buy lakk,

¹⁰ guddeek bëccëg, du fey,
saxar sa day gilli ba fàww,
réew ma gental giiru jamono,
te deesatu fa jaare mukk.

¹¹ Céeleek siññéel a koy nangu,
looy ak baaxoñ dëkke fa.

Buumu beteex lees koy natte, maasale,
ba mu ne maraas, ne wëyën.

¹² Garmi ya dootuñu fa teewe,
ba di fa samp nguur,
te seen kàngam yépp ay wuute.

¹³ Seen kér buur ya la dég ya di lawe,
gajj aki taxas saxe tata ya,
till dëkke,
bànjooli tàgge,

¹⁴ rabi mändij mi di fa dajeeki bukki,
bëyu àll di fa wooye moroom ma.

Fa la rabu guddi di dal-loo,
fakkal fa boppam ab dal.

¹⁵ Fa la luy nen di tàgge, nen fa,
bóof, ba tostan, yiire keppaaram;
tan ya bokk fa daje,

ku ci nekk ak moroom ma.

¹⁶ Seet ko ci téereb Aji Sax ji, jàng ko;
du menn mala muy wuute ca gent ba,
lu ci nekk a fay ànd ak moroom ma.

Aji Sax jee ko santaane ci gémmiñam,
moo leen di dajale, moom ci boppam.

¹⁷ Moom moo leen ko muurale,
sédd leen suuf sa ci loxoom,
ñu séddoo ko ba fàww,
màkkaanoo ko maasoo maas.

35

Yoonu ñibbi Siyoŋ taxaw na

¹ Màndiq ak suuf su ne sereŋ dina bég,
joor gu wow bànnexu, tóor ba ne ràññ.

² Day tóora tóor,
di bànnexu, bay sarxolle,
ba jagoo darajay gottub Libaŋ
ak taaru àllub Karmel ak Saron.
Foofa lees di gise darajay Aji Sax ji,
sunu taaru Yàlla.

³ Ku yoqi, dooleel-leen ko,
ku óom yay fenqe, jàappleen ko.

⁴ Ku fitam rëcc, ne leen ko:
«Dëgërlul te bul tiit.
Sa Yàllaa ngii di la feyul,
ba yool say noon.

Moom mooy dikk, wallusi la.»

⁵ Su boobaa gëti silmaxa muriku,
noppi tëx sikkliku.

⁶ Su boobaa ab làggi ne jàyy ni kewél,
ab luu sarxolle.

Am ndox ay fettaxe màndiq ma,
ay wal wale joor gu wow,

⁷ suuf su wow doon ub déeg,
joor gu maral ballal bëti ndox.

Fa till fakkoon, di fa goore,
gattax ak barax a fay sëqe.

⁸ Foofa law yoon di jaare,
ñu di ko wooye Yoon wu sell wi.
Ku sobewu du fa jaare,
ñi moom woowu yoon,
ñooy ñi koy topp.

Ab dof sax du fa lajje.

⁹ Gaynde du fa am,
rab wu aay du fa dox,
du lenn lees fay gis,
ku ñu jot rekk a fay jaare.

¹⁰ Ni Aji Sax ji xettleey délsi,
duggsi Siyon, di sarxolle,
kaalawoo bânnex bu sax.
Mbég ak bânnex a leen di dab,
naqaraku tiis dëddu leen.

Lu jëm ci Buur Esekiya

36

(Saar 36—39)

Asiri song na Yuda

¹ Gannaaw gi, ca fukk ak ñeenteelu atu nguurug Esekiya buurub Yuda, ca la Senakerib buurub Asiri dikk song mboolem dëkki Yuda ya tata wér, daldi leen nangu. ² Buurub Asiri moo yebale fa dëkk ba ñuy wax Lakis, bëkk-néegam Rabsake, mu ànd ak mbooloo mu réy, ba ca Buur Esekiya ca Yerusalem. Ba Rabsake agsee ba tollook solomu mbàndum kaw ma, feggook yoon wa jëm ca toolub fóotukaay ba, fa la taxaw.

³ Ba loolu amee bootalub buur Elyakim doomu Ilkiya moo ànd ak Sebna, bindkat ba, ak doomu Asaf, Yowa ma yor téere ya, ñu dikk dajeek moom. ⁴ Rabsake bëkk-néegu buurub Asiri ne leen: «Waxleen nag Esekiya ne ko: Buur bu mag ba, buurub Asiri dafa wax ne: "Sa yaakaar jii nga yaakaar, ana foo ko teg? ⁵ Noon naa làmmiñ kese doy na pexeek njàmbaar cib xare? Ma ne:

Ana kan nga yaakaar bay fippu ci sama kaw?
⁶ Misra daal, nga yaakaar, bantu barax bu tas
 boobu di sokk képp ku ko wéeroo! Firawna
 buuru Misra de, mooy boobu bant ci képp ku
 ko yaakaar. ⁷ Xanaa doo ma ne seen Yálla Aji
 Sax ji ngeen yaakaar? Xanaa du moom nga toxal
 bérabi jaamookaayam yeek sarxalukaayam, ba
 noppi ne waa Yerusalem ak Yuda sarxalukaay
 boobu lañuy sujjóotal?” ⁸ Léegi daal, déggool
 rekk ak sama sang buurub Asiri, ma jox la ñaari
 junniy fas, ndegam am ngay gawaram! ⁹ Ana
 noo mana tewe ki gëna tuut ci sama jawriñi
 sang? May wax ngay yaakaare Misra ay watuir
 aki fas. ¹⁰ Te sax, xanaa du Aji Sax ji laa àndal
 ba dalsi fi kaw réew mii, ngir tas ko? Aji Sax
 ji ci boppam moo ma ne: “Songal réew mii,
 tas ko!” ¹¹ Ba loolu amee Elyakim ak Sebna
 ak Yowa ñaan Rabsake, ne ko: «Ngalla, lakk
 nu arameen, dégg nanu ko. Bu nu wax ebrë,
 mbooloo mi ci kaw tata ji di ci dégg.» ¹² Bëkk-
 néeg ba ne leen: «Ndax yeen ak seen sang donj
 la ma sama sang yóbbante kàddu yii? Ni toog ci
 kaw tata ji dañu cee bokkul? Te ñu nara ànd ak
 yeen lekk seen jonkani bopp, naan seenum saw!»
¹³ Bëkk-néeg ba nag taxaw, xaacu ca kaw ci ebrë
 ne: «Dégluleen kàdduy buur bu mag bi, buurub
 Asiri. ¹⁴ Buur dafa wax ne: “Bu leen Esekiya nax,
 ndax manu leena xettli. ¹⁵ Te bu leen Esekiya
 yaakaarloo Aji Sax ji, naan leen: ‘Aji Sax ji moo
 nuy xettli moos, te deesul teg dëkk bii ci loxol
 buurub Asiri!’ ¹⁶ Buleen déglu Esekiya. Buurub
 Asiri kat dafa wax ne: Jàmmookeen ak man te

ngeen génn dëkk bi, dikk nangul ma. Su ngeen ko defee, ku nekk ci yeen mana lekk ak jàmm ci garabu reseñam, lekk ak jàmm ci figgam, di naan ndoxum teenam, ¹⁷ ba keroog may dikk, yóbbu leen réew mu mel ni seen réew mi, réewum pepp ak ndoxum reseñ, réewum mburu ak tooli reseñ. ¹⁸ Bu leen Esekiya sànk, naan leen: ‘Aji Sax ji moo nuy xettli.’ Ndax tuuri xeet yi mas nañoo xettli réewu wenn xeet ci buurub Asiri? ¹⁹ Ana tuuri réew yii di Amat ak Arpàadd? Ana tuuri Sefarwayim? Ndax dañoo xettli Samari ci man? ²⁰ Tuuri réew yii yépp, ana mu ci xettli menn réew ak man, ba Aji Sax ji wara mana xettli, Yerusalem ak man?”»

²¹ Ñooña ne cell, tontuwuñu ko baat, ndax Buur moo leen santon ne leen buñu ko tontu. ²² Ba loolu amee bootalub Buur, Elyakim doomu Ilkiya ak Sebna, bindkat ba, ak doomu Asaf, Yowa ma denc téere ya, ñoo dem ak seen yérey ñaawlu yu xottiku, ba ca Esekiya. Ñu daldi koy àgge kàddug bëkk-néeg ba.

37

¹ Naka la ko Buur Esekiya dégg, daldi xotti ay yéreem, sol saaku yu muy ñaawloo. Mu dem nag ca kér Aji Sax ji. ² Ba loolu amee mu yebal Elyakim bootalub Buur ak Sebna bindkat ba, ak ñay mag ca sarxalkat ya. Ñu sol saaku yu ñuy ñaawloo, daldi dem ca Yonent Yàlla Esayi doomu Amocc. ³ Ñu ne ko: «Esekiya dafa wax ne: “Bésub tey bésub njàqare la ak mbugal ak gácce. Mooy li ñuy wax naa: Doom a ngi ci buntub juddu, te dooley wasin réer! ⁴ Jombul

nag sa Yàlla Aji Sax ji dégg kàdduy bëkk-néeg bi sangam buurub Asiri yebal, ngir mu kókkali Yàlla jiy dund. Te kon sa Yàlla Aji Sax ji mooy dogal mbugal mi war ci kàddu yooyu mu dégg. Yékkatil kàddug ñaan rekk, ngir ñi fi desagum.”»

⁵ Ba surgay Buur Esekiya àggee Esayi wax jooju leen seen sang wax, ⁶ Esayi da ne leen: «Waxleen seen sang ne ko: Aji Sax ji dafa wax ne: “Bul ragal kàddu yi nga dégg surgay buurub Asiri ñàkke ma ko kersa. ⁷ Maa ngii di ko sol xel mu ko gömloo xibaar bu muy dégg, ba dellu réewam, ma fàdde ko ab saamar ca am réewam.”»

Asiri tooñati na Yuda

⁸ Gannaaw loolu Rabsake dégg ne buurub Asiri bàyyikoo na Lakis, bay xareek dëkk ba ñuy wax Libna. Mu walbatiku fekki ko foofa. ⁹ Booba buurub Asiri daa dégg ne Tiraka buurub Kuus moo leen di songsi. Ba mu ca déggée daa yebal ay ndaw ca Esekiya, ne leen: ¹⁰ «Waxleen Esekiya buurub Yuda ne ko: “Seen Yàlla ji ngeen yaakaar, bumu leen nax, naa leen deesul teg Yerusalem ci loxol buurub Asiri. ¹¹ Xanaa yaw ci sa bopp dégg nga li buuri Asiri def mboolem réew yi, faagaagal leen? Yaw nag, yaa ciy muc? ¹² Xeet yi samay maam sànk, seeni tuur dañu leena musal, muy Gosan, di Karan, di Resef, di askanu Eden wa woon ca Telasar? ¹³ Ana buuri Amat ak Arpàdd ak Layir ak Sefarwayim ak Ena ak Iwa?”»

¹⁴ Ba Esekiya jëlee bataaxal ba ca loxol ndaw ya, jäng ko ba noppi, dafa dem ba ca kër Aji Sax ji. Mu daldi tällal bataaxal ba fa kanam Aji Sax ji.

¹⁵ Esekiya ñaan Aji Sax ji, ne ko: ¹⁶ «Éy Aji Sax ji Boroom gàngoori xare yi, Yàllay Israyil mi toog fi tiim serub yi. Yaw doñj yaa di Yàllay mboolem nguuri àddina. Yaw déy, yaa sàkk asamaan ak suuf. ¹⁷ Ngalla Aji Sax ji, dékkal sa nopp ba dégg; Aji Sax ji, xippil say gët ba gis, te dégg mboolem kàdduy Senakerib yi mu yóbbante, ngir ñàkke la ko kersa, yaw, Yàlla jiy dund! ¹⁸ Aylayéwén Aji Sax ji, buuri Asiree tas mboolem xeet yEEK seeni réew, ¹⁹ te ñoo sànni seeni yàlla ci sawara it, ndax yooyoo dul Yàlla, xanaa lu nit sàkke loxoom, bant ak doj, ba tax ñu sànk leen. ²⁰ Kon nag Aji Sax ji sunu Yàlla, wallu nook moom, ba mboolem nguuri àddina xam ne yaw doñj yaa di Aji Sax ji.»

Yonent Yàlla Esayi yégle na jéllub Asiri

²¹ Ba mu ko defee Esayi doom Amocc yónnee ca Esekiya ne ko: «Aji Sax ji, Yàllay Israyil, mi nga ñaan ci mbirum Senakerib buurub Asiri, dafa wax ne: ²² Lii moo di kàddu gi Aji Sax ji wax ci moom:

Yaw, janq Siyon mu taaru da laa xeeb,
di la ñaawal.

Yerusalem, dëkk bu taaru booboo
 lay wëcc bopp,
di la kekku sa gannaaw.

²³ Ana kooy kókkaleek a ñàkke kersa?

Moo kooy yékkatil kàddu?

Kooy xool gëti xeebeel?

Xanaa du Aji Sell ju Israyil ji?

²⁴ Yaa yebal say surga,
di kókkali Boroom bi, te naa:

“Sama watiir yi ne xas
laa ware kawtey tund yi,
jàll ba ca xolu Libaŋ.

Maa gor seedaram ya fa sut
ak tånnéefi garabi sipparam:
maay àkki ba ca collub kaw bu tundu Libaŋ,
ak gottam bu naat ba nib tóokér.

²⁵ Maa gas ay teen, naan,
maa joggatee sama téstén, wali Misra yépp,
ñiisal ko.”

²⁶ Waaye xanaa déggoo ne bu yàgg laa dogal
loolu?

Ca jant yu jékk ya laa ko nasoon,
tey ma sottal ko,
ba nga mana def genti jali tojit, dëkk yu tata wér.
²⁷ Waa dëkk ya ne yàcc, jàq, torox,
mel ni gàncaxu àll mbaa ñax mu yees,
mbete caxum xadd
mbaa tool bu car jógagul.

²⁸ Waaye boo toogee, boo génnee,
boo duggee, xam naa,

boo xadaroo sama kaw it, xam naa.

²⁹ Yaa xadaru sama kaw,
ba sag reewande tàbbi sama nopp!
Maa lay takkal ag nos akug laab,
waññi la, nga dellu yoon wa nga dikke woon.

³⁰ Lii, def ko ci, mu dib takk.
Dees na lekk ren peppum saxayaay,
dékwen it dees na lekk lu saxal boppam.

Waaye déwén-jéeg,
ngeen ji, góob,
jémbat tóokéri reseñ, lekk ca meññeef ma.
³¹ Ndes wa des ca askanu Yuda

ñoooy saxaat ay reen,
ba meññaat ay doom.

³² Yerusalem kay law ndes di génne,
aw ndes ay rëcce tundu Siyonj,
te Aji Sax ji Boroom gàngoor yi
mooy sottal loolu ci xéraangeem.

³³ Moo tax Aji Sax ji wax ci buurub Asiri ne:
“Du dugg ci dëkk bii,
du fi soqig fitt,
du fi taxawe ab pakk,
du fi jal jal bu muy gawe!

³⁴ Yoon wa mu dikke lay delloo,
biib dëkk, du fi dugg.
Kàddug Aji Sax jee!

³⁵ Maay aar dëkk bii, musal ko
ngir man ci sama bopp,
ak Daawuda sama jaam bi.”»

³⁶ Ba loolu amee malaakam Aji Sax ji dikk, fàdd
ca dalub Asiri téeméer ak juróom ñett fukk ak
juróomi junni (185 000). Ca ëllëg sa ña mucc
teela xëy, yemuñu ci lu moy ñooña ñépp diy
néew. ³⁷ Ba mu ko defee Senakerib buurub
Asiri daldi fabu, ñibbi. Mu toog nag ca Niniw.

³⁸ Gannaaw gi, ba muy sujjóot ca kér tuuram
ma ñuy wax Nisrog, Addraameleg ak Sareser,
doomam yu góor ñoo ko fa fàdde saamar. Ñoom
nag ñu daw làquji réew ma ñuy wax Araraat. Ci
kaw loolu doomam Asaradon falu buur, wuutu
ko.

38

Esekiyel wopp na ba jóg

¹ Jant yooyu Esekiya moo woppoon, bay waaja dee. Yonent Yàlla Esayi doomu Amocc dikk, ne ko: «Aji Sax ji dafa wax ne: “Dénkaaneel sa mbiri kér, ndax dangay dee, doo jóg!”» ² Esekiya nag walbatiku, jublook miir ba, ñaan ci Aji Sax ji. ³ Mu ne: «Éy Aji Sax ji, ngalla bàyyil xel ni ma àndeek yaw sama léppi xol, ci kóllére. Te it li nga rafetlu laa jëfe.» Mu jooy nag, jooy yu metti.

⁴ Ci kaw loolu kàddug Aji Sax ji dikkal Esayi, ne ko: ⁵ «Doxal ba ca Esekiya, nga ne ko: Aji Sax ji sa Yàllay maam Daawuda dafa wax ne: “Dégg naa sag ñaan, gis naa say rongooñ. Maa ngii di yokk ci saw fan fukki at ak juróom. ⁶ Buurub Asiri ak dooleem, maa la ciy xettli, yaw ak dëkk bii, te maay aar dëkk bii.”»

⁷ Lii nag ngay def ab takk bu bawoo ci Aji Sax ji, di firndeel ne Aji Sax ji dina def li mu wax: ⁸ Maa ngii di delloo ker gi gannaaw lu tollook fukki dëggastal, ya jant bi wàccoon ca kaw iskaleb Axas. Ci kaw loolu jant bi dellu gannaaw lu tollook fukki dëggastal ya mu jotoona wàcc.

⁹ Mbind mii nag Esekiya buurub Yuda moo ko bindoon, gannaaw ba mu tèddee wopp, ba jóg:

¹⁰ Man de dama noon:
«Sama digg doole laay deme
jaare bunti njaniiw,
sama ndesu fan réer ma!»

¹¹ Ma noon: «Dootuma gisati* Aji Sax ji, duma gisati Aji Sax ji fi kérug àaddina. Duma tegati doom aadama bët,

* **38:11** 38.11 gis Aji Sax ji mooy dem biir kér Aji Sax ji. Seetal ci aaya 22 ak *Sabóor* 27.4.

dootu fii ci waa àddina.

¹² Sama dëkkuwaay lañu sempi,

yóbbu fu sore,

mbete xaymab sàmm.

Sama àpp a taxañe,

ni ndimo lu ab ràbb doge ca mbaam ma.

Diggante bëccëg ak guddi, nga jekkli ma.

¹³ May xalaat, ba bët set;

Aji Sax jiy dammat samay yax ni gaynde,
diggante bëccëg ak guddi, nga jekkli ma.

¹⁴ May ciib-ciibi ni wetwet mbaa ramatu,
di binni nim xati,

di séentu kaw ba saay gët giim.

Dama noon: Éy Boroom bi, loof naa,
dimbali ma.»

¹⁵ Waaye lu may waxati?

Aji Sax jee ma wax,

te moo jëf.

Kon, ma temp ndànk sama giiru dund

ndax tiisu xol.

¹⁶ Boroom bi, ci sa kàddook sa jëf la nit di dunde
te ci laay noyyee ba tey.

Yaa ma wéral, may ma, ma dund.

¹⁷ Ndeke sama tiisu xol wii,

sama jàmm rekk a tax.

Sa cofeel a tax

nga sorele maak paxum sànkute.

Yaa sànni sa gannaaw sama bépp bàkkaar.

¹⁸ Njaniiw du la sant,

ndee du la gérëm,

te ku tàbbim pax yaakaaratul sa kóllëre.

¹⁹ Kiy dund, kiy dund doñj mooy ki lay sant

ni man bésub tey jii,

te baay mooy xamal doom sa kóllëre.

²⁰ Aji Sax ji yaa may wallu,
nu di la woy, ànd aki xalam,
sunu giiru dund,
fa sa biir kér, yaw Aji Sax ji.

²¹ Fekk na Esayi noon: «Indileen ab danku
figg, ngeen jonj ko ci taabu Esekiya bi, kon dina
dund,» ²² ba Esekiya noon ko: «Ana lu di takk
biy firndeel ne dinaa wér, ba dellooti kér Aji Sax
ji?»

39

¹ Jant yooyu doomu Baladan, Merodag Baladan
buuru Babilon moo yónnee Esekiya bataaxal
ak yóbbal. Fekk na mu déggoon ne Esekiya
daa woppoon bay doora am tan. ² Esekiya
am ca mbégte, daldi won ndaw ya, kérug
dencukaayam: xaalis baak, wurus waak ndàbb
jaak, diwu tannéef gaak mboolem néegub
gànnayaam ya, ak mboolem lu nekkoon cay
dencam. Amul lenn lu leen Esekiya wonul ci
biir kéraram, ak mboolem fu bokk ci kilifteefam.
³ Gannaaw loolu Yonent Yalla Esayi dikk ne Buur
Esekiya: «Lu la nit ñii wax ak fu ñu jóge sax
ba fi yaw?» Esekiya ne: «Réew mu sore lañu
bàyyikoo, dikk ba fi man, réewum Babilon.»

⁴ Mu ne ko: «Ana lu ñu gis sa biir kér?»
Esekiya ne ko: «Mboolem lu nekk sama biir
kér, gis nañu ko. Amul lenn lu ma leen wonul
ci samay denc.» ⁵ Esayi ne Esekiya: «Déglul
kàddug Aji Sax ji Boroom gàngoor yi: ⁶ “Ay jant a
ngii di ñëw, dees na yóbbu Babilon lépp lu nekk
sa biir kér, te say maam dencoон ko, ba tey jii.

Du lenn luy des. Kàddug Aji Sax jee. ⁷ Te it ñenn ci sag njaboot, ñu soqikoo ci yaw, di ñoo meññ ci sa geño, dinañu leen jàpp, ñu doon jaam yu ñu tàpp ca biir kér buuru Babilon.”» ⁸ Esekiya ne Esayi: «Kàddug Aji Sax ji nga jottli, jàmm la.» Booba ma nga naan: «Ndegam jàmm ju ne ñoyy ay am sama giiru dund kay!»

Aji Sax jeey dàmp xol yi

40

(Saar 40—66)

Xibaaru jàmm ñeel na Israyil

¹ Dëfal-leena dëfal sama ñoñ,
la seen Yàlla wax!

² Waxleen lu dalal xelu Yerusalem, yéeneleen
ne leen seen xare jeex na,
seen mbugal mat na.

Ñoo nangoo ci loxol Aji Sax ji
lu fey ñaari yoon seen bépp bàkkaar.

³ Baat a ngi jib, naan:

«Xàll-leen yoonu Aji Sax ji ci mändin mi,
fakkal-leen sunu Yàlla
xàll wu jub fi joor gi.

⁴ Wépp xur lees di kaweel,
tund wu magoo wu ndaw lees di suufeel;
ba fu tunde mujj dig joor,
fu ñagasonn maase,

⁵ darajay Aji Sax ji daldi feeñ,
jaam ñépp bokk gis ko.

Aji Sax jee ko wax ci làmmiñam.»

⁶ Baat a ngi naa: «Yéeneel!»
Ma ne: «Lu may yéene?»

Mu ne: «Neel:

Bépp boroom suux am ñax doñj la;
gépp ngoram mel ni tóor-tóoru àll.

⁷ Ñax ma wow,
tóor-tóor ma lax
fa ko noowal Aji Sax ji wale.
Askan wi kay, am ñax doñj la.

⁸ Am ñax day wowal;
tóor-tóor day lax.
Waaye sunu kàddug Yàlla
mooy sax ba fàww.»

⁹ Yaw Siyoŋ, xibaarkatu jàmm bi,
doxal yéegi tund wu kawe,
te xaacook doole.
Yaw Yerusalem, xibaarkatu jàmm bi,

xaacul te bul ragal!
Neel dëkki Yuda yi:
«Seen Yallaa ngi!

¹⁰ Boroom bi, Aji Sax jaa ngii,
dikkaale doole
ak kàttanu kilifteefam.

Mu ngii ànd ak ñi mu yooloo,
ñu dig peyam, dox jiit u.

¹¹ Mooy sàmm géttam bii ni kuy sàmm ug juram,
boole mbote yi cib loxoom,
taf cib dënnam, yóbbu;
xar yi yì nàmpal, mu wommat.»

¹² Ana ku natte géej biir loxoom?
Ku xaymaa asamaan yaatuwaayu loxo?
Ku mana fab suuf sépp, sol cib nattukaay?

Ana ku natte ab màndaxekaay tund wu mag?

Mbaa mu tam-tamal tund wu ndaw?

¹³ Ana ku mana xayma Aji Sax ji?

Mbaa nga dib xejjam, ba di ko digal?

¹⁴ Ana ku mu diisool, ba kooka tegtal ko,

jàngal ko yoonu njub,

jàngal ko xam-xam,

xamal ko yoonu dég-dég?

¹⁵ Xeet yaa ngii, mel ni aw toq ci biir bagaan,
jàppeesu leen lu moy diisaayu feppu suuf!

Dun yi lay yékkati ni pëndub suuf!

¹⁶ Gottub Libaŋ xambul taalam,

te mala ya ca ne doyu ko saraxu rendi-dóomal!

¹⁷ Xeetoo xeet du tus fi kanamam,

te jàppewu leen lu moy neenug neen.

¹⁸ Ana kan ngeen di niruleek Yalla,

ak nataal bu ngeen koy dendaleel?

¹⁹ Xanaa du jëmmu tuur ju liggéeykat móol,
ab tègg xoobe ko wurus,

takk ca caqi xaalis?

²⁰ Ku néewle ba amul jooxe bu ni tollu,

mooy tånn bant bu dul nëb,

seeti liggéeykat bu xareñ

bu ko ci sàkkal jëmmu tuur ju dëgér!

²¹ Dangeena xamul lii?

Am dangeena déggul lii?

Dees leena waxul ca njàlbéen,

am seen xel a jàppul nu kenug àddina sampoo?

²² Moom moo tooge kaw wérngalu suuf,

ñi ko dëkke mel niy socct,

moo tållal asamaan ni ndimo,

firi ko nib xayma, dëkke.

²³ Mooy sànk kilifa,

di neenal njiitu àddina.

²⁴ Ba ñu sampoogul,
toogaguñu sax,
ba seeni reen di riigu,
ca la leen Aji Sax jiy wal, ñu wow,
ngëlén buub, yóbbu ni boob.

²⁵ Aji Sell ji ne:
«Ana ku ngeen may niruleel,
ba may moroomam?»

²⁶ Séentuleen kaw, xool-leen ki sàkk yii fi kaw!
Xanaa kiy daaguloo seen gàangoor gu mat,
ñoom ñépp lay woo ci seen tur,
ci kawewaayu dooleem ak màggayu kàttanam,
te kenn du ci wuute.

²⁷ Yeen askanu Yanqóoba, lu ngeen di jàmbat?
Yeen Israyil laa ne, lu ngeen di jooy,
naa: «Aji Sax ji gisul li nu dal,
sunu Yàlla daal, daa réere sunu àq!»

²⁸ Dangeena xamul,
am dangeena déggul
ne Aji Sax jeey Yàlla ba fàww,
sàkk suuf cat ba cat,
du sonn, du tàyyi,
te am xelam nattuwul?

²⁹ Mooy dooleel ku loof,
di kàttanal ku jeele.

³⁰ Waxambaane sonn, loof;
xalelu góor di tèréfa tèréf,

³¹ kiy yaakaar Aji Sax ji moom, di yeeslu doole;
da naa fëyy ni jaxaay juy naaw,
di xélu te du xiix,
di dox te du xoox.

41*Aji Sax jee yor jamono*

¹ Yeen waa dun yi, xeremluleen, déglu ma;
 yeen askan yi, takkuwaatleen,
 jégesi te wax,
 nu bokk teew, layoo.

² Ana ku ñu yékkatee penku,
 woo ko ci tànki njekk?
 Ana ku ko jébbal xeet yi,
 nangulal ko buur yi,
 saamaram note ba ñuy pënd,
 fittam jamat, tasaare ni boob?

³ Moo leen di dàq, ba jàll te jàmm a koy dal,
 ay tànkam sax du laal suuf.

⁴ Ana ku def lii, dogal ko?
 Xanaa ki dale fa njálbéen di woo maas yi!
 Man Aji Sax ji maa jékk,
 te man laak ñi mujj ba tey!

⁵ Waa dun yee ko gis, tiit;
 waa cati àddina di lox;
 dox ba agsi;

⁶ ku nekk di jàpple moroom ma,
 naa mbokk ma: «Góor-góorlul!»

⁷ Tëggú weñ ba di ñaax tëggú gànjar ba,
 boroom wàkku soññ boroom dékk,
 ñu naa: «Taqaleb weñ yi baax na!»
 tey daaj jémmi xérém ja
 ay pont yu koy dëgérał.

Aji Sax jeey musal Israyil ciy noonam

⁸ Waaye yaw Israyil, sama jaam bi;
 yaw Yanqóoba mi ma taamu,
 yaw askanu Ibraayma, samab xarit!

⁹ Yaw mi ma jukkee fa cati àddina,
 wooye la fa gëna sore,
 wax la ne la: «Yaa di sama jaam,
 maa la taamu te duma la wacc,»
¹⁰ bul ragal, yaw laa àndal,
 bul tiit, maay sa Yàlla;
 maa lay dooleel, dimbali la déy,
 maa lay téyee sama ndijooru njekk déy.

¹¹ Ma ne, képp ku la mere,
 dees koy rusloo, torxal ko.
 Kuy joteek yaw day neen, sàngku.
¹² Dinga ko seet, doo ko gis,
 kuy jàankoontEEK yaw, du mujje doon tus,
 te kuy xareek yaw it day mujj neen.
¹³ Man Aji Sax ji maay sa Yàlla;
 téye sa loxol ndijoor,
 di la wax ne la: «Bul tiit,
 maa lay dimbali.»
¹⁴ Yaw Yanqóoba mi néew doole niw sax,
 yeen góori Israyil.
 Man, maa leen di dimbali.
 Kàddug Aji Sax jee,
 sab jotkat, Aji Sell ju Israyil.
¹⁵ Maa ngii di la def
 ngay watiru bàccukaay bu ñaw, yees peq;
 ànd aki bëñam,
 ngay wol tund wu mag, raatale;
 dëbb tund wu ndaw ba mu mel nib cox.
¹⁶ Yaa leen di bàcc, ngelaw wal,
 ngëlén tasaare;
 yaw ngay bége Aji Sax ji,
 di damoo Aji Sell ju Israyil.

17 Walaakaanaak néew-doolee ngi wér,
di wut um ndox, amul.
Seen put wow konj̄ ak mar.

Man Aji Sax ji, maa leen di nangul;
man Yàllay Israyil, duma leen wacc.

18 Maay walaley dex kaw coll ya ne dunj̄,
bënn bëti ndox digg xur ya,
def màndinj̄ ma ab déeg,
suuf su ne seren laay ballalem ndox.

19 Maay def garabi seedar aki séng ca màndinj̄
ma,
saxal garabi mirt ak oliw ca joor ga,
sippar ak garabu pée, ak yeneen garab yu dëkke
naat,

ma boole ca,

20 ndax nit ñi gis, ba xàmmee,
ñoom ñépp nemmiku, ba xam ne
Aji Sax jee def lii ci loxoom,
xam ne Aji Sell ju Israyil a sàkk lii.

Aji Sax ji tiiñal na tuuri yéefar yi

21 «Waxleen seenu lay,» la Aji Sax ji wax,
«Biral-leen seeni firnde,» la buuru Yanqóoba
boobu wax.

22 «Woneleen ko te wax nu liy ñëw.
Xamal-leen nu la woon, lu mu;
nu ba ci xel, ba xam lu muy jur,
te ngeen dégtal nu la dikkagul.

23 Biralal-leen nu mbiri ëllèg,
nu xam ne ay yàlla ngeen.

Defleen rekk lenn, muy lu baax di lu bon,
ndax nu bokk ko gis, ba yéemu.

24 Ma ne, yeen daal, dungeen tus;
seen liggéey du dara,

te ku leen taamu di ku seexluwu!»

²⁵ Maa yékkatee nit bëj-gànnhaar,
mu bawoo penkub jant,
di tudd sama tur.
Mooy note boroom dëkk ni ban
mbaa binit bu defarkatu njaq di dëggaaate.

²⁶ Ana ku yéene woon lii ca njàlbéen,
ba nu xam ko?

Ku ko yégle woon bu yàgg,
ba nu man koo dëggal?
Yéeneesu ko, yégleesu ko
te déggeesul seeni kàddu.

²⁷ Waaye maa jékka yégal Siyon
ne leen: «Xool-leen, ñu ngii!»
Maa indil Yerusalem ndaw lu indi xibaaru jàmm.

²⁸ Xool naa xool ci tuur yi, gisuma kenn;
du kenn ci ñoom ku ciy xelale,
ba ma laaj ko, mu mana tontu.

²⁹ Ñoom ñépp a ngoogu, tekkiwuñu tus.
Seen liggéey, caaxaani neen,
seen jëmmi xérëm du dara, còolóolu kese.

42

Aji Sax ji yebal na jaamam

¹ «Xool-leen sama jaam bi ma yor,
sama tànnéef, sama soppey xol,
ci kawam laa teg samag noo,
te mooy dogalal xeet yi yoonu àtte.

² Du xaacu, du biral;
du jibal baatam ci mbedd mi.

³ Bant bu lemu sax, du ko damm,
leer gu giim it, du ko fey.

Mooy indi yoonu dëgg.

⁴ Du toqi, du nasax,
ba keroog muy dëj àtteb yoon fi kaw suuf,
fa waa dun ya di séentu ndigalu yoonam.»

⁵ Yalla Aji Sax ji dafa wax,
moom mi sàkk asamaan, firi ko;
tàllal suuf ak lu mu jur,
may noowal bakkán ñi ci kawam,
ba ña cay daagoo di noyyi.

⁶ Mu ne: «Man Aji Sax ji, maa la woo cig njekk,
jàpp la ci loxo,
sàmm la, def la ngay kóllére sama digg ak nit ñi;
def la ngay leeru xeet yi,

⁷ ngay gisloo gumba,
di génne ku ñu téj,
ku dëkke woon lëndëm, génn kérug téjukaay.

⁸ Man, Aji Sax jeey sama tur,
sama teddnga, duma ko joxe,
te sama bàkk, duma ko wacce jëmmi tuur.

⁹ Mbir ya jiitoo ngoog, mat na;
yu yees laa leen di yégal,
balaa teew, ma yegge leen ko.»

Woyleen Aji Sax ji

¹⁰ Woyleen Aji Sax ji woy wu yees,
yeen waa cati àddina, kañleen ko,
ànd ak ñiy wàcci géej ak li ci biiram,
ak duni géej ak ña ca dëkke.

¹¹ Na waa àll beeki dëkkam xaacoondoo,
waa dalub Kedar
ak waa Sela sarxolleendoo,
kaw tund ya di riirum mbég!

¹² Nañu delloo Aji Sax ji teddngaam,

te biral bàkkam biir duni géej.

¹³ Aji Sax jeey waaxu ni jàmbaar,
xabtalu ni ñeyu xare,
àddu ca kaw, xaacu,
tiime noon yi njàmbaaram.

Aji Sax ji soppi na

¹⁴ Aji Sax ji nee: «Damaa yàgga xeremu,
ne cell, téye sama bopp.

Waaye léegi, ni kuy matu laay onke,
di xiix ak a àppaat boole ca.

¹⁵ Maay tonni tund wu mag ak wu ndaw,
lu cay gàncax, ma fóom;
ag dex, ma def ag joor;
ab déeg, ma ñiisal.

¹⁶ Maay doxloo silmaxa yi
ci yoon wu ñu xamul,
ñall wu ñu miinul laa leen di jaarale.
Maa leen di soppil lëndëm gi fi seen kanam, ag
leer,

fu ñagas, ma maasaleel leen.
Lii laa leen di defal,
te duma leen wacc mukk!

¹⁷ Ni wóolu ay jëmmi tuur,
naan jëmm yu ñu móol:
“Yeenay sunuy yàlla,”
dees na leen waññi, torxal leen.

¹⁸ «Yeen tëx yi, dégluleen;
yeen silmaxa yi, xool-leen ba gis.

¹⁹ Ana ku silmaxa ku moy sama jaam bii?
Ku tëx ba dab sama ndaw li ma yónni?
Ana ku silmaxa ba dab kii ñu jàmmal?
Ku silmaxa ba dab jaamu Aji Sax jii?

20 Gis nga lu bare,
waaye jàppoo ci dara.
Nopp ne kótt, dég-dég tē!»

21 Aji Sax ji la soob ci njekkam,
mu fésal màggaaayu yoonam ak taar ba.

22 Waaye ñu ngii di xeet wu ñu futti, sëxëtoo;
ñépp têje ciy pax,
dence ci kéri têjukaay,
ñu doon alalu xare
fu leen kenn dul xettleee,
xanaa ñu di leen sëxëtoo,
te kenn du ne ñu delloo leen.

23 Ana kan ci yeen mooy dékk lii nopp?
Kuy teewlu, ba doxe fa dégg?

24 Ana ku jébbal Yanqóoba futtikat yi,
ku jox Israyil gii, sëxëtookat yi?
Xanaa du Aji Sax ji nu tooñ?

Noo baña topp ay yoonam,
baña sàmm ndigalu yoonam,
25 ba mu yuri leen tàngooru sànjam,
sotti leen tar-taru xare,
mu jafal wetoo wet, te taxul ñu xam,
xoyom na leen te bawuñu ci xel.

43

Jotkatub Israyil kenn la

¹ Léegi nag yaw Yanqóoba,
yaw Israyil mii,
Aji Sax ji la sàkk tabax la, dafa wax ne:
«Bul tiit, jot naa la.
Dama laa woo ci sa tur.
Maa la séddoo.

² Booy xuus cim ndox,
maa ngi ànd ak yaw;
ag dex du la médd.
Booy dox cib taal, doo lakk,
sawara du la xoyom.

³ Man Aji Sax ji, maay sa Yàlla;
man Aji Sell ju Israyil,
maa lay musal.

Maa joxe Misra, feye la;
ak Kuus ak Seba, ma weccikoo la.

⁴ Fonk la, teral la ak sopp la,
moo tax ma joxey nit, weccikoo la;
ay askan dee, wuutu sa bakkan.

⁵ Bul tiit, yaw laa àndal,
maay jële saw askan penku,
dajalee leen sowub jant.

⁶ Maa naa bëj-gànnar: “Ësi!”
ne bëj-saalum: “Bul téye!”
Jëleel sama doom yu góor fu sore, délloosi,
te jëleji sama doom yu jigéen fa cati àddina.

⁷ Délloosil képp ku ñu ma tudde,
te sama màqaama tax ma sàkk ko,
tabax ko, sottal ko.»

⁸ Indileen ñii diy silmaxa te ami gët;
tëx te ami nopp.

⁹ Na xeet yépp daje,
askan yépp teewandoo.
Ana ku nu ci yégaloон lii xew,
mbaa mu xamal nu la wees?
Na seen seede teew, dëggal leen;
ba ñu dégg leen, ne noonu la.

¹⁰ Yeen sama ñoñ, yeenay samay seede.
Kàddug Aji Sax jee.

Yeenay sama jaam bi ma taamu,
 ngir ngeen xam, ba gëm ma,
 ba ràññee ne maay moom.
 Sàkkeesul yàlla ju ma jiitu,
 mbaa ju may wuutuji.

11 Aji Sax ji, mennum man a;
 amul jotkat bu ma moy.

12 Maa dogal ag njot, sottal ko, biral ko,
 ba tuuru doxandéem nekkagul seen biir.
 Yeen nag, yeenay samay seede.

Kàddug Aji Sax jee.

Man maay Yàlla,

13 maa masa doon kenn ki,
 te sama loxo, maneесu cee musle.
 Su ma defee, kuy dindi?

14 Aji Sax jiy seen jotkat,
 Aji Sell ju Israyil dafa wax ne:
 «Yéena tax ma yebal ku songsi Babilon,
 ba dàjji lu fay téjukaay,
 ba xaxalooy Kaldeen ñooñu diy jooyoo*.

15 Maay Aji Sax ji, seen ku Sell ki;
 maa sàkk Israyil, di seen buur.»

16 Aji Sax ji dafa wax,
 moom mi sàkk yoon biir géej,
 rëddu xàll, digg mbeex mu ne xéew;
17 xabtal watiri xare aki fas,
 ak gàangooru ñeyi xare,
 ñu bokk tèdd, jógatuñu,
 xanaa fey kamaj nib làmp.

* **43:14** 43.14 Tekkitel aaya bii am na werante.

18 Mu ne: «Buleen geesu la woon,
buleen seet ca la wees.

19 Maa ngii di def lu yees,
te mu ngii di feeñ xaat!

Ràññeewuleen koo?
Bir mändinj mi kay laay xàllu yoon;
fa ne serenj, ma walal ay dex;

20 dundooti àll bi di ma sàbbaal,
ñook njabootug bànjóoli,
nde maa mayem ndox fi mändinj mi,
dex ya wale fu noon serenj,
ma nàndale sama ñoñ, sama tànnéef,
21 xeet wii ma bindal sama bopp,
te ñooy siwal sama woy.»

22 Moona Yanqóoba, woowuloo ma,
yaw Israyil laa ne, sàppi naa la.

23 Du xar mu ndaw moo ma defal saraxu rendi-
dóomal,
mbaa sarax yoo ma terale,
te du sarax su ma la teg it,
mbaa saraxu cuuraay bu ma la sonale.

24 Du xaalis boo ma jëndale barax bu xeeñ,
du nebbonu sarax boo ma reggale.
Xanaa lakkal maak say bàkkaar,
sonal maak say ñiaawtéef.

25 Mennum man mii maay far say moy ngir man,
ba dootuma fattliku bàkkaar.

26 Fattli ma saw lay, nu bokk layoo;
waxal boog yaw, ndax nga ye!

27 Sa maam a jékka bàkkaar,
ñi lay teewal teg ca gàntal ma,

28 ba tax ma sobeel kilifay kér gu sell gi,
araamal Yanqóoba,

wacce Israyil ñàññi noon.

44

Aji Sax jee mat cëslaay

¹ Yaw Yanqóoba, sama jaam bi, déglul boog,
yaw Israyil sama tånnéef laa wax.

² Aji Sax ji dafa wax, moom mi la sàkk,
mooñ la fa sa biiru ndey,
di la dimbali.

Mu ne: «Yaw Yanqóoba sama jaam bi,
yaw Yesurun sama tånnéef laa wax,
bul tiit.

³ Maay sottim ndox suuf su mar,
ak wal yu waleg joor gu wow.
Maay sotti saw askan samag noo,
sama barke sottikul ñi nga meññ,
⁴ ñu màgg ni garabu saabsaab,
nirook garab yu mag yu feggook ndox.

⁵ Kii nee: “Aji Sax jee ma moom.”

Kee di tuddoo turu Yanqóoba,
kale bind ca loxo ba: “Maa ñeel Aji Sax ji,”
tey wuyoo turu Israyil.»

Aji Sax ji dëkk na yàllantu yi

⁶ Aji Sax ji dafa wax,
moom buurub Israyil, jotkatam,
Aji Sax ji Boroom gàngoor yi,
mu ne: «Maa jëkk, maa mujj,
te yàlla amul ndare man.

⁷ Ana ku mel ni man? Na àddu!
Na biral firndeem te taajal ma
la amoon ba may sos xeet wu yàgg wa,
ak li dikkagul.

Na ko wax!

⁸ Buleen tiit, buleen ragal.

Dama leena biralul lii bu yàgg, yégal leen ko?

Yeenay samay seede.

Yàlla daa am ju ma moy?

Cëslaay amul, xawma ci kenn!»

⁹ Képp kuy tabax jëmmi tuur, doo tus,
xërëm yooyu ñu safoo amul njariñ.

Nooñu ñu defi seede

te gisuñu, yéguñu,

muy seen gácce!

¹⁰ Sakk sam tuur,
móol sa jëmmu tuur,

te jariñu la tus!

¹¹ Képp ku ca bokk
sa gácce lay doon,

ña koy yett sax ay nit doñj lañu.

Nañu daje ñoom ñépp, taxaw,

bokk tiitaangeek gácce.

¹² Ab tégg jël jumtukaayam,
liggéey weñ ca taal ba,

wàkka wàkk, jëmmal;

def ci kem kàttanam,

teg ca xiif, doole jeex,

naanul it ba tax mu loof.

¹³ Liggéeykatu bant tàllal buumu nattukaay,

jël kew, nataale,

xacc, rëdde réddukaayu wërngal,

jox ko bindu nit,

jekkal ba mu mel ni nit,

nar koo fat cib néeg,

¹⁴ ba tax mu gor garabi seedar,

sàkk banti sippar ak yu ni mel,
tànn ci garabi gott bi,
mbaa mu jémbat garab yu dëkke naat,
ab taw màggal,
15 nit xambe, sàkk ci, jaaroo;
taal, lakke mburu;
sàkkaale ci jëmmu tuur, sujjóotal ko,
muy jëmm ju mu defar, di ko sukkal;
16 xaaju matt ma lay taal,
toggew yàppam, lekk,
wàjj, xéewloo ba suur,
jaaruwaale te naan:
«Mii njaar mu neex!
bii tàkk-tàkk bu yànj!»
17 Ndesu matt ma lay sàkke jëmmu tuuram,
sukkal ko,
sujjóotal ko, ñaan ko, naa:
«Yaay sama Yàlla, xetli ma!»
18 Ñii xamuñu, xàmmeeuwuñu,
seeni gët lañu lëndëmal, ba gisatuñu;
fatt seenum xel, ba xelootuñu.
19 Ku mel nii du délloosim xelam,
ba xam, ràññee ne:
«Xaaju matt mi laa taal,
lakke mburu,
wàjje yàpp, lekk;
mu des, ma di ko sàkke lu seexluwu lii?
Ab dogu bant laay sukkal?»
20 Kee di jur gu fore ab dóom,
xelam nax ko, sànk ko.
Du keey musal bakkanam de!
Du kee naa: «Xanaa duy caaxaan laa ɳàbb nii?»

21 Aji Sax ji nee: «Yanqóoba, baal xel ci lii!
Ma ne Israyil, fàttlikul, yaa di sama jaam!
Ma bind la, ngay sama jaam,
yaw Israyil, duma la fàtte!

22 Maa far say moy, mu naaxsaay niw niir,
say bàkkaar ne mes nib lay.
Délsil fi man, jot naa la.»

23 Asamaan, sarxolleel, Aji Sax ji dikk na!
Yeen xóotey suuf, xaaculeen!
Yeen tund yi, neleen réllet, sarxolleendoo,
ak yaw gott beek sa bépp garab!
Aji Sax jee jot Yanqóoba,
te moom Israyil lay fésale darajaam.

Dees na dëkkewaat Yerusalem

24 Aji Sax ji sa jotkat dafa wax,
moom mi la bind ba ngay sosu,
ne: «Man maay Aji Sax ji sàkk lépp.
Man dojn maa tàllal asamaan,
lal suuf, kenn wéttaliwu ma ca.

25 Maay neenal firndey maaman,
dofloo gisaanekat.

Maay weddi fóore,
def xam-xamam mu dig ndof.

26 Maay dëggal sama kàddug jaam,
di sottal sama ndéeyal ndaw.

Maa naan ci Yerusalem:

“Dees na ko dékke,”
dékki Yuda, ma ne:

“Dees na leen tabaxaat,
ma dekkali gentam bi.”

27 Maa naa xóotey mbeex mi: “Wowal,
te maay njisal say dex.”

28 Maa naa ci Sirus: “Sama sàmm bi!”

Mooy matal sama bépp nammeel,
 te it moo naa ci Yerusalem:
 "Nees ko tabaxaat,"
 kér gu sell gi, laa ne:
 "Nees ko yékkatiwaat!"»

45

Aji Sax ji dooleel na Buur Sirus

- ¹ Aji Sax ji dafa wax ki mu fal,
 Buur Sirus mi mu jàpp ci loxol ndijooram,
 ngir nangulal ko xeet yi,
 yolomal ngañaayal buur yi,
 lafal koy bunt,
 ba bunti dëkk du têje,
² mu ne: «Man maa lay jiitu,
 maasale mbartal,
 rajaxe buntu xànjär,
 damm têjukaayu weñ.
³ Maa lay jagleel denc yu loq,
 ak alal ju làqe,
 ba nga xam ne maay Aji Sax ji lay wooye sa tur,
 man Yällay Israyil.
⁴ Te Yanqóoba sama jaam bi,
 Israyil moomu di sama tàngnéef moo tax
 ma wooye la saw tur,
 takkal la ndombol tànk,
 te xamuloo ma.
⁵ Aji Sax ji man a, du keneen;
 kenn du yàlla ku dul man.
 Maa la gemb,
 te xamuloo ma,
⁶ ngir xamees penku ba sowu,
 ne lu dul man neen la.

Aji Sax ji man a, du keneen.

⁷ Maay bind leer,

di def lëndëm.

Maay indi jàmm,

di def safaan.

Maay Aji Sax jiy def lii lépp!

⁸ Na asamaan wis-wisal,

niir yuri njekk,

suuf fett, meññal wall,

boole ci jebbil njekk.

Man Aji Sax ji, maa def lii!»

⁹ Wóoy ngalla kuy diijat ka la tabax

te di ndabal xandeer ci biir ndabi xandeer!

Ana ban ak di wax tabaxkatam,

naa ko: «Looy def nii?

Yaw amuloooy loxo.»

¹⁰ Wóoy ngalla ku naan baayu nit,

«Moo, lu sa geño meññ nii?»

Mbaa ku naan ndeyu nit,

«Li nga wasin lu mu?»

¹¹ Aji Sax ji, Aji Sell ju Israyil dafa wax,

moom mi ko bind,

mu ne: «Lu dikkagul, nu ngeen ma ko ñemee
laaje;

am dangeen may jox ndigal ci samay doom,

jox ma ko ci li ma liggeeeye samay loxo?

¹² Man maa amal suuf,

sàkk doom aadama fi kaw suuf.

Man mii la samay yoxo firi asamaan,

te maay jox gàngoori asamaan lépp ndigal.

¹³ Man maay yékkati Sirus ci biir njekk,

xàllu yoonam.

Moom mooy tabax sama dëkk,

yawi sama ñoñ ñi ñu toxal,
te du laaj pey mbaa neexal.»
Aji Sax ji Boroom gangoor yee ko wax.

¹⁴ Aji Sax ji dafa wax ne:
«Muy ñaqu Misra, di koomu waa Kuus,
ak waa Seba, ya ne sreet ca kaw,
ñoom ñépp ay jàllsi, nga jagoo.
Sa gannaaw lañuy topp,
yeewe, jàllsi;

sujjótal la, di ñaan naan:
“Fi yaw daal la Yalla ne,
du feneen,
te tuur neen la.”»

¹⁵ Yaw déy, yaa di Yalla ju làqu,
yaw Yällay Israyil ji koy wallu.

¹⁶ Yettkati xérém yaa ngoogu, rus,
torox, riixleendoo.

¹⁷ Israyil, yaay mucc fa Aji Sax ji
mucc gu sax dàkk!
Doo rus, doo torox
fii ak ëllëg.

¹⁸ Aji Sax ji kat dafa wax,
moom mi sàkk asamaan,
moom Yalla mi bind suuf,
tabax ko, dëj ko,
sakkewu ko maraas,
xanaa tabaxal ñu ko dëkke.
Mu ne: «Aji Sax ji, man a, du keneen.
¹⁹ Làquwma, di waxe bérab bu lëndëm.
Newuma it askanu Yanqóoba:
“Sakkuleen ma fu dara amul.”
Man Aji Sax ji maay wax dëgg,

di biral njub.»

20 Yeen daw-làquy xeet yi,
dajeleen, dijk,
ànd, jegesi.

Képp ku gàddu tuuru bantam,
ak kuy ñaan tuur mu ko dul wallu,
kooka xamul dara.

21 Àdduleen, layoosi,
diisooleen fi seen biir kay!
Ana ku xamle woon lii bu yàgg,
yégle woon ko booba?

Xanaa du man Aji Sax ji?
Kenn du Yàlla ku dul man!
Yàlla ju jub, di walloo,
du kenn ku dul man!

22 Yeen waa àddina, catoo cat,
walbatikuleen fi man, muc.
Man maay Yàlla, du keneen.

23 Giñ naa ko ci man mii,
sama gémmiñ njekk a ciy jibe,
di kàddu gu dul randu.

Man la ñépp di sukkal seen bëti óom,
man it la bépp boroom làmmiñ di giñe.

24 Dees na ma waxal ne:
«Aji Sax ji rekk a jagoo njekk ak doole!»
Mboolem ñi ma mereey ànd,
sëgg, fekksi ma.

25 Ci Aji Sax ji la askanu Israyil gépp yeye,
bay damu.

46

Yii yàlla bootu, jii Yàlla di boote

¹ Tuur ma ñu naa Bel toqi na,
tuur ma ñu naa Nebo sukk,
mala ya féetewoo seeni jëmm,
ñoom lees daan gàddu*, tey jur gi jagoo,
di leen sëf ba loof.

² Tuur yaa ngay sukk, bokk toqi:
manuñoo wallu seen jëmm ya,
xanaa doxal seen bopp, duggi ngàllo.

³ «Dégluleen yeen waa kér Yanqóoba,
yeen ndesu kér Israyil gépp,
yeen ñi ma dale yor ba ngeen juddoo,
di leen fab ba ngeen génnee seen biiru ndey.

⁴ Ba ba ngeen di magal, man la,
ba keroog ngeen di bijjaaw, maa leen di boot.
Maa sàkk, maay yor,
maay boot, xettli!

⁵ «Ana ku ngeen may niruleel,
di ma nàttableek a méngaleek moom,
ba ñu niroo lenn?

⁶ Nii déy a yullee wurus ci mbuus,
sàkk xaalis, natt diisaay ba,
fey tègg bu leen ci tèggal am tuur
mu ñuy sukkal ak a sujjóotal,

⁷ yékkati teg ci mbagg,
yóbbu, teg bérab, mu des fa;
du jóge fa mu tege,
ku ko woo wall it, du wuyu,
ba jot ko ci njàqare.

⁸ Fàttlikuleen lii te dëgërluwaat!
Yeen bàkkaarkat yi, defleen lii ci seen xel.

* **46:1** 46.1 Waa Babilon a doon gàddu seeni tuur, gannaaw ba
leen Buur Sirus songee.

⁹ Fàttlikuleen cosaan la woon.
Man mii maay Yàlla, du keneen.
Amul Yàlla ju mel ni man!

¹⁰ Maay yégle muj ca ndoorte la,
ak jëf ju amagul, lu jiitu bu yàgg.
Maa naa sama mébét a ngi, day am,
sama bépp nammeel sotti.

¹¹ Maay wooye jaxaay penku,
wooye réew mu sore, kuy sottal sama mébét.
Maay àddu, amal;
maay nas, sottal.

¹² «Dégluleen maa, yeen dëgér bopp yi!
Yeenaka dëddu njekk!

¹³ Maa jegeñal sama njekk, soreetul;
sama wall a ngi, yàggatul.
Maay maye wall fi Siyon gii,
ba Israyil gii di sama gànjar.»

47

Babilon falu, félèñu

¹ Yaw janq Babilon,
wàccal, toog ci pënd bi.
Yaw dëkkub Kaldeen bi ci taar bi laa ne,
toogal fi suuf, amatoob jal.
Dootoo dégg «Lewet, xay.»

² Fabal wolukaay, wol sunguf.
Dindil sa muuraay gi,
wogos sa mbubb,
ëñ sas kumba,
xuus, jàll dex yi.

³ Na sa yaram feeñ,
say cér ne fàñj.

Damay feyu,
te duma bale.

⁴ Sunu jotkat ay Aji Sax ji Boroom gàngoor yi,
Aji Sell ju Israyil.

⁵ Yaw dëkkub Kaldeen bi ci taar bi,
toogal ne cell te fatu cig lëndëm,
deesatu la wooye lingeeru réew yi.

⁶ Maa mere woon sama ñoñ,
sobeel sama séddoo ñii,
teg leen ci sa loxo,
te wonoo leen yérmande,
ba mag sax, nga teg ko lu diisa diis,
⁷ te naa: «Ba fàww maay lingeer!»
ba tax bàyyiwoo xel ca la ngay def;
xalaatoo la muy jur.

⁸ Diryànke bee, déglul lii:
Yaa ngi ne finaax te naa ci sam xel:
«Maa ko yor, man rekk, du keneen.
Duma jooy jékkér, duma jooy doom!»

⁹ Te yaar yooyoo lay dikkal ci benn bés.
Jooy doom, jooy jékkér ay yembandoo,
dal fi sa kaw ci sa biir xérëmtu yi ne xas,
ak sa jat yu dul jeex.

¹⁰ Dangaa yaakaaroon sa pexe yu bon,
naan, «Kenn gisu ma!»
Sam xel ak sa xam-xam a la wacc,
ba tax nga naa: «Maa ko yor, man rekk.»

¹¹ Musibaa lay dikkal,
te doo xam fu mu fenke.
Njaaxum a lay dal,
te du looy mana fanq.

Sànkuteey jekki dale la foo yégul.

¹² Jàppool say jat rekk
ak sa xérém yu ne xas
yoo dale sonn ba ngay ndaw.
Jombul mu amal la njariñ,
mbaa ñu ragale la ko.

¹³ Yaaka sonn ci tegtali maa-man!
Nañ taxaw boog, wallu la!
Ñii di rëdd nataalu asamaan,
di niiri biddiiw,
ak di xool weer wu feeñ,
xamle ca loo dikkleegul.

¹⁴ Ñu ngoog bokk ak boob bu sawara jafal,
demin,
duñu musal seen bakkan ca sawara sa,
te du doon ab taal bu ñuy lakke mburu
mbaa xal sooy uuf di jaaru.

¹⁵ Lii moo di muju ña la taxoon di sonn.
Ña nga dale jëflanteel ba ngay ndaw,
ña ngay tambaambalu tey, ku nekk ak yoonam,
kenn walluwu la ci.

48

Yalla sikk na Israyil

¹ Yeen waa kér Yanqóoba, dégluleen;
yeen ñi ñu wooye turu Israyil,
yeen ñi bawoo bëti ndoxi Yuda,
di giñe turu Aji Sax ji,
yeen ñiy sàbbaal turu Yàllay Israyil
te dëgg ak njekk taxul,
² moona yeena ngi sagoo turu dëkk bu sell bi,
di wéeroo Yàllay Israyil

ji turam di Aji Sax ji Boroom gàngoor yi.
³ Yàgg na maa biral lay jékka am.
 Tuuddoon naa ko, yégle ko,
 jekki jëf ko, mu sotti.
⁴ Xam naa ne ñu dëgér bopp ngeen.
 Dangeen të, wowle.
⁵ Moo tax ma yàgg leena biralal lii,
 yégal leen ko balaa teew.
 Lu ko moy ngeen ne:
 «Sunu tuur mee ko def,
 sunu tuuru bant bee,
 sunu tuuru weñ gee ko amal di!»
⁶ Lii lépp déggoon ngeen ko;
 xool-leen, xanaa dingeen ko nangu tey!

Bés niki tey dinaa leen yégal lu bees,
 muy kumpa gu ngeen xamul woon.
⁷ Léegi lees ko amal,
 du lu yàgg.
 Lu jiitu tey masuleen koo dégg
 te dungeen ne xamoon ngeen ko.
⁸ Dégguleen, yéguleen,
 seeni nopp masula bënn;
 xam naa ne ay workati neen ngeen,
 «njuddu-fippu» lañu leen di wooye.
⁹ Waaye sama tur tax na ma aj sama mer,
 sama woy tax na ma muñal leen,
 ba duma leen fakkas.
¹⁰ Ma ne, togg naa leen, xelli cib taal,
 waaye du taalu xellikaayu xaalis,
 sawaras nattu laa leen xellee.
¹¹ Samaw tur a tax,
 sama tur laay jëfe.

Jomb naa ñaaw!
Te sama teddnga, duma ko joxe.

12 Dégluleen ma, yeen askanu Yanqóoba,
yeen bànni Israyil gi ma dégtal sama woote.
Maay kenn, maa jékk te maa mujj;

13 te sama loxo bee déj suuf,
sama ndijoor bi firi asamaan.
Maa leen di woo, ñu bokk taxaw.

14 Bokkleen daje yeen ñépp te déglu!
Kan ci tuur yii moo yégle lii?
Ki Aji Sax ji sopp

mooy sottal nammeelu Aji Sax ji ci Babilon,
won Kaldeen ña fa dëkke diisaayu loxoom.

15 Maa àddu, man mii;
maa ko woo, indi ko,
te pexeem dina joy.

16 Jegesileen ma, déglu ma;
bu jékk ba tey làquwma, di wax;
te ba muy xew, fa laa teew.

Tey Boroom bi Aji Sax ji da maa yebal
boole maakam xelam.

17 Aji Sax ji seen jotkat dafa wax,
Aji Sell ju Israyil da ne:
«Maay Aji Sax ji, seen Yàlla
 ji leen di jàngal seen njariñ,

 di leen awale fa ngeen wara awe.

18 Céy su ngeen sàmmoon samay santaane,
ba jàmm baawaanal leen,
njekk géejal leen,
19 seen geño sakkan ni suuf,

di seen meññeefu biir, tollook feppi suuf,
du dog, du sànkoo fi sama kanam!

20 «Génnleen Babilon,
dawleen Kaldeen ñi, tey sarxolle.
Biral-leen lii, yéene ko,
te yeggeji ko waa cati àddina,
ne leen Aji Sax ji jot na jaamam Yanqóoba.

21 Marewuñu bérab yu wow ya mu leen jaarale
woon,
ndox mu balle ciw doj la leen xellil,
moo xaru doj, ndox ma baawaan*.

22 Jàmm,» la Aji Sax ji wax ne,
«du ñeel ñu bon ñi.»

49

Surgab Aji Sax ji mooy leelu xeet yi

1 Yeen waa duni géej, dégluleen ma;
yeen askan ya fu sore, teewluleen ma.
Fa sama biiru ndey la ma Aji Sax ji wooye,
moo tudd sama tur ba ma saa ndey juragul.

2 Moo ñawal sama kàddu ni saamar,
làqe ma keru loxoom.
Moo ma def may fitt gu ñaw,
yeb ma ci mbuusum fittam.

3 Moo ma ne: «Israyil yaa di samab jaam,
yaw laay wonee samag leer.»

4 Man nag ma noon:
«Maa sonn ci dara,
coonob còolóol bu amul njariñ.»
Teewul sama àttee nga fa Aji Sax ji,

* **48:21** 48.21 Seetal ci Mucc ga 17.1-7.

sama yool a nga fa sama Yàlla.

⁵ Tey Aji Sax jee wax,
moom mi dale sama biiru ndey,
mooñ ma, ma dib jaamam

bi koy waññil askanu Yanqóoba ba ca moom,
dajaleel ko bànni Israyil googu fa moom,
ba jagoo teraangay Aji Sax ji,
sama Yàlla jii di sama doole.

⁶ Mu ne: «Xeeb naa li ma la sas ngay sama jaam
biy siggil giiri Yanqóoba,
te wara délloosi ndesu Israyil gii.
Tabb naa la, ngay leeru xeet yi,
di jotale waa cati àddina sama wall.»

⁷ Aji Sax ji jotkatub Israyil,
moom ku Sellam ki,
moo wax ak ki xeet yi xeeb, sib ko,
te tuy surgawu kilifa yi,
mu ne ko: «Ay buur ay gis, jóg,
ay kèngam di sukk,
ngir Aji Sax ji boroom worma,
ngir Aji Sell ju Israyil ji la taamu.»

⁸ Aji Sax ji dafa wax ne:
«Bu bésüb yiw taxawee, ma nangul la;
bu bésüb mucc jotee, ma wallu la,
sàmm la,
def la ngay kóllère sama digg ak askan wi,
ngir yékkatiwaat réew mi,
séddalewaat ay cér, suuf sii gental tey,
⁹ ba ne ñi ñu téjoon: “Génnleen!”
Fa ñu nekkoon cig lëndëm,
laa naa leen: “Génnleen ci leer gi!”
Ñooy doon sama gàtt, dellu di fore aw ñall,

ak wépp tund wu ne faraas tey.

10 Duñu xiif, duñu mar;
tangooru mbóoya akub jant du leen sonal,
nde ki leen ñeewantee leen di wommat,
di leen yóbbu fu ndox bënne.

11 Sama tund yépp laay soppiy yoon,
sëkkaat samay mbedd.

12 Ñu ngiy bawoo fu sore,
ñu ngii bawoo bëj-gànnhaar ak sowu,
ñee bawoo diiwaanu Sinim ca bëj-saalum.»

13 Asamaanoo sarxolleel, suufoo bégal,
te tund yi xaacoondoo!

Aji Sax jee dëfal ñoñam,
moo ñeewannte néew-ji-dooleem ñii.

14 Siyoŋ a nga naa: «Aji Sax ji wacc na nu,
Boroom bi fàtte na nu!»

15 «Ana jaboot juy fàtte doomam juy nàmp,
mbaa muy néege ku mu jur ci biiram.
Bu ko manoona fàtte it,
man duma la fàtte.

16 Sama biir loxo yii laa la ñaas,
say tataa janook man ba fàww.

17 Ni lay tabaxaat dañuy gaaw,
te ñi la yàqteek ñi la gental
dañuy dem, ba la.

18 Séentul fi la wér te xool!
Ñépp a ngi daje, di la fekksi.

Ndegam maay Kiy Dund,»
kàddug Aji Sax jee,
«ñoom ñépp ngay takkoo ni gànjar,
gooy gànjaroo nib séet.

19 Sa gentub tey bi déy a ngi wéet,

di réew mu yàqu yaxeet.
 Waaye léegi déy mu fees ba far xat;
 fu ña la sàankoon di soree.
²⁰ Nàkkoon ngay doom,
 waaye ku nekk ci say doom ay dëkkalaat
 yii kàddu ci sab nopp:
 "Fii dafa xat,
 xajal ma, fu ma dëkke!"
²¹ Dangay mujj naa:
 "Moo, ku ma jural ñii ñépp?
 Man mi ñàkkooni doom, manumaa jur,
 ñu toxal ma, wacc ma;
 ana ku leen yoroon te ma des, man kenn?
 Ñii sax, fu ñu ne woon?"»
²² Boroom bi Aji Sax ji dafa wax ne:
 «Maa ngii di tàllal xeeti jaambur ñi loxo,
 ñee ma yékkati raaya, wooye leen;
 ñu fab say doom yu góor, indi,
 tungóom sa doom yu jígeén, délloosi;
²³ Yaw la ay buur di baayoo,
 seeni lingeer di la nàmpal.
 Noo lay sujjóotal,
 di la maral say tànk,
 ba nga xam ne maay Aji Sax ji,
 te ku ma yaakaar du rus.»

²⁴ Manees naa foqati alalu sëxëtoo ci loxol
 jàmbaar a?
 Am manees naa rëcc boroom doole bu la jàpp?
²⁵ Aji Sax ji déy dafa wax ne:
 «Moona dees na foqati ku jàmbaar jàpp,
 ba rëccal alalu sëxëtoob boroom doole.
 Say jotewaale, maay joteek ñoom,

te say doom, maa leen di wallu.
 26 Ñi lay néewal, maa leen di leel
 seen suuxu bopp.

Seen deret ni biiñ bu bees, ma màndale leen,
 ba kuy boroom suux xam ne
 maay Aji Sax ji lay wallu,
 jàmbaaru Yanqóoba ji lay jot.»

50

Aji Sax ji waccul ñoñam

¹ Aji Sax ji dafa wax ne:
 «Damaa fase seen ndey?
 Wonleen ma kayitu pase mi!
 Maa leen jaay njaam, feyey bor?
 Ana ku ma leen jaay?

Bu ñu leen jaayee, seeni ñaawtéef a.

Bu ñu fase woon seen ndey it, seeni moy a.

² Ana lu tax ba ma dikkee, kenn nekku fa?
 Ma woote, kenn wuyuwul?

Damaa gàtta gàtt loxo, ba manumaa walloo?

Am damaa ñàkk doole ju ma xettleee?

Xanaa du maay gëdd géej, mu wow,
 maay defi dex màndiq, ndox tukki;
 jén ya mar, dee ba yàqu?

³ Du maay sànge asamaan ag lëndëm,
 mu mel ni ku ma solal saaku yu tuy ñaawloo?»

Siggal nañu jaamub Aji Sax ji

⁴ Boroom bi Aji Sax ji moo ma may
 làmmiñu ndongo lu mokkal,
 ngir ma xam gan kàddu laay jàpplee ku sonn.
 Suba su ne mu yee ma, yeel ma nopp
 bu ma teewloo ni dongo yi.

⁵ Boroom bi Aji Sax jee ma bënnali nopp,
te man it, gàntalu ma ko,
deltuwma gannaaw.

⁶ Gannaaw laa jox ku may dóor,
dékk lex kuy xus sama sikkim,
te làquma sama kanam
ku may saagaak a serati.

⁷ Waaye Boroom bi Aji Sax jee may dimbali,
ba tax rusuma.

Moo ma taxa dogu ba dëgér,
ngir xam naa ne deesu ma rusloo.

⁸ Ki may dëggal jege na.

Ana kuy layook man? Nan bokk taxaw!

Kuy jàんkoontEEK man ci yoon? Na jegesi boog!

⁹ Ma ne, Boroom bi Aji Sax jee may dimbali.
Ana ku may daan?

Dama ne, ñoom ñépp ay jeexal
ni yére yu saxe ba sagaroo.

¹⁰ Ana ku ragal Aji Sax ji ci yeen,
di déglu kàddug jaamam?
Képp kuy doxe lëndëm
te amul leeraange,
na wóolu Aji Sax ji,
te wéeroo Yàllaam jii.

¹¹ Ma ne, yeen ñiy jafal ab taal ñépp
tey gañoo jum yuy boy,
xuusleen ci sawara si ngeen jafal
ak jum yi ngeen boyal.
Maa leen dogalal lii:
yeenay tèddaaLE mitit.

51

Barke ñeel na ñoñu Aji Sax ji

- ¹ Dégluleen maa, yeen ñiy wut njekk,
di sàkku Aji Sax ji.
Xool-leen doj wi ñu leen yette,
xool xóotey kàmb gi ñu leen seppee:
² Seen maam Ibraayma laa ne, moom ngeen di
xool,
xool ci Saarata mi leen meññ.
Ba muy kenn laa ko woo,
barkeel ko, ful ko.
³ Aji Sax jeey dëfäl Siyon moos,
dëfalaale fépp fu fa dib gent,
ba def mändinjam ni toolub Àjjana,
jooram gu wow mel ni toolub Aji Sax ji,
mbégteek bànnex teew fa,
ak cant gu woy feelu.
⁴ Yeen sama ñoñ, teewluleen ma,
yeen sama ñoñ, dégluleen ma.
Fi man la téereb yoon di bawoo,
te maay fettaxal sama àtte,
muy leeru xeet yi.
⁵ Sama wall jege na,
sama njekk dëgmal na,
ma nara àttee xeet yi sama dooley pérëg.
Man la waa dun yiy xaar,
sama dooley pérëg lañu yaakaar.
⁶ Séentuleen asamaan
te xool suuf si mu tiim.
Asamaan ay tasaaroo ni saxar,
suuf ràpp ni mbubb,
ñi ko dëkke dee niy weñ,
te du tee sama wall di sax ba fàww,

sama njekk it du dagg.

⁷ Yeen ñi xam njekk, dégluleen ma,
yeen, askan wi sama yoon yebu ci seen xol.
Buleen ragal nit ku leen sewal,
buleen tiit seeni xaste.

⁸ Sax a leen di lekk ni mbubb,
max ñeeñ leen ni ndimol kawaru gàtt;
te du tee sama njekk sax dàkk,
sama wall saxal maasoo maas.

⁹ Aji Sax ji, yewwul, ngalla yewwul;
wone sa doole.
Yewwul na bu jékkoon,
bu yàgga yàgg.

Xanaa du yaa falaxe Raxab?
Du yaa jam ninki-nàンka jooja?

¹⁰ Xanaa du yaa wowal géej
ak ndoxum xuram wu ne màww,
def xóotey géej aw yoon,
ña nga jot jàlle ca?

¹¹ Ñi Aji Sax ji goreel, nii lañuy dellusee,
agsaaley sarxolle fa Siyon,
kaalawoo mbég mu sax,
mbégtæk bùnnex wàllsi,
naqaraku tuis daw.

¹² Man ci sama bopp maa leen di dëfal.
Ana lu ngeen di ragal ci nit kuy dee,
doom aadama ju bokk akum ñax aw demin?
¹³ Dangeena fàtte Aji Sax ji leen sàkk,
ki firi asamaan, dëj suuf?
Dangeen di dëkke bésoo bés,
di tiit xadaru boroom doole

buy waaja sàanke?

Ana fu xadaru boroom doole mujje?

¹⁴ Ku diisoon ba waaf léegi nga féex;
doo deeye pax ma nga tēje,
te doo ñàkk loo lekk.

¹⁵ Man maay seen Yàlla Aji Sax ji,
kiy yéngal géej, riiral gannaxam,
Aji Sax ji Boroom gàngoor yi di sama tur.

¹⁶ Maa la sexual samay kàddu,
yiire la sama keru loxo,
aj asamaan, dëj suuf,
ne Siyoñ: «Yeenay sama ñoñ.»

¹⁷ Yewwulee, yewwul, Yerusalemée jógal,
yaw mi Aji Sax ji nàndal kaasu mbugalam.
Kaas bu wex bay miirloo,
taat wa, yaa ko siitaatu.

¹⁸ Amul ci ñi nga jur, kenn koo dese
ku lay wommat.

Amul ci doom yi nga yar, kenn
ku lay jàpp ci loxo.

¹⁹ Yii yaar de dikkal na la:
Yàquleek sànkule.

Ana kuy bokk ak yaw saw naqar?

Xiif ak loraangey saamar!

Ana nu ma lay défale?

²⁰ Sa doom yi ne lasar,
mbete kooba yu fiir jàpp,
ñu ne lareet fépp fu mbedd daje,
këppoo sànjum Aji Sax ji,
sa Yàlla ji leen rëbb.

²¹ Rikk déglul nag lii, yaw mi musiba dal,

nga màndi te du biiñ.

²² Sa boroom Aji Sax ji,
sa Yàlla jiy layool ñoñam
dafa wax ne: «Mu ngoog, maa jële ci sa loxo,
kaas bu wex biy miirloo;
taatu kaas ba def sama mbugal,
dootoo ko naan.

²³ Maa koy teg ci loxol ñi la doon naqaral,
te naan la: “Sëggal, nu joggi, jàll,”
nga def sa gannaaw gi aw yoon,
ñu joggi, wéy.»

52

Yerusalem dina suqliku

¹ Yewwulee, yewwul,
Siyonjee, làmbool sa doole!
Yerusalem, dëkk bu sell bi,
solul ba ne ràññ!
Ndax du kenn ku xaraful mbaa ku sobewu
ku lay songati.

² Yaw Yerusalem, mi ñu jàpp njaam,
jógal fëgtu,
yaw janq Siyon mu taaru mi ñu jàpp njaam laa
ne,
tikkil buum gi ci sa baat.

³ Aji Sax ji déy dafa wax ne:
«Dees leena wànteeroon ci dara,
te du xaalis lees leen di iotaate.»

⁴ Boroom bi Aji Sax ji déy dafa wax ne:
«Misra la sama ñoñ jékka wàcc, dali fa,
Asiri door leena not ci dara.

⁵ Léegi nag ana lu fiy sama wàll?»
Kàddug Aji Sax jee.

Mu ne: «Jàpp nañ sama ñoñ njaam ci dara;
 seeni sang a ngi téggu,
 di dékke ñákke teggin sama tur.»
 Kàddug Aji Sax jee.

⁶ «Moo tax sama ñoñ di xam maay kan;
 moo tax bésub keroog
 ñu xam ne maay wax te maa ngii!»

⁷ Ndaw leeka rafeti tànk,
 kee bartaloo tund yi,
 di la dégtalsi jàmm,
 di la xibaar lu neex,
 àgge la ag mucc,
 ne la: «Éey, Siyon,

sa Yàllaay Buur!»

⁸ Déglul sa jongrukat yi,
 ña ngay xaacu, sarxollendoo.

Ñoo gisal seen bopp

Aji Sax ji di ñibbsi Siyon.

⁹ Yeen genti Yerusalem, àndleen sarxolle;
 Aji Sax jeey dëfal ñoñam,
 mooy jot Yerusalem gii!

¹⁰ Aji Sax jee wone dooleem ju sell ji,
 xeet yépp di gis,
 ba ca cati àddina.

Népp ay gis sunu wallu Yàlla.

¹¹ Yeen ñiy yóbbu ndabi Aji Sax yu sell yi*,
 bu ngeen di jóge Babilon,
 dëdduleena dëddu lu sobewu, bañ koo laal,
 setluleen te génn foofa.

¹² Dungeen gaawtu déy, di dem;

* **52:11** 52.11 Seetal ci 2. *Buur ya* 25.13-15.

duy xél moos ngeen fay génne.
 Aji Sax jeey dox jiit u leen,
 te Yàllay Israyil laa ne, moo leen di féete
 gannaaw.

Teraangay jaam bi wuutu na coonoom

¹³ Aji Sax ji nee: «Sama jaam baa ngi,
 mooy baaxle, kawe,
 dees na ko yékkati, darajaal ko lool.
¹⁴ Moo dawoon yaramu ñu bare,
 ndax yàqu ba nirootul nit,
 bindootul woon ni doom aadama,
¹⁵ waaye noonu it lay waare ay xeeti xeet†,
 ba buur yi wedam,
 ngir lu ñu leen waxulloon, te ñu gis ko,
 lu ñu déggulloon, te mujj ko ràññee.»

53

¹ Ana ku gëm sunub dégtal?
 Ana ku Aji Sax ji won dooley pérégam?
² Kii màgge fi kanamam ni njëmbat,
 te nirook reen bu fette ag kekk.
 Dub taar, du yànjaay bu nu koy niire,
 du meloom wu nu koy soppe.
³ Dees na ko xeeb, daw ko,
 muy nit ku bare mitit
 te miin naqar.
 Mu mel ni ku ñuy dummóoyu,
 dees koo xeeb te nawloowuñu ko.
⁴ Ndaxam moom sunu wopp la yenu,
 sunuy mitit la sëfoo.

† 52:15 52.15 Manees na koo tekkee nii itam: xeet yu bare lay
 wis-wisal um ndox, setale leen ko.

Nun nu foog ne dees koo mbugal,
foog ne Yàllaa ko duma, torxal ko.

⁵ Te moom sunuy tooñ a waral ñu jamat ko;
sunuy ñaawtéef a waral ñu dëggaate ko.
Yar yi nu jàmmal moom la dal,
te mooy ki nu wére ciy góomam.

⁶ Nun ñépp a lajj niy xar,
ku nekk walbatiku topp yoonam,
te Aji Sax jee ko këpp sunu gépp ñaawtéef.

⁷ Dees koo néewal doole, mitital ko
te ubbiwul gémmiñam,
xanaa mel ni xar mu ñuy rendiji,
ne cell ni xar mu ñuy wat,
ubbiwul gémmiñam.

⁸ Àtte nañu ko ñàkkal, yóbbu,
te ag maasam kenn teewluwu ci ne
tooñ gu sama bokk yi tooñ
lees ko dagge ci réewum aji dund ñi,
te loolu lees ko fàdde.

⁹ Ni ñuy robe saaysaay lañu ko robe,
denc ko ci bàmmeelu boroom alal,
soxorul, fenul.

¹⁰ Moona Aji Sax ji la soob, mu dëggaate jaamam
 bii,

teg koy naqar,
su nangoo doon saraxu peyug tooñ,
gis askanam, aw fanam gudd,
te coobarey Aji Sax ji ci moom lay sottee.

¹¹ Mooy sonn ba gis ug leer, doyloo ko,
te ñu bareey xam sama jaam bii di Aji Jub,
ba mu àtte leen àtteb njekk,
sëfoo seeni ñaawtéef.

12 Moo tax ma di ko jox ab cér
 ci biir ñu bare,
 mu séddoo ak ay kèngam alalu xareem,
 ngir moo jébbale bakkanu boppam,
 ñu limaale kooki tooñkat,
 moo gàddu bàkkaaru ñu bare
 te mooy tinul moykat yi.

54

Aji Sax ji jëlaat na Yerusalem, soppeem

¹ «Yaw mi jaasir ba juroo, xaacul!
 Yaw mi xamul mititu mat, sarxolleel.»
 Aji Sax ji nee:

«Ndaw si ñu foñ moo gëna jaboot
 kiy séy.

² Yaatalal sa xayma bi,
 firi sa sori xayma yu gëna yaa
 te bul yéem.

Yokkal sa buumi xayma
 te samp say bant, mu dëgér.

³ Dinga saam ay doom ndijoor ak càmmoñ,
 saw askan moom ay xeet,
 sancaat dëkk yu gentaloon.

⁴ Bul tiit, doo rus mukk.
 Bul jaaxle, deesu la kersaal mukk.
 Sa gàcce ga ba ngay ndaw, dinga ko fàtte,
 te sa tiisu jëtun wa dootoo ko fàttliku.

⁵ Sa jëkkér, ki la sàkk,
 Aji Sax ji Boroom gàngoor yee di turam.
 Aji Sell ju Israyil moo la jot,
 te moo di Yàllay àaddina sépp.
⁶ Aji Sax jee la woo, nga dib jeeg bu ñu wacc,
 sa xol jeex tàkk,

Mu ne la:

“Nees di wacces ndaw,
si nga takk ba ngay ndaw?”»

Sa Yàllaa ko wax.

⁷ Mu ne: «Maa la wacc diir bu gàtt,
dellu la jël ci yërmande ju yaa.

⁸ Sama xol a jóg,
ma xañ la sama kanam ab diir,
waaye maa lay yërëme ngor gu sax.»
Aji Sax, ji lay jot moo ko wax.

⁹ Mu ne: «Na ma defoon ak
ndoxum Nòoyin ma mooy lii tey.
Maa giñoon ne ndoxum Nòoyin ma,
mu ni day dootu wale kaw suuf.

Noonu it laay giñe ne
duma la mereeti,
duma la rëbbati.

¹⁰ Bu tund yu mag yi doon toxu,
yu ndaw yiy raf sax,
sama ngor du la toxul,
te sama kóllërey jàmm du raf.»
Aji Sax ji la yërëm moo ko wax.

¹¹ «Ngalla yaw Yerusalem,
mi ngélén pamti-pamtee ba nga jàq,
te kenn dalalu la,
man Aji Sax ji,
maa ngii di la tabaxe doj yu ne ràññ,
samp la ci kenuy safiir.

¹² Maay defare sa kawi tata peri rubi,
def say wont per yuy lerxat,
def sa tata yi la wér yépp doj yu bakkane,

¹³ mboolem sa doom yu góor ay jànge ci Aji Sax ji,
boole kook jàmm ju ne ñoyy.

¹⁴ Njekk moo lay dëgëral,
nga sore noteel, doo tiit;
sore tiitaange, du la jege.

¹⁵ Xanaa dees na songe moos,
waaye ku la song it, yebalu ma ko,
te ku la song daanu fi sa kanam.

¹⁶ Xoolal, man maa sàkk ab tègg
 buy wal taalu kériñ,
defar ca ngànnaaay lu ne.

Waaye maa sàkk it
yàqkat buy rajaxe.

¹⁷ Ngànnaaay lu ñu la mana sàkkal,
du sotti,
te boroom làmmiñ wu la jógal cib layoo
yaa koy tiñal.

Ñiy jaamu Aji Sax ji, looloo di seen cér,
looloo di njekk gi ma leen di dikke.»
Kàddug Aji Sax jee.

55

Aji Sax ji woote na njéggal

- ¹ «Éey, yeen ñi mar ñépp,
dikkleen ci ndox mi,
ba ci ku amul xaalis sax!
Dikkleen jënd pepp, lekk!
Dikkleen jënd pepp mu xaalis jëndul,
ak biiñ ak meew mu amul pey.
² Ana lu ngeen di waññe xaalis,
di ko jënde lu dul aw ñam?

Ana lu ngeen di sonn,
di jënde lu dul reggal?

Dégluleen maa déglu, ba lekk lu leen di dundal,
di xéewloo seen ngëneelu bakkan.

³ Teewluleen te dikk fi man.

Dégluleen, ba mana dund,
ma fas ak yeen kóllére gu sax,

gi ma baaxee Daawuda ci ngor gu wóor.

⁴ Ab seedee ngoog, ñeel xeet yi,
muy njiit, yilif xeet yi.

⁵ Ma ne, aw xeet woo xamul ngay wooyi,
xeet wu la xamul ay dawsi ba ci yaw,
ngir sa Yàlla Aji Sax ji,
Aji Sell ju Israyil,
nde moo la teral.»

⁶ Sàkkuleen Aji Sax ji bi ngeen koy mana gis,
wooleen ko bi muy jege.

⁷ Na ku bon ba jéfinam,
kuy def lu ñaaw fomm mébétam,
te walbatiku ci Aji Sax ji sunu Yàlla,
mu yérém ko, yaatal njéggalam.

⁸ «Samay xalaat déy du seeni xalaat,
te samay jéfin du seeni jéfin.»
Kàddug Aji Sax jee.

⁹ Mu ne: «Ni asamaan tiime suuf,
ni la samay jéfin tiime seeni jéfin,
samay xalaat it tiime ko seeni xalaat.

¹⁰ Ab taw ak tawub yuur asamaan lay wàcce,
du fa dellu,
te suuxatul suuf,
saxal ko, meññal ko,
ba kuy ji, mu may la jiwu;

kuy lekk, mu may lam pepp.

¹¹ Sama kàddu giy bawoo sama gémmiñ it,
noonu la.

Du délse ag neen ci man
te deful li ma namm,
ba sottal li ma ko yebal.

¹² «Mbégte déy, ngeen di génne,
ñu yóbbu leen ci jàmm,
tund yu mag yEEK yu ndaw yi
di leen sarxolleel,
garabi àll bi yépp tàccoondoo.

¹³ Garab gu dul ruus ay wuutub gajj,
garab gu dëkke naat wuutub taxas,
muy woyu Aji Sax ji,
te di firnde ju sax,
du dog mukk.»

56

Xeet yépp la Aji Sax jiy ñoñoo

¹ Aji Sax ji dafa wax ne:

«Sàmmleen yoon, di def njekk.
Sama wall kat a ngi dikk léegi,
sama njekk laa ne, léegi mu teew.

² Ndokkleee kuy jéfe lii,
ndokkleee doom aadama ju jàppoo lii,
di sàmm bésub Noflaay,
bañ koo ñàkke worma,
di sàmm loxoom ci jépp jéf ju bon.»

³ Doomu doxandéem bu jokku ci Aji Sax ji,
bumu ne: «Aji Sax jee may beddee beddi ci
ñoñam.»

Jaam bu ñu xañ ngóora it bumu ne:

«Man garab gu jaasir doñj laa.»

⁴ Aji Sax ji kat dafa wax ne:

«Jaam yi ñu xañ ngóora,
su ñu sàmmee sama bési Noflaay,
taamu sama coobare,
tey feddli sama kóllëre,

⁵ maa leen di may ci sama biir kér, sama biir ett,
doj wu ñu leen di fattlikoo
ak tur wu leen di gënal doom yu góor ak yu
jigéen.

Tur wu sax dàkk laay may
jaam yi ñu xañ ngóora,
te du fey mukk* ..»

⁶ Doomi doxandéem yi ànd ak Aji Sax ji,
ngir liggéeyal ko,
ngir sopp turu Aji Sax ji,
te di ay jaamam,
muy képp kuy sàmm bésub Noflaay,
baña ñàkke worma bés bi,
xanaa di feddli kóllëreem,

⁷ mu ne: «Ñooñu, maa leen di yóbbu
sama kaw tund wu sell,
bànneexale leen sama biir kérug ñaan,
seen saraxu rendi-dóomal ak yeneen sarax,
dees na leen ko nangul sama kaw sarxalukaay,
ndax dees na wooye sama “kér, kérug ñaan”,
ñeel xeetoo xeet.»

⁸ Kàddug Boroom bi Aji Sax jaa ngi,
kiy dajale giiri Israyil yi tasaaroo,
mu ne: «Maay dajaleeti,
dollí ca la ma dajale woon.»

* **56:5** 56.5 Seetal ci Sarxalkat yi 21.16-20.

Ab daan ñeel na njuit yi

- ⁹ Yeen rabi àll yi,
dikkleen ci bernde ji,
yeen rabi gott bi yépp.
- ¹⁰ Jongrukati Israyil yépp a silmaxa,
te xamuñu dara.
Ñoom ñépp a diy xaj yu luu,
manuñoo baw,
xanaa tèdd di jeneer,
soppi nelaw.
- ¹¹ Xaj yu tiita tiit lañu,
xamuñu suur,
te ñooy sàmm yeey!
Ñoom ñépp, kenn manu cee xam dara,
seen yoonu bopp lañu topp,
ak seen amin wu lewul.
- ¹² Na nga naa: «Dikkleen, ma indi biiñ,
nu màndeew ñoll; tey ak ëllëg;
li fi des du jeex.»

57

Ab daan ñeel na moykat yi

- ¹ Aji jub ñaa ngi dee,
te kenn yégalu ko yaramam.
Gor ñaa ngi faatu,
te kenn ràññeewul
ne aji jub ji, faatoom, musiba la koy moyale.
- ² Kiy am jàmm ëllëg,
di am noflaay ci biir tèraayam,
mooy kiy wéye njub.
- ³ Waaye yeen, dikkleen fii,
yeen doomi xérëmkat yi,

yeen askanu njaalookat yiy gànctu,
⁴ ana ku ngeen di ñaawal?
 Ana ku ngeen di ñóobi,
 ak di ko kókkali?
 Xanaa dungenee doomi moykat,
 di askanu workat,
⁵ di xabtaloo bànnex
 ci ker garab yu mag yi,
 ak ker garaboo garab gu naat,
 di rendi seeni doom ci yoonu ndox yi,
 ak xarantey doj yi?
⁶ Yaw Israyil, jélal doj yu rattax
 yi ci yoonu ndox wi, séddoo,
 muy sa cér, nga muurloo!
 Ñoom ngay tuural,
 di leen defal ay saraxi pepp.
 Waaye Aji Sax ji nee:
 «Ndax damay jéllale?»
⁷ Tund wu mag te kawe,
 nga fàkk fa téraay,
 yéeg fa, di fa sарxalal.
⁸ Yaa takk say baaxantal
 ci sa lafu bunt ak sa jëni bunt,
 yaa ma wacc, di ñorikoo feneen,
 yéeg sab lal, yaatal.
 Yaa takktook ñii nga soppa tèddal
 te safoo di niir seeni cér.
⁹ Yaa tukki ba ca buur ba, yóbbaaleg diw,
 ak cuuraay lu ne gànññ,
 yebal say ndaw fu sore,
 ba ñu àkki njaniiw.
¹⁰ Tukki bu sore bu la sonal sax
 taxu la ne: «Fomm naa.»

Bànnex bi ngay séentu ngay leqlikoo,
ba tax sonnuloo.

11 Ana kooy tiit,
ak koo ragal ba di ma wor,
fàttlikootoo ma,
faaleetoo ma?

Damaa noppi lu yàgg daal,
ba tax ragalatoo ma?

12 Defe nga ne njekk nga def,
waaye dinaa la weer,
te sa jëf du la jariñ.

13 Boo wootee wall,
na la sa gàngooru tuur xettli.
Ñoom ñépp la ngelaw di buub,
callweer yóbbu leen.
Waaye ku ma làqoo,
kookooy moom réew mi,
séddoo sama tund wu sell wi.

14 Dees na ne: «Maasaleeenoo, maasaleeen,
yaatal leen yoon wi,
te jèle luy pakk ci sama yoonu ñoñ.»

15 Ku màgg, ku kawe ki,
ki màkkaanam sax dàkk
te turam sell, daa wax ne:
«Fu kawe te sell laa màkkaanoo,
maa dëkk ak boroom xol bu mokk,
te toroxlu,
ngir leqli ku toroxlu,
leqli boroom xol bu mokk.

16 Duma wéye di sikke ba fàww,
duma saxoo di mer,
lu ko moy képp ku ma sàkk

day tággook bakkanam.

¹⁷ Ñaawtéefi Israyil ak alalam ju lewul
moo ma merloo,
ma duma ko, xañ ko sama kanam,
waaye mu tē ticc, topp xolam.

¹⁸ Xam naa jikkoom,
waaye maa koy faj,
wommat ko,
dëfale koy xéewal,
mook ñiy ñaawloondook moom.

¹⁹ Maay teg ci seen làmmiñ kàddug cant.
Jàmm, na jàmm ñeel ñépp,
ku soreek ku jege.»
Kàddug Aji Sax jee.

Mu ne: «Maa leen di faj.»

²⁰ Waaye ñu bon ñi, mbete géej
gu sàmbaraax, tëë dal,
gannax yay baaje ban ak suuf.

²¹ Sama Yàlla nee:
«Jàmm du ñeel ñu bon ñi.»

58

Jaamu Yàlla, tuub, rafet jikkoo ci gën

¹ Aji Sax ji nee: «Xaacul loo man,
te bul ñéebelu;
àddul ni bufta,
te yégal sama ñoñ seen bàkkaar,
ngir waa kér Yanqóoba yii xam seeni moy.

² Man mii lañuy sàkku bés bu ne,
di wuta xam sama coobare!
Mbete xeet wuy def njekk,
te waccul ndigalu yoonu Yàllaam.
Ñu ngi may ñaan àttey njekk,

di sàkku man Yàlla, ma jege leen,
³ te naa: "Ana lu nuy woor te xooloo ci?
 Lu nuy toroxlu te teewluwoo?"
 Ma ne: Bés bu ngeen woor,
 yeena ngi topp seen bakkan,
 di séqatal seeni liggéeykat.
⁴ Xanaa du koor gu ànd ak xulook ñaayoo,
 ak di joqlantey këmëx yu metti?
 Su ngeen bëggee seen ñaan àgg fa kaw,
 dungeen woor ni ngeen woore tey.
⁵ Ndax lii moo di koor gi ma taamu,
 ci bés bu nit kiy toroxlu?
 Koorug dëngal loos ni barax,
 lal saaku, sotti ab dóom, tèdd
 di ko ñaawloo?
 Loolooy seen koor,
 ci bés bu Aji Sax ji rafetlu?

⁶ «Xanaa du lii moo di koor gi ma taamu:
 yolomal jéng yu metti,
 fecci buumi noteel,
 afal ku diis;
 dog lépp luy xeetu noteel?

⁷ Xanaa du sédd ku xiif saw ñam,
 fat néew-ji-doole ju amul fu mu dëkk,
 gis ku rafle, wodd ko,

te baña nëbbu mbokk mu soxla?

⁸ Su boobaa seen leer feq ni njël,
 seen góom gaawa wér,

seen njekk jiit u leen,

leeru Aji Sax ji féete leen gannaaw.

⁹ Su boobaa bu ngeen wooyee Aji Sax ji, mu
 wuyu;

ngeen ne wallóoy, mu ne “Maa ngi.”
 Ndegam génne ngeen noteel ci seen biir,
 ak di joxoñeek a wax lu ñaaw,
 10 di leel ku xiif lu ngeen gëna bëgg,
 di reggal néew-ji-doole,
 su boobaa seen leer fenke biir lëndëm,
 seenug këruus di ag njolloor,
 11 Aji Sax ji di leen jiite fu ngeen tollu,
 di leen mändale joor gu maral,
 dëgëral seeni cér,
 ngeen mel ni tool bu ñu suuxat,
 mel ni bëtu ndox bu dul ñiis,
 12 seeni nit tabaxaat gent ya woon,
 ngeen yékkatiwaat kenu yu yàggä yàggä.
 Dees na la wooye jagalkatu xar-xar yi,
 mbaa kiy yeosal xàll yi, ngir dëkke réew mi.

13 «Su ngeen téyee seen tànk bésüb Noflaay,
 baña def li leen neex sama bés bu sell;
 su bésüb Noflaay di seen nammeel,
 di bésüb Aji Sax bu sell bu ngeen teral;
 ngeen teral bés bi,
 bañ cee topp li ngeen jikkowoo,
 di topp seen bakkan
 ak wax ju dul jeex;
 14 su boobaa ngeen bànnéexoo Aji Sax ji,
 ma waral leen kawtey réew mi,
 leele leen seen céru maam Yanqóoba.»
 Aji Sax ji déy wax na ko.

59

Bàkkaar ñag na diggante Yàllaak ñoñam

¹ Ma ne, Aji Sax ji gàttul loxo ba tèle walloo,
noppam naqariwul ba tere koo dégg.

² Seeni ñaawtéef a dox seen digganteek
seen Yàlla.

Seeni moy a leen xañ kanamam,
ba mu tanqamlu leen.

³ Seeni loxoo taq deret,
ngeen ne lijj ci ñaawtéef,
làmmiñ di fen, di sos njekkar.

⁴ Du njekk gu kenn wut cib àtte,
du dëgg gu kenn sàkku cib layoo.

Ñu ngi yaakaar caaxaan, di fen,
di sos ayib, wasin ñaawtéef.

⁵ Nenu ñàngóor lañuy tostan,
di ràbb lèndu jargoñ.

Ku lekk ci nen yi dee,
te boo ci tojeeb nen,
saamaan félle ca.

⁶ Seeni lènd du ràbbe ba solal nit,
mbaa di sàng kenn;
seenum ràbb ñaawtéef lay jur,
seen loxo ya ko liggéey sabab fitna,

⁷ seeni tànk daw wuti lu bon,
ñuy yàkkamtee tuur deretu ku deful dara,
seeni xalaat di ñaawtéef,
yàquteek njaaxum féete ca seeni yoon.

⁸ Xamuñu yoonu jàmm,
te yoon amul fa ñuy jaare,
xanaa sàkk seen yoon yu lunk
te ku fa awe doo daj jàmm.

⁹ Lee tax yoon sore nu,
te njekk du nu dab.

Danuy yaakaar leer,
lëndëm ne jaas,
nuy séentuy ceeñeer,
tey lëndëmtuy wéy.

10 Nu ngi làmbatub tabax ni silmaxa,
di tëñëx-tëñëxi ni ku amuli gët,
di fakktalu bëccëg ndarakàmm ni bu doon
guddi,

dëkk ak ñu wér péñj te mel ni ña dee.

11 Nun ñépp a ngi xiiru ni rab wu aay,
binnee binni niy xati,
yaakaar yoon, yoon wuute,
séentu wall, wall sore.

12 Sunuy tooñ a bare fi sa kanam,
sunuy moy a nu seedeel,
sunuy tooñ a nu topp,
te xam nan xéll sunuy ñaawtéef.

13 Noo tooñ Aji Sax ji, wor ko,
te noo dëddoo sunu Yàlla jii,
kàdduy fitna ak fippu,
ak fen yu nu mébét, nas ko,

14 ba yoon dellu gannaaw,
njekk dànd,
dëgg fakktaloo fa pénc ma,
njub tëë agsi.

15 Dëgg a tumurànke,
ku dëddu mbon sax, ñu ñori la,
Aji Sax ji gis ci, ñaawlu ko,
nde yoon a amul.

16 Daa xool, gisul kenn;
mu tiisoo li ci kenn jógul,
moo tax loxoom may ko ndam,
te njekkam la sukkandikoo.

17 Moo sol kiiraayal njekk,
mbaxanawoo mucc,
solati yérey mbugale,
làmboo turkib xéraange.

18 Mooy delloo ku ne yool ba mu yelloo,
mbugal ay bañam, fey ay noonam,
ba delloo waa dun ya yool ba ñu yelloo.

19 Dees na wormaale turu Aji Sax ji fa sowu,
wormaale teddngaam ba penku.

Bu noon bi agsee ni walum dex,
ngelawal Aji Sax jee koy wal, mu daw.

20 «Ab jotkat ay dikkal Siyon,
ba jot ñi tuub seeni bákkaar ci askanu
Yanqóoba.»

Kàddug Aji Sax jee.

21 «Man nag, lii mooy sama kólléreek ñoom:
Sama xel mi tegu fi sa kaw,
ak sama kàddu yi ma yeb ci sa gémmiñ,
lenn du ci teqlikook sa gémmiñ
ak sa gémmiñ askan,
ak sa gémmiñ askanu askan, tey ak èllég.»
Aji Sax jee ko wax.

60

Leer dina fenkal Yerusalem

1 Yerusalem, jógal ne ràññ, sag leer feq na;
teddngay Aji Sax ji fenkal na la!

2 Lèndëm gaa ngii di muur àddina,
mu ngi guddil askan yi,
te yaw, Aji Sax ji fenkal la,
leeru teddngaam feqal la.

3 Ay xeet ay fekksi sag leer,

ay buur wutsi sa ceeñneeru njël.

⁴ Séentul fi la wér ba gis:
 ñoom ñépp a daje, di la fekksi,
 sa doom yu góor a dikke fu sore,
 te sa doom yu jigéen it
 dees leena fab, indaale.

⁵ Yaa koy gis, sa kanam ne ràññ,
 fit tef-téfi, xol fees dell,
 nde dees na walbati xéewali géej, indil la,
 alali xeet yi dikkal la.

⁶ Ndiiraanu giléem a lay fees
 ak njëggi Majan ak Efa,
 ñoom ñépp sëfe Saba.
 Dees na indi wurus ak cuuraay
 tey kañaale Aji Sax ji.

⁷ Gétti Kedar yépp a lay dajesil,
 kuuyi Nebayot di la jariñ,
 te di sarax yu dajeek ngérém
 ci kaw sarxalukaayu Aji Sax ji,
 ma di ko darajaale sama teddngay kér.

⁸ Ana ñuy ñii di naaw niy niir,
 nirook ndiiraanu pitax yu jém seeni tàgg?

⁹ Waa dun ya déy a nga may séentu,
 gaali Tarsis yu mag yaa nga jiitu,
 jèle fu sore sa doom yu góor ya,
 indaale seen xaalis ak seen wurus,
 ngir sa Yàlla Aji Sax ji,
 Aji Sell ju Israyil ji la teral.

¹⁰ Ay doomi doxandéem ay tabaxaat say tata,
 seeni buur di la surgawu.
 Maa meroon, duma la,

maa la baaxe, yérëm la.

11 Say wunt ay ubbiku saa su ne,
guddeek bëccëg, du têje,
xanaa di la jàlleel alali xeet yi,
seeni buur riixle ànd ca.

12 Mu diw xeet, dim réew,
ku la ci nangulul sàngku.

Xeet yooyu yépp ay yàqu yaxeet.

13 Taaru àllub Liban a lay ñibbsil,
garabu sippar, pëe ak geneen gu dëkke naat,
taaralsi sama kër gu sell gi,
ba ma terale ci sama ndëggastalu tànk.

14 Ña la daa néewal,
seeni doom a lay sukkalsi.

Ña la daa ñàkke worma,
mujj di fóon say tànk.

Dees na la wooye «Dëkkub Aji Sax ji»,
mbaa «Siyon, màkkaanu Aji Sell ju Israyil.»

15 Dees laa foñ, jéppi la,
ba kenn jaareetu fi.

Waaye maay def ñu di la sagoo ba fàww,
di la bége sët ba sétaat.

16 Yaay naan soowum xeet yi,
nàmp weenu buur yi,
ba xam ne maay Aji Sax jiy walloo,
jàmbaaru Yanqóoba ji lay jot.

17 Maay wuutale xànjär, wurus;
wuutale weñ gu ñuul, xaalis;
bant, xànjär;
doj, weñ gu ñuul.

Jàmm laay def mu jiite la,
def njekk yilif la.

18 Deesatul dégg ci sam réew:
 «Fitna ñéew na!»
 deesatul dégg it fi sa kemu suuf:
 «Yàqute ak Yàqulee ngi!»
 «Mucc» ngay tudde say tata,
 te «Cant» ngay tudde sa bunti dëkk.
19 Du jant a lay leeralati bëccëg,
 te weer du la niital;
 Aji Sax jeey doon sag leer ba fàww,
 sa Yàlla jooju di sab taar.
20 Sab jant du sooti,
 sa weer du suuxati.
 Aji Sax jeey doon sag leer ba fàww,
 sa fani ñaawlu jeex.
21 Sa askan wépp ñu jub lañuy doon,
 te ñooy moom réew mi ba fàww.
 Ñooy sama njëmbat li ma jëmbatal sama bopp,
 sàkke leen samay loxo, ngir sama teddnga teew.
22 Ki ci gëna tuut ay meññ junni,
 ki ci gëna néew jur xeet wu mag.
 Man Aji Sax ji, bu lii jotee,
 ma gaaw koo sottal.

61

Ki Boroom bi fal dikk na

1 Noowug Boroom bi Aji Sax jaa ngi fi sama kaw,
 ndax Aji Sax jee ma diw*, fal ma,
 ngir ma àgge néew-doole yi xibaaru jàmm.
 Moo ma yebal ngir ma dëfal ñi seen xol jeex,
 yégal jaam yi, seen goreel,

* **61:1** 61.1 Baat bi ñu tekkee diw, ci la baatub Almasi jóge. Ab sarxalkat mbaa buur lañu daan diw, fale leen ko bala ñoo door seen liggéey.

yégal ñi ñu tēj, seen ubbite.

² Moo ma yónni ngir ma yéene atum yiwu Aji
Sax ji,

ak at mu sunu Yàlla di mbugalee.

Moo ma yónni ngir dëfal ñiy ñaawlu ñépp,

³ ngir tabb waa Siyoñ ñiy ñaawlu,
jox leen kaala gu wuutu dóom bi ñuy ñaawloo,
ak diwu mbégte mu ñu weccikoo seenu tiis,
ak mbubbam cant mu ñu weccikoo xol bu jeex,
ba ñu naa: «Ñii ñoo di ponkali garabi njekk yi,
njëmbat li Aji Sax ji jëmbat,
ngir teewal teddngaam.»

⁴ Ñooy tabaxaat gent ya woon,
yékkati bérab ya tasoon bu yàgg,
dekkal dëkk yu tas,
bérab yu gental ay maasi maas.

⁵ Ay gan ay dikk,
di leen sàmmal seeni gétt,
ay doomi doxandéem di leen beyal tool
ak tóokëru reseñ.

⁶ Yeen nag lees di wooye:
«Sarxalkati Aji Sax ji,»
ñu naa: «Sunu surgay Yàlla yaa ngi!»
Alali xeet yi, yeena koy lekk,
di damoo seeni koom.

⁷ Sama ñoñ ay weccikoo seen gàcce
ñáari céri teraanga,
sarxolley mbég di seen cér,
wuutu toroxte.

Ñáari cér lañuy am ca seenum réew,
mbégte mu sax ñeel leen.

⁸ Man Aji Sax ji, damaa sopp yoon,
bañ càcc ak ñaawtéef.

Maay dàmp sama ñoñ ni mu ware,
fas ak ñoom kóllëre gu sax.

⁹ Dees na xàmmee seen askan fi biir xeet yi,
xàmmee lu meññe ci ñoom fi biir waaso yi;
képp ku leen gis ràññee ne
ñoooy askan wu Aji Sax ji barkeel.

Almasi bége na mucc gi mu maye

¹⁰ Maa bégá bég ci Aji Sax ji,
sama xol di sedd ci sama Yàlla jii.
Moo ma solal yérey mucc,
sànge ma mbubbam njekk,
may nirook boroom séet bu kaalawu
ni sarxalkat,
ne xenjaw ni séet bu takki gànjaram.
¹¹ Ni suuf di fettalem njebbit,
ab tool di ko saxalem jiwu,
ni la Boroom bi Aji Sax ji di jebbile
njekk ak cant,
xeetoo xeet seede ko.

62

Yerusalem mooy siggi, mucc

¹ Siyoñ a tax duma selaw,
Yerusalem laa ne, moo tax duma noppi,
ba kera ceeñeeru njekkam teew,
jumu muccam dikkal ko.
² Su boobaa xeet yi gis sag njekk,
buur yépp gis sa daraja,
ba ñu di la tudde tur wu yees,
wu Aji Sax ji di tuddal boppam.
³ Yaay doon kaalag teddnga
ci loxol Aji Sax ji,

yaay doon mbaxanam buur,
ci sa biir loxol Yàlla jii.

⁴ Deesatu la wooye «Dëkk bi ñu wacc,»
deesatul wooye sam réew «Réew mu gental.»
Xanaa ñu wooye la «Dëkk bi ma neex,»
tey wooye sam réew «Boroom jëkkër,»
nde yaa neex Aji Sax ji,
te sa réew mi dina am boroom kér.

⁵ Ni xale bu góor di takke ab jang,
ni la la sa doom yu góor di moome ni jëkkër*;
ni boroom séet di bégee ab séetam,
ni la la sa Yàlla di bégee.

⁶ Yerusalem, tabb naa ay jongrukat
ci sa kawi tata.

Buñu selaw, du guddi du bëccëg!
Yeen ñiy soññ Aji Sax ji,
buleen dal-lu.

⁷ Buleen may Aji Sax ji fu mu dal-loo,
ba kera muy taxawalaat Yerusalem,
ba def ko sababu cant fi kaw suuf.

⁸ Aji Sax jee giñ lii ci ndijooram,
giñ ko ci përègam bi àttan,
ne: «Dootuma joxe sam pepp,
say noon dunde,
te doomi doxandéem dootuñu naan
sa biñ bu bees,
bi nga ame saw ñaq.

⁹ Ni góob pepp mee koy lekk,
di ko sante Aji Sax ji.

* ^{62:5} 62.5 doom yu góor yi ñooy waa Yuda, te ñooy moom seen
réew.

Ñi witt reseñ jeey naan biiñ bi,
fi sama biir ett bu sell.»

10 Jàllsileen, jàllsileen bunti dëkk bi,
xàll-leen yoonu xeet wi,
maasaleleenoo, maasaleleen ngér mi,
dindi doj yi!

Yékkatileen raaya ju askan yépp gis.

11 Aji Sax jaa ngoog,
yéene na lii ba ca cati àddina.

Mu ne: «Waxleen Siyonj dëkk bu taaru bi, ne ko:
“Sab jotkat a ngii di diikk!
Mu ngii ànd akub yoolam,
ñaqu liggeyam jiitú ko.”

12 Dees na leen wooye “Askan wu sell wi,”

“Ñi Aji Sax ji jot;”
te yaw Yerusalem dees na la wooye “Ki ñu
namm,”
“Dëkk bi ñu waccul.”»

63

Jàmbaaru Aji Sax ji am na ndam

1 Ana kuy kii bawoo Edom*,
sol yére yu xonq, bawoo Boccra†?

Kii ak yéreem yu yànj,
di daagoo dooleem ju bare?
«Xanaa man mii di waxe njekk,
te am dooley walloo.»

2 Lu waral sa xonqaayu mbubb mi,
sa yére yi mel ni ku doon dëre

* **63:1** 63.1 Edom mi doon seexu Yanqóoba, moom lañu dippee
réewum Edom, te moo taxawe taxawaayu noonub Aji Sax ji.

† **63:1** 63.1 Boccra ab dëkk la ci réewum Edom.

dërukaayu reseñ?

³ «Maa doon dëre tànk, man kenn
ci ab dërukaayu reseñ,
xeet yépp kenn dérlewu ma ci.
Sama mer laa leen dëre,
samam sànj laa leen dëggaatee,
seen deret tis ci samay yére,
ma taqal sama yére yépp.

⁴ Bésub mbugal laa mébétoon,
te atum njot teew.

⁵ Ma xool,
gisuma ku ma dimbali,
ma tiislu li ma amul ku ma jàpple.
Ca la ma sama pérèg wallu,
samam sànj jàpple ma ca.

⁶ Sama mer laa dëggaatee ay xeet,
samam sànj laa leen màndal,
sotti seen deret fi suuf.»

Yonent baa ngi soññ Aji Sax ji

⁷ Jëfi ngoru Aji Sax ji laay fàttlee
ak cant gi Aji Sax ji yellowo,
ngir li nu Aji Sax ji defal lépp;
mbaax gu réy gi mu ji waa kér Israyil,
defal leen ko ci yérmandeem,
ak jëfi ngoram gu réy.

⁸ Moo noon: «Sama ñoñ déy ñoom a!
Ñee di doom yu dul tas yaakaar.»
Mu daldi doon seen jotkat.

⁹ Seen gépp njàqare di njàqarey boppam,
malaaka mi mu jàkkaarloul musal leen ca.
Moo leen sopp, ñeewante leen,
ba jotal leen boppam,
te fu ñu masa jaare démb,

mu fab leen, boot.

¹⁰ Waaye ñoom ñoo fippu,
di naqaral xelam mu sell,
mu soppliku seen noon,
ba mujj di xareek ñoom.

¹¹ Ñoñam ña daldi fattliku janti Musaa ya woon.
Ña nga naan: «Ana ki jàlle woon Israyil géej,
mook sàmmi géttam ga?

Ana ki yebaloon noowam gu sell ci seen biir?

¹² Ana ki dawaloon dooley pérégam bu tedd ba,
ñeel ndijooru Musaa,
xaral leen ndox ma,
ba ame ca woy wu sax dàkk?

¹³ Ana ku leen doxloo woon biir xóote ya,
ñu mel ni fasi naari góor ci biir mändin,
te téréfuñu?

¹⁴ Ni jur gu wàccew xur, di fa fore,
ni la leen Noowug Aji Sax ji
maye ab dal-lukaay.

Noonu nga wommate sa ñoñ,
ba ame ca woy wu rafet.

¹⁵ «Ngalla séentool asamaan,
xooleel fa sa kér gu sell ga ne ràññ.
Ana sa fiiraangeek sa njàmbaar?

Sag rafet xol ak sa yérmande ñooru na ma!

¹⁶ Yaw déy yaa di sunu Baay.

Ibraayma xamalu nu dara,

Israyil[‡] xamu nu.

Yaw Aji Sax ji yaa di sunu Baay,
sa tur a di “sunu Jotkat naka jekk.”

[‡] **63:16** 63.16 Israyil fii mooy maam Yanqóoba.

¹⁷ Aji Sax ji, loo nuy wërloo fu sore say yoon,
di nu dërkiisal, ba ragalatunu la?
Sang bi, délsil ngir nun,
sa giir yii nga séddoo.

¹⁸ Nun sa xeet wu sell wii,
moomunu réew mi lu yàgg,
te noon yi dëggaate nañu sa bérab bu sell.

¹⁹ Nu ngi mel ni xeet woo masula yilif,
xeet wu ñu masula tudde sa tur.
Éy soo xaroon asamaan, wàcc,

ba tund yi yëngu fi sa kanam!»

64

¹ Ni sawara di jafale boob,
baxale ko am ndox,
ni ngay xamalsee say noon, saw tur,
ba yooyu xeet di lox fi sa kanam.

² Ba ngay def kiraama ya ñu séentuwulloon,
yaa wàcc, tund yi yëngu fi sa kanam.

³ Ca cosaan ba tey maseesula dégg,
nopp masula dégmati,
bët masula gis yàlla ju la moy,
mu defal nii ku ko yaakaar.

⁴ Yaay gatandu kiy bége njekk gi tuy jëfe
te di ba xel say yoon,
yi ñu mas di jaare, ba mucc.

Waaye kat, yaa nu mere, ndax noo bàkkaar.

⁵ Nun ñépp a mujj mel ni sobe,
ni sagaru sobe la sunu gépp njekk mel.
Nu ngii nun ñépp mel ni xob wu lax,

sunuy tooñ buub nu, yóbbu ni ngelaw.

⁶ Du kenn kuy wormaal sa tur,
mbaa mu yewwu ba jàpp ci yaw,

yaa nu làq saw yiw,
yaa nu def ban bu tooy
ci sunu biir ñaawtéef yi nu tanc.

⁷ Waaye déy, Aji Sax ji, yaa di sunu Baay;
noo di ban, yaw ngay tabaxkatzu njaq,
nun ñépp di sa liggeeyu loxo.

⁸ Éy Aji Sax ji, bul mer lool,
bul ba xel fàww ci ñaawtéef.
Ngalla seetal ne nooy sa ñoñ, nun ñépp.

⁹ Sa dëkk yu sell doon nañu màndij,
Siyon ca la, doon na màndij.
Yerusalem laa ne, gental na!

¹⁰ Sunu kérug jaamookaay gu sell ga te tedd,
fa la sunuy maam daa màggale,
sawara xoyom na ko,
mboolem lu nu soppoon yàqu yaxeet.

¹¹ Éy Aji Sax ji, lii lépp xanaa doo ci téye sa loxo?
Xanaa doo ci selenlu, teg nu gàcce gu réy?

65

Aji Sax ji wuyu na

¹ Maa may ay nit tont te laajuñu ma.
Maa leen may, ñu gis ma te seetuñu ma woon.
Maa ne leen: Maa ngii, maa ngii!
te ñuy xeet wu dul tudd sama tur.

² Samay loxo laa yendoo tàllal askanu fippukat,
nit ñuy doxe yoon wu baaxul,
topp seen xelum bopp.

³ Ñoo di xeet wu ma ne jàkk,
dëkke maa naqaral,
di sarxalali tuur ci biiri tool,

di leen taalal cuuraay ci kaw sarxalukaay
 bu ñu tabax,
⁴ di tooge diggi bàmmeeł,
 di fanaan bérab yu làqu;
 di lekk yàppu mbaam,
 seeni cin def ñam yu sobewu,
⁵ te ñu naan: «Dellul gannaaw,
 bul ma jege, maa la gëna sell!»
 Lii déy daa mel ni saxar ci samay wakkan,
 mel ni sawara su yendoo boy.

⁶ Ma ne dogal a ngii binde, fi sama kanam:
 «Duma noppí déy, maa leen di fey,
 maa leen di fey ba mu mat sëkk.»
⁷ Aji Sax ji nee: «Muy seeni ñaawtéef,
 di seen ñaawtéefi maam,
 ya daan taalali tuur cuuraay ca tund yu mag ya,
 di ma kókkali ca kaw tund yu ndaw ya,
 lépp laa leen di fey ba mu mat sëkk,
 muy seen añu jëf ja woon.»

⁸ Aji Sax ji dafa wax ne:
 «Ni nit di gise cabbu reseñ ju fees dell,
 ne: “Buleen ko yàq,
 ngëneel a ngi ci,”
 noonu laay def ngir sama jaam ñi,
 baña boole lépp yàq.
⁹ Fi Yanqóoba laay soqee aw askan,
 fi Yuda laa ne, fi laay jéle lu séddoo samay tund.
 Samay tånnéef a koy séddoo,
 sama jaam ñi kay a fay dëkke.
¹⁰ Joorug Saron ay dellu di parlub gàtt gi,
 xuru Akor di goorukaayu nag yi,

ñeel sama ñoñ ñi may sàkkuji.

11 «Waaye yeen ñi wacc Aji Sax ji,
yeen ñi fätte sama tund wu sell wi,
di taajal ndab, Gàdd tuur mi*,
di xellil biiñu njafaan, Meni tuur mi†,
12 maa leen di dogalal saamar,
ngeen bokk sukk, ñu rendi leen,
ngir maa woote, wuyuwuleen,
ma wax, dégguleen,
xanaa di def li ma ñaawlu,
taamu li ma buggul.»

13 Moo tax Boroom bi Aji Sax ji dafa wax ne:

«Ma ne sama jaam ñeey lekk,
yeen ngeen nekke xiif.

Ma ne sama jaam ñeey naan,
yeen ngeen nekke mar.

Sama jaam ñeey bànnexuji,
yeen, ngeen nekke gàcce.

14 Sama jaam ñeey sarxolleji
ndax xol bu neex,
yeen ngeen di yuuxu ndax naqaru xol,
di jooyoo ndax xol bu jeex.

15 Seen tur wi ngeen bàyyi gannaaw
la samay tannéef di móoloo,
naan: “Yal na la Boroom bi Aji Sax ji rey ni diw
ak diw,”

waaye ñoom sama jaam ñi,
tur wu yees lees leen di wooye,

* **65:11** 65.11 Gàdd mooy tuur mi ñu jiiñ wërsëg. † **65:11**
65.11 Meni mooy tuur mi ñu jiiñ ndogal.

16 ba képp ku namma barkeel fi kaw suuf,
 ci Yàlla jiy dëgg la koy ñaane,
 te kuy giñ fi kaw suuf it,
 ci Yàlla jiy dëgg la koy giñe.
 Day fekk njàqare ya jiit di lu ñu fàtte,
 te di lu làqu saay gët.

Aji Sax ji yeesal na cakkéefam

17 «Maa ngii di sàkksi asamaan su yees
 ak suuf su yees.

Deesul fattlikooti yëf ya jiit,
 xel dootu ci dem.

18 Bégleen kay,
 te saxoo di bànnexoo li ma sàkk:
 Maa ngii di sàkk Yerusalem mbégté,
 waa dëkk ba nekke bànnex.

19 Maay bége Yerusalem,
 bànnexoo sama ñoñ.
 Deesu fi déggati ay jooy,
 mbaa coowal njàqare.

20 Deesu fi gisati
 tuut-tànk bu dund fan yu néew,
 mbaa mag mu dee te ay fanam matul,
 ba ku am téeméeri at dee sax, di ku gàtt fan,
 te ku àggul téeméer, ñu ne alku nga.

21 «Ñooy tabax ay kér, dëkke,
 jëmbati tóokér, lekk ca meññeef ma.

22 Duñu tabax moos, keneen dëkke;
 duñu jëmbat moos, keneen xéewloo.
 Sama ñoñ ay tollook garab yi fan,
 sama xejj yeey jagoo seenu ñaq.

23 Duñu liggéeyati mukk ci neen
 te dootuñu jural mbas.

Ñooñooy askanu ñi Aji Sax ji barkeel,
seeni doom nekk ak ñoom.
²⁴ Su boobaa balees woote,
man, maay wuyu;
balaa ñoo daane seen kàddu, ma nangul leen.
²⁵ Bukki ak mboteey bokk di for,
gaynde niw nag, di for um ñax,
jaan di dunde pënd.
Deesatul gaañe mbaa di lore,
fi mboolem sama kaw tund wu sell wi.»
Aji Sax jee ko wax.

66

Ragal Yalla du jëfi ngistal

¹ Aji Sax ji dafa wax ne: «Asamaan sama
ngàngunee,
suuf di sama ndëggastal.
Ana kér gu ngeen may tabaxal man?
Ana ban bérab ay sama dal-lukaay?
² Mboolem yooyu, sama loxoo ko sàkk;
nii la lépp ame.» Kàddug Aji Sax jee.
«Ku mel nii laay niir:
néew-ji-doole ji xolam jeex,
te muy déglu sama kàddu bay lox.
³ Kee moom mu ngi rendiw yékk, sarxal,
te teewu koo bóome.
Kee rendiw xar, sarxal,
te teewu koo damm loosu xaj, sarxal.
Kee ngi joxe saraxu pepp,
te teewu koo tuur deretu mbaam-xuux.
Kee di taal saraxu baaxantalú cuuraay,
tey jaamu ay tuur.
Ñoo taamu seen yoonu bopp,

safoo seeni jëf ju seexluwu.

⁴ Man it maa leen di taamoo jox seeni mbugal,
dikke leen tiitaange yi ñu yellow,
ngir maa woote, kenn wuyuwul,
ma àddu, dégluwanu ma.

Xanaa di def lu bon lu ma ñaawlu,
li ma buggul, ñu taamu ko.»

Aji Sax ji mujj na dikk

⁵ Dégluleen kàddug Aji Sax ji,
yeen ñiy déglu kàddoom, di lox.
Lii de mooy seen kàddug bokk,
yi leen jéppi, di leen dàq ngir samaw tur.
Ñu ngi naan: «Na Aji Sax ji darajaal boppam,
ba nu teewe seen mbégte, yeen ñii!»
Waaye ñoom de ñooy rus.
⁶ Coowal xaree ngoog bawoo dëkk ba,
coow laa nga jóge kérug Yàlla ga,
coowal Aji Sax jee, mooy yool ay noonam.

⁷ Kii balaa matu, wasin na,
bala moo am mititu mat, jur na doom ju góor.

⁸ Ku masa dégg lu mel nii?

Ku masa gis lu mel nii?

Am réew dina sosu ci benn bés a?

Am aw xeet dina jekki sosu ci wenn fan?

Siyonj de, moo tàmbali matu rekk,

jur doomam yu góor.

⁹ Aji Sax ji nee: «Man miy jàapple jigéen
ba èmbam mat,
dinaa ko xañ wasin?
Man miy wasinloo nit,
dinaa fatt njurukaayam?»
Sa Yàllaa ko wax.

- 10** Yeen soppey Yerusalem yépp,
bégandooleen ak moom,
te di ko bânnexoo.
Mboolem yeen ñi doon ñaawlu tiisu Yerusalem,
bokkleen ak moom xolam bu sedd.
- 11** Su ko defee ngeen nàmp ba suur
weenam wiy naxtaane,
su ko defee ngeen nàmp bay tàqamtiku
soowum weenam mi ne xéew.
- 12** Aji Sax ji déy dafa wax ne:
«Maa ngii di yóbbu Yerusalem
ci jàmm ju mel ni géej,
ak waamey koom muy wal, bawoo ci xeet yi.
Yeenay tooge luppu Yerusalem, di nàmp,
uufu ciy óom, mu di leen raay.
- 13** Man maa leen di naxtaan ba ngeen dal,
ni doom ju ndeyam di naxtaan ba mu dal,
ngeen am xel mu dal fi Yerusalem.
- 14** Yeenay teewe lii, seen xol tooy,
seen yaram leqliku ni ñax mu yég nawet.
Dooley Aji Sax ji la ay jaamam di xam,
te am sànjam la ay noonam di xam.
- 15** «Aji Sax ji déy a ngii dikke sawara,
ay watiram mel ni ngélén,
mu nara sànju, sotti meram,
gëdde sawara wuy sëlsëli.
- 16** Sawara déy la Aji Sax ji di mbugale,
saamaram ba dal mboolem doom aadama,
ñi Aji Sax ji bóom ne xas.
- 17** «Ñii di sellalu ak a sangu-set
bala ñoo duggi tool ya ñuy tuuroo,

di fa toppi ca gannaaw ka ca digg ba,
 ñooñooy lekk yàppu mbaam,
 ak yeneen yu seexluwu ni janax,
 te ñooy bokk sàñku.»

Kàddug Aji Sax jee.

18 «Man maa xam seeni jëf ak seeni xalaat.
 Bés bii taxaw lees di dajale xeetoo xeet aki làkk,
 ñu dijk ba niir samag leer.

19 Maay teg firnde fi seen digg,
 ba jël ñenn ca ña dese bakkan ca ñoom,
 yebal leen ci xeet yi,
 yebal leen Tarsis, ak Pul ak Ludd,
 ñooña di ñu mane fitt,
 ma yebal leen ca waa Tubal ak Yawaan,
 waa duni géej yu sore ya,

ñooñu masula dégg sama jaloore,
 te masuñoo gis sama teddnga,
 sama ndaw ñaa leen di xamal sama teddnga.

20 Xeet yooyooy indi seen bokk

yi bokk ak yeen ñépp,
 jële leen ci mboolem xeet yi,
 ñu doon sarax bu ñeel Aji Sax ji,
 wari fas aki watuir,
 ba ci watuir yu ñu mbaar,
 aki berkelleeki giléem,
 ba agsi sama tund wu sell,
 wi ci Yerusalem.»

Aji Sax jee ko wax.

«Day mel ni noonu bànni Israyil di yóbboo sarax,
 yeb ko ci ndab lu sell,
 yóbbu kér Aji Sax ji.

21 Te ñenn ci yooyu xeet, maa leen di jël,
 def leen ay sarxalkat aki Leween.»

Aji Sax jee ko wax.

²² «Asamaan su yees sii,
ak suuf su yees sii may waaja sàkk déy,
ni seen taxawaay di yàgge fi sama kanam,
yeen, ni la seen askan ak seen tur di yàgge fi
sama kanam.

²³ Su ko defee Terutel weer ba Terutel weer,
bésub Noflaay ba bésub Noflaay,
mboolem doom aadama di ma sujjóotalsi.»

Aji Sax jee ko wax.

²⁴ «Te bu ñu génnee, gis néewi
ñi doon fippu fi sama kaw,
seeni sax duñu dee mukk,
seen sawara du fey mukk,
te boroom suux bu leen gis, yaram wa daw.»

**Kàddug Yàlla gi
Wolof Bible 2020 revision.
La bible en wolof, revision 2020**

copyright © 2010, 2020 La Mission Baptiste du Sénégal

Language: Wolof

Dialect: Regional Wolof

Translation by: La MBS

For complete copyright statement, please see <http://sng.al/copyright>

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-07-22

PDF generated using Haiola and XeLaTeX on 22 Feb 2024 from source files dated 23 Jul 2020

eb088fb7-76e3-5c5f-ab35-a0da6cd8fd40